

84(2Рос=Коми)-5  
М 47



Мелодии  
юности  
и потом...



Меллунны  
пыдөстөм  
и поштөм ...



Муслун йылысь кывбурьяс



НАЦИОНАЛЬНАЯ ДЕТСКАЯ  
БИБЛИОТЕКА РЕСПУБЛИКИ КОМИ  
им. С.А.МАРШАКА  
Сыктывкар, Советская, 20

Сыктывкар  
Коми небӓг лэдзанін  
2001

84 (2 Рос=Коми)

О-11

Книга отпечатана на бумаге  
Сыктывкарского лесопромышленного  
комплекса в Коми республиканской  
типографии

Небӧгсӧ лӧсьӧдіс Е.В.Козлова

О-11 Мелілуныс пьдӧстӧм и помтӧм: Муслун  
йылысь кывбурьяс.— Сыктывкар: Коми  
небӧг лэдзанін, 2001.— 272 л.б.

ISBN 5-7555-0705-8

Абу сэтшӧм поэт, коді эськӧ эз гижлы муслун  
йылысь. И гӧгӧрвоана, мыйла. Ӧд сійӧ отсалӧ кыпӧд-  
ны мортлысь ловсӧ, венны олӧмын паныдасьлысь  
нелючкияссӧ, отсалӧ лоны бурджыкӧн, веськыд-  
джыкӧн, повтӧмджыкӧн, ыджыдджык сьӧлӧмаӧн.  
Эз кежны тайӧ темасьыс бокӧ и коми поэтыяс.  
Книгасӧ пыддигӧн ті казяланныд, кутшӧм аслыс-  
ногӧн быдӧн на пиысь гӧгӧрвоӧ муслунсӧ, кутшӧм  
стӧч да сьӧлӧмысь петан кывъяс, ярыюгыд мӧвпъяс  
аддзӧ муслун йылысь сёрнитігӧн.

84 (2 Рос=Коми)

О  $\frac{4702290200 - 008}{M 128 (03) - 01}$  16 - 01 м

© Козлова Е.В., составление, 2001  
© Шарипков Г.Н., оформление, 2001  
ISBN 5-7555-0705-8 © Коми книжное издательство, 2001

*Сандра, съёлөмишөрүй*

ТУЛЫС

Дас вит арөс меным тырис,  
Сөмын воис кад и вын,—  
Мый нө бара меө пырис?  
Удж оз кутчысь киясын.

Енлөн гажа, гажа! Кайлы  
Кокныд лэбавны, а мем  
Сьёкыд поис аслам яй-лы —  
Тадз эг чездывлы ме нэм!

Мыйкө колө мем? Көть кыла —  
Вөйпөдө мам, югыдлун,  
Видзөда пыр ывла вылө,  
Оз-ө сәті төдса мун...

♥ ♥ ♥

Йөз дінын ме олі,  
Да кыз тыртөминын,  
Ачымөс ме адди  
Өткаөн йөз дінын.

Синъяс водзын войтыр  
Лоис ветпысь шойяс...  
Ловъя мортӧс корсиг  
Эг узь ме кузь войяс!

Дыр ме корси зіля:  
Воисны сэк паныд  
Синъяслы тэ синъяс,  
Долыд еджыд баныд.

Шоналіс пыр сьӧлӧм  
Синъяс югӧръяссьыд –  
И ме шуи аслым:  
«Шудтӧ аддзин ассъыд!»

Кыз мем муса, мича  
Тыдовтчин сэк, чойӧ!  
Мый оз сетны медводз,  
Быдтор тшыг гӧсьт сейӧ!

Ошкыны ме кузя  
Ог нин ошкы тэнӧ;  
Бур тэ, абу мисьтӧм,  
Рам да-й ставыд сәні!

Мукӧддыръя мывкыд  
Тэнад дзугыльмӧдӧ;  
Мукӧддыръя сёрни  
Тэнад унмовссьӧдӧ!

Кӧні сійӧ, кодӧс  
Аддзыны ме кӧсьи?  
Кӧні лолӧс ләптысь,  
Кодӧс аслым вӧзйи?

Көні, көні, көні?–  
Да тэ эн зэв повзбы!..  
Тэысь кындзи, сисыйög,  
Некод мем оз ковзбы!

Ме тай абу енвевт;  
Абу ангельяс сэн;  
Ен кө сиас, тэкөд  
Лоам шудаясөн!

Вежөраоьсь, муса  
Морта-мортлы лоам;  
Ен кө сиас, тадзи  
Ангельясөдз воам!

## МЫЖ

Сьöкыд мыж эм лолöй вылын,  
Öти мыж и эм!  
Дзик чöv олі, кор «тэ муса»  
Сійö шуис мем!

## ТОМ НЫВ

*Александра Ивановна Поповалы*

Шондібанöй  
Бур таланöй,  
Муса, мича ныв!  
Ошкөм öкты,  
Зон моз йökты,  
Вильшась, серав, сьыв!

Юрас думсö,  
Вомас нюмсö  
Петкөд том мортлысь!  
Мед тэ бöрысь  
Гажмас пöрысь,  
Сьөлөм гажöдысь!

Югыз шондi!  
Долөд, шонты  
Став енвевт увсö!  
Мича нылö!  
Мыччыв милы  
Кокньыд олөмсö!

\*\*\*

Тэкөд донъясьны  
Морта-морт вöсна,  
Сандра, асьнымөн  
Ми ог пондö на,  
Ышмам, гажөдчам –  
Воас жö öд шог,  
Öнi миянлы  
Сыödз абу мог.  
Мед но-й воас шог,  
Ми ог вошö-й сэк,  
Морта-мортысь гаж,  
Бур ань индам век.

## ЭГ ЛӨСЯЛӨ

Сюрс көкъямыссё квайтымын витөд воё,  
Августын дас нельөд лунё, коймөд часын,  
Этшаника лөгасьлім ми мусакөд.  
Сійө воё жө, сы төлысьын, сы лунё  
И сы часын, быдса кык минутөн сёрджык,  
Вөлись бара морта-морткөд бурасим!

\*\*\*

Сандра, сьөлөмшөрөй!  
Сьөкыд менам висьом,  
Быд лы разьсьом, торья,  
Менам юрчась киссьом...

Сандра, сьөлөмшөрөй!  
Дөзмөді и тэнө.  
Сьөкыд өні-й тэныд  
Мусавнытө менө...



## ТИМА ВЕНЬ (В.Т. Чисталёв)

---

### *Сьёлөмын видза пыр гусьон*

♦♦♦

Уси төд вылө  
Менам томдырөй,  
Кодыр вөлі ме  
Ар дас сизима.

Кодыр сьёлөмөй  
Гажьяс төдлывліс,  
Кодыр вир-яйөй  
Ёна ворслывліс...

Майбыр, том кадөй,  
Менам сэкьяөй!  
Югыд шондіөй,  
Том олөм гажөй!

Сө майбырөй ті,  
Тувсов войясөй!  
Шондібанөй дай  
Гажа войясөй.

Сө майбырөй дай  
Мөдлапөв сиктөй,  
Сьёлөмшөрөй тэ,  
Медводдза мусөй!

\*\*\*

– Мый нө, эн өмөй төд  
менө, муса тэ зон?  
Кодлы ассьыд тэ, том,  
сетін олөмтө, ён?  
Код весьт сьөлөмтө, бур,  
видзин өнөдз на пыр,  
Уна, уна во нин  
менө виччысин дыр?

– Тайө – ывла выв ме,  
кодөс радейтлін тэ.  
Важөн, важөн нин зэв  
тэнө виччыся ме.  
Бара важ бөрад моз  
вунөд ассьыд тэ шог,  
Сэссия некор нин ог  
эновт тэнө ме, ог!

Шойччы, дона мем морт,  
коли сьөд пемыд вой,  
Эн нин дойдав, эн гөр  
аслад сьөлөмпысь дой...

*(«Көнкө, веж турун пөвст» кывбурысь юкөн)*



Кодöскö аддза кө ылысь,-  
Томиник аньöс – шань нылöс,  
Кыла кө нылуклысь сьылöм,  
Вөрзыштö менам сэк сьөлöм.  
Ола ме сöмын сы мусöн,  
Код сийö – ог висьтав мөдлы,  
Сьөлöмын видза пыр гусьöн,  
Мед весиг некод оз төдлы...



*Муса нылöй, петав, петав*

ЮГЫД КОДЗУВ

Югыд кодзув, петав, петав,

Эзысь кодзув, петав!

Дзирдав, пöртмась вылісянь,

Дзирдав рытъя кыа бöрын!

Муса нылöй, петав, петав,

Зарни нылöй, петав!

Гажöд менö, сьöлөмшөр,

Петав рытъя кыа бöрын!

Петас эськö югыд кодзув,

Дзирдалөмөн ворсас,

Гудыр кымөр тай оз лэдз:

Вевттьö пемыд эжös улö.

Петас эськö муса нылöй

Кыа бöрын ме дінö,

Мамыс тай сійös оз лэдз:

Видчö, нывлысь вöля кутö.

## ВЕЖ ВИДЗ ВЫВТІ МУНА

Веж видз вывті муна, муна,  
Мича дзоридз сэні уна,  
Зарни дзоридз вывті уна.  
Меным гажа: сьыла, йокта,  
Мича дзоридз водзё окта,  
Зарни дзоридз одйё окта,  
Муса зонлы юркытш кыа,  
Гортысь пета – рытъя кыа.  
Гортё локта – асья кыа.  
Веж видз вывті муна, муна,  
Мича дзоридз сэні уна,  
Зарни дзоридз вывті уна.

## АДДЗЫСЯН ТАЙ

Вөрөд-ягөд ветпывля,  
Рыжик, ельдөг вотпывля.  
Тшак вотыськөд аддзысьла,  
Гусьоникөн кутчысьла.  
Вотчигтырйи вочасьла.  
Зэв топыда окасьла.

Чери кыйны ветпывля,  
Сьокыд тönя кыскавля.  
Войковъясөн ветлігөн,  
Бипур дорын узьлігөн  
Зэв топыда кутчысьла,  
Тывьясьыськөд окасьла.

Рытын борйö ветпывла  
Чöскыд дука турунла,  
Ытшкывла да лэчтасыла...  
Мусукöйкөд аддзысьла,  
Небыд борйын кутчысьла,  
Зэв чöскыда окасыла.

Войяс пукны ветпывла,  
Ныв-зон костын ворслывла,  
Йöктывла да сывпывла,  
Вой шөр бөрөдз овпывла,  
Колльөдчигөн кутчысьла,  
Зэв топыда окасыла.

Со ме кутшöм допыда  
Том олөмöс колльöда!  
Мöдысь, гашкö, казытышта,  
Шогпыр нора сывпышта:  
«Кольöма тай, мокасытлы,  
Кыдзи коркö окасыли!»

## ТУВСОВ ВОЙ

Ой, ой, тувсов вой  
Важ том кадöс кыпöдö,  
Гажа югыд вой  
Унмöс менсьым пальöдö.

Жугыль сьөлөмөн  
Дзирья öшинь восьтышта,  
Нора сывлөмөн  
Том олөмöс казытышта.

Майбыр, сё майбыр,  
Ныв гаждырся тувсов вой!  
Долыд оландыр,  
Мыйла тэ мөдысь он во?

Эн көк, көкиньюй,  
Гажа садъя нөрысын!  
Кусі би киньюй  
Менам пөрысь морөсын.

Окма, кынмөма  
Сьылі гөгөр гартчысь сой,  
Сьөлөм измөма,  
Сөмын век жаль тувсов вой.

Час, час, гажөдчас  
Миян пыдди дзөля чой,  
Мед нө кажитчас  
Югид, долыд тувсов вой.



## ИЛЛЯ ВАСЬ (В.И.Лыткин)

---

### *Көні муслун – шуд оз куслы*

\*\*\*

Петав, дона-й, петав, муса-й,  
Веж луд вылө ворсны –  
Сё зарнитө, вошөм гажтө  
Нимкодясиг корсьны.

Югид шонді синтө ёрө,  
Гажа вадор йылын!  
Шлывгө сөдз ю керөс увті.  
Парма шувгө ылын.

Петөмаось гажөдчыны  
Том йөз берег вылө.  
Налөн нора сьылөм шыыс  
Вөлөсть пасьта кылө.

Петав, дона-й, петав, муса-й,  
Веж луд вылө ворсны –  
Воштөм гажтө, сё зарнитө  
Выльысь бара корсьны.

МӖДЛАПӖЛЫСЬ...

МӖдлапӖлысь, парма сайысь  
Зарни шондӗ кайӖ.  
Нимкодяся – аддза асыв  
Коми муын, тувсов расын.  
Меным шогкодъ, этша жугыль,  
ЖугыльлунӖй менам югыд:  
Асья шондӗ меным сьылӖ  
Томиник лӖз синма нылӖс.

♥♥♥

КӖнӗ дзоридз,  
СӖнӗ гожӖм.  
КӖнӗ кодзув,  
СӖнӗ енӖж.  
КӖнӗ муслун –  
Шуд оз куслы.

♥♥♥

Еджыд ныланӖй  
РозӖвӖй дӖрӖма,  
СосьяссӖ кӖрӖма,  
Мыйла нӖ, мыйла нӖ  
Нюммунӗн мем –  
СьӖлӖмӖ сутшкин тӗ ем?  
Зарни синъясыд  
ЛӖнь олӖм гуисны,  
АчымӖс нуисны

Дзоридзаингъясö –  
Керöсьяс выв...  
Сидзи-ö, ичöтик ныв?

## РЫТЫН СЁРÖН

Рытын сёрөн гортö муна...  
Ыркыд. Пемыд. Йöзыс уна  
Кыссьö-люзгыö сад йөр кузя...  
Сьёлöм менам шойччö, узьö.  
Меным лöсьыд, меным долыд:  
Талун, сьёлöмшөр, тэ волін!  
Кылö сёрни, гажа серам...  
Паськыд тöлыс ставсö нерö.  
Грымгö трамвай, увтчö авто.  
Меным веськодь, веськодь ставыс.  
Меным лöсьыд, меным долыд:  
Менам сьёлöм тэон олö.

♥♥♥

Асыввылын кыа.  
Шувгö вадор вөр.  
Эжва муртса гыа...  
Локтан, сьёлöмшөр?

Небыд лун тöv мойдö  
Керöс дорысь оз.  
Мусөн сьёлöм ойдö  
Тувсов Эжва моз.

372982

Локтан, дона-й? Збыль-ө?  
Муслунным оз ор?  
Босьтам сідзкө выльёс  
Сьыланкывлысь гор.

♥♥♥

Дона нылöй, зарни нылöй,  
Сьөлөмшөрсьыс-сьөлөмшөрöй!

Мыктала... оз артмы кылöй,  
Кодыр гига, киöй дзөрö.

Тэ динö ме орчөн пукся,  
Сьөлөмкылөмöйнам юкся.

Сьөлөмкылөм чеччө ортсö –  
Корсьö ассьыс дона ёртсö.

Эска, сюрас коркө сійö,  
Öзтас сьөлөмкылөм биөн.

Мед көть югыд бинас сотчам...  
Сотчам... но öд сотчам орчөн!

УЗЬ ЖÖ, ДОНА НЫЛÖЙ...

Вой төв сьылö ывла вылын,  
Унмовсьöма парма вөр.  
Узь жö, узь жö, дона нылöй,  
Кунь жö синтö, сьөлөмшөр.

Мойда тэныд муслун йылысь  
Сиа мича сөстөм вөт.  
Кытөн колипкай мед сыліс,  
Сэсся нинөм мед эн төд.

Узь жө, узь жө, муса нылөй,  
Унмовсь, зарни синма ныв.  
Ме со кровать дорад сыла...  
Узян?.. Ссылөмөс он кыв?

Эновтла ме узянінтө,  
Муна нимкодясигтыр,  
Окышта ме куньса синтө.  
Дона-й, узь жө... бура, дыр.

Югыд шонді аски асыв  
Шуас тэныд мелі кыв:  
«Менам югөр өшинь тасын,  
Чеччы сэсся, дона ныв!»

1975 ВО. ДЕКАБРЬ

Тупкысис лымйөн став муыс.  
Веж сөстөм лымйөн кө – мед!  
Сьөлөмсянь лымйыслы шуа:  
Кыпыдлун миянлы сет!

Медым оз жугылытчы сьөлөм,  
Бур шуда доддьө тэ сөлөд,  
Юсь гөн кодь туй вывті төлөд –  
Медым оз жугылытчы сьөлөм!

Му вылыс узьö нин лöня,  
Ставыс со гөгөр дзик чöv...  
Бур вöлöй, рöдты тэ, гөнит!..  
Эз на мудз воронöй вöv!

Чой паныд кытчö тэ каян?  
Катöдан менö тэ райö?  
Ог шогсы – лоö кө тайö...  
Чой паныд кытчö тэ каян?

Вöланöй, лым вывті гургы!  
Мичлунсö сьавкйö мем лым.  
Додь улын сьыланкыв юргö.  
Сьöлөмлөн тіпкөмыс пым.

Öтитор кора ме, вöлöй;  
Кылас мед муслунпысь гөлöс  
Муыввса меддона сьöлөм –  
Öтитор кора ме, вöлöй.

Шебрасис лымйөн став муыс...  
Веж сöстөм лымйөн кө – мед!  
Сьöлөмсянь лымйыслы шуа:  
Миянлы шудлун тэ сет!

Доддяс öд пукалам кыкөн.  
Сьöлөмным оз тыр мед зыкөн,  
Муслунсö некод оз тшыкөд –  
Тшем орччөн пуксим ми кыкөн.

Выль во нин воас со регыд.  
Донаöй, сиа бур шуд!  
Шуньгам ми, сьöлөмшөр, тэкөд –  
Менö тэ топыда кут!

СЭТШӨМ ЛӨСЬЫД...

Кутшөм лөсьыд, долыд вөлі...

Тэ өд меным сэтшөм муса!

Тіпкис ыджыд зыкөн сьөлөм:

Ыргысь битө өд он кусөд.

Муслун биөн чукйөн тырим,

Сьөлөм сьөлөмө кор пырис;

Чужөмөс ме сэки пукті

Тэнад еджыд морөс вылад,

Синсьым синва другысь чуктіс,

Синва вөлі югыд, мыла.

Шөвк дөрөм көтөді тэнсьыд...

Ачым аскөд пөся вензи:

Кысь нө тайө? Кутшөм синва?

Кытчөджык нө сійө инмө?

Али муслун лои чукйөн,

Сьөлөм пытшкысь петө дзулькйөн?

Оз төр пытшкам сьөлөмкылөм,

Ортсө петө горыс сьлөн?

Дерт жө, веськыда кө шуны,

Муслун вөлі вывті уна!

Сы понда дзик петіс синва:

Синмөй пөсь сьөлөмад инмис.

Тэнө топөді ме бердам,

Ёна топөді ме, дерт өд.

«Тэнö радейта ме, ёртöй,  
Васик нима муса мортöй»–  
Бöрдiгтырйи меным шуин...  
Менам сьöлöм дзулькйөн пуис.

Окыштöмьд би-пöсь вöли –  
Ортсö чеччис менам сьöлöм  
Чöскьд окышти ме окөн:  
Боши тэнад курыд шогьд.

Сьöлöмкылöм ёсьмис-ёсьмис,  
А синваьд ставнас косьмис.

КУТШÖМ ШОНЫД...

Кутшöм шоныд, кутшöм долыд!  
Кутшöм лöсььд сьöлöм вылын!  
Ветлö кокныдика лолöй.  
Сьöлöм пытшкын ставыс сьылö.

Сьöлöм бердын тэнад сьöлöм.  
Сотчö сийö мыла биөн.  
Кывза тэнсььд мелі гөлöс.  
Помтöм шудлун тэкöд мяян!

Тэнсььд сьылітö ме кутла,  
Сьыла гимн ме помтöм шудлы,  
Тэнсььд окышта ме пар,  
Сьöлöм пытшкын содас жар.

Сэтшöм лöсььд, сэтшöм долыд...  
Муслун юны татчö волі.

Регыд муна со ме горто,  
Горто муна, муса ёртöй.

Ну жö поезд, гургы, гургы!  
Сьöлöм пытшкын муслун юргö...

**АРСЯ ВОЙЫС...**

Арся войыс пемыд, пемыд...  
Дженьыд мортлөн олан нэмыс.  
Но öд эмöсь югыд луньяс,  
Коді некор дзик оз вунлы.

Тэ со – сійö югыд луныс,  
Тэ öд югыд лунсö сетін.  
Бара тэ дінö ме муна,  
Бара паныд меным петан.

Меліа окыштан менö...  
Лэччас му вылö сэк енэж.  
Сэтөн... сöstөм ангел ачyd.  
Тэкöд öттшötш вылö качам.

Ылö зэв космосö лэбзям,  
Югыд кымөр пөвстö дзебсям.  
Муслун чукья лоас сэтөн...  
Сэтшöм уна... синва-й петö.

РАДЕЙТА МЕ НЫВСӨ

Вөтөй менам, вөтөй!  
Ті, дерт, онө төдөй,  
Мый аддзылі вөтнам,  
Төда сійөс өтнам,  
Аддзылі ме нылөс,  
Сьөлөм муса сылөн,  
Синмыс сылөн сөстөм,  
Алөй би кинь өзтө.  
Сэтшөм би кинь, коді  
Сьөлөм пытшам водө.

Кая нөрыс йылө,  
Көні нылыс сьылө,  
Көні нылыс мойдө,  
Көні муслун ойдө  
Ставнас дзик му вывсө...  
Радейта ме нывсө.  
Волы, другө, кывзы  
Сьөлөмөйлысь кывсө.

ТЭ ӨД, НЫЛАНӨЙ, МЕНАМ...

Өд ме абу жө мыжа,  
Тэныд пукси кө пыжад.  
Тэкөд ва вывті кывтам  
Мича Эжва ю вывті.  
Кывтам, кывтам ми тэкөд,  
Тэ өд орччөн со мекөд.  
Сьөлөм тіралө шудла,  
Тэнө босьта да кутла.

Менам сѣ муса ӗртӗй,  
Тӗнӗ шымырта ордам,  
Аслам мездорӗ жмита,  
Кывза сьӧлӧмсьыд битӗ.  
Ставсӧ лӗкторсӧ вена...  
Тӗ ӧд, ныланӗй, менам!

### ОЗ ЛОК УНМӖЙ

Оз лок унмӖй и оз узьсы менам.  
Сӧмын пӧтӧлӧк да пемыд стен ӧд –  
Сӗсся менам жырйын абу нинӧм.  
Жугыльлун ӧд менӧ личкӧ-синӧ.

Тӗ кӧ вӧлӗн эськӧн, дона-й мекӧд,  
Гажыс эськӧн мыйта вӧлӗ сӗки!  
Эськӧн вӧлӗ гӧгӧр быдсӧн югыд.  
Некутшӧм эз босыт сӗк менӧ жугыль.

Сӗки эськӧн тӗнад зарни синмыд  
Менам синмӧ мелӗ биӧн инмис...  
И ме пӧри кызь арӧса зонмӧ,  
Вир-яйӗй и лолӗй эськӧн ӗнмис.

Эськӧ лозис кодзув кӧдзыд стенам,  
Югдӗс пемыд пӧтӧлӧкӗй менам,  
А тӗ вӧлӗн шондӗ кодъ жӧ дзирыд.  
Нимкодясис эськӧ сӗк став мирыс.

ЭМ МУ ВЫЛАС...

Эм му вылас уна дзоридз,  
Эм му вылас дзользьысь кай.  
Ме ог узь со сёрөдз-сёрөдз,  
Сьөлөм вылын ад и рай.

Мусаджык мем, дерт жө, райыс,  
Мусаджык мем зарни ныв.  
Сыкөд енэжө ми кайим,  
Мөда-мөдлы шуим кыв:

Сьөлөм бердө мөда-мөдөс  
Зэв топыда жмитам ми,  
Муслун лоө сэтшөм өда –  
Ыпнитас сэк чард кодь би.

Ломзяс олөм югыд биөн,  
Өткодь лоө вой и лун,  
Мөда-мөдлы шудлун сиам.  
Олөм лоө чөскыд ун.

КОДЫР УСЯМ ТЭКӨД РАЙЫСЬ...

Н..., сё зарниа нылөй,  
Кодыр лоа мустөм тэныд,  
Месянь сьөлөм лоас ылын,  
Вунөд ньөжйөникөн менө!

Ачымөс ог көсйы вины,  
Ог өшөдчы сэки релльö –  
Миян сьөлөмпытшса биным  
Мед оз разав уна пельö.

Медым сійө ньөжйө сотчас...  
Пуксям тэкөд, пуксям орччөн.

Сьыланкыв ми тэкөд сьылам,  
Тэкөд сьылам ми сы йыпысь:  
Кыдзи олім ми му вылын...

Олім тэкөд, дона нылөй,  
Сы понда дзик: ме өд кылі –  
Сьөлөмпытшса шонді тэнад  
Муслун биён шонтіс менө.

Сетлі тэныд медпось окөс,  
Юкси тэкөд гажөн-шогөн,  
Бөлі тэныд ертөн, вокөн.

Сё ногөн окалі, другөй?..  
Тэ өд – би-пось зарни чукөр.

Зарни чукөр – муса, дона,  
Кодөс радейті ме ёна.

Төд вылад уськөдлам тайөс  
Кодыр усям тэкөд райысь.

## АСЛАД СЬӨЛӨМЫДЛЫСЬ ЮАВ

Дона нылөй, муса нылөй.  
Тэ өд олан гажөй менам!  
Сьөлөм тіпкөмтө ме кыла,  
Ёна радейта ме тэнө.

Коркө гижлин: тэкөд өнi  
Оз пö позь мем мусукасьны...  
Кодсюрö пö дивитöны...  
Вай жö тöдам тайöс асьным...

Эн пö некодлысь тэ кывзы,  
Шуан, эн пö эновт шудтö,  
Сьöлөм пытшкад муса нывсö  
Нимкодясиг, радлиг кут тэ.

Дона нылöй, муслун бинад.  
Дона-й, тэысь кындзи некод  
Морöс бердам, сьöлөм динö  
Оз топöдчыв, муса-й, мекöд.

Сöмын сьöлөмöйлысь кывза,  
Кывза горсö сылысь сöмын,  
Пыдди пункта сылысь кывсö  
Аслам шудын и олöмын.

Зарни нылöй, тадз жö уджав:  
Аслад сьöлөмыдлысь юав  
(Туй индыны сьöлөм кужас),  
Кывзы, мыйджык тэныд шуас.

♥♥♥

Сыктыв бердса паркын быдмё пелысь.  
Сійö мича, тувсов лун кодь мелі...  
Пукала ме сэтөн скамья вылын,  
И дум вылын менам муса нылöй.  
Мыйла водздзык эг аддзы ме тэнö?  
Эськөн райö сэки тэкöд кайим.  
Муса Н..., сё зарниа нылöй,  
Тэ öд менам сөстөм олөм-вылөм!

Со тай кыськö пыдысь, сьөлөм пытшкысь  
Синва войтөн менсьым морöс бытшкис.  
Меным бытшкис сідзи би пöсь емөн:  
Менам тэкöд көртасьöма нэмöй...

Тэ öд төдан, менам дона ёртöй,  
Абу некод тэысь муса мортысь!



*Эг кут вермыны сійӧс вунӧдны*

ТОМ КАД ДЫРСЯ

Гӧгрӧс чужӧмнас,  
Мича вир-яйнас,  
Лӧсьыд тушанас,  
Гартчӧм юрсинас  
Менсьым сьӧлӧмӧс  
Том ныв ылӧдіс,  
Менсьым гажлунӧс  
Дзикӧдз бырӧдіс.

Ӧтчыд ковмывліс  
Син пыр нуӧдны.  
Эг кут вермыны  
Сійӧс вунӧдны.  
Эськӧ лысьта кӧ –  
Сійӧс тӧдмала.  
Ассьым радейтӧм  
Сылы висьтала.

Сійӧ кывзас кӧ  
Сэтшӧм сёрнитӧм,  
Оз кӧ серавлы  
Менсьым радейтчӧм,—

Эськө ёна жö  
Нылöс дзигöдла,  
Сьöлöм бердöдзым  
Дзикöдз топöдла.

Мича вом дорсö  
Сылысь окала...  
Сöмын сёрнитныс  
Ог куж кыз колö.  
Нылысь яндыся,  
Ог лысьт тöдмасьны...  
Кысь нин ме кодлы  
Нывкöд окасьны...



*Вой муо зарни тулыс воо*

ТӨДСА НЫВЛЫ

(Юкөн)

Кыдз лэбачьясөс виччоны лунвывсянь,  
Вой муо зарни тулыс воо кор,  
Сідз виччывлі ме тэсянь, муса нывсянь,  
Вой мусянь меным гижөмтор.

И письмө лыддиг сьөлөм вөлі öзйө,  
И меным нимкодь лоо пырысь-пыр,  
Öд мыйтөм вөлі надея да көсйөм,  
И мелі кывйыс вөвлі тыр.

Но кадыс мунө, борда моз жө лэбө.  
Нин важөн асьным аддзысьлім ми бөр.  
Но мый тэ, муса, мый тэ öні дзедан,  
Мый кутан гусьөн, сьөлөмшөр?

Тэ мыйла мекөд важ моз абу варов,  
И менө аддзиг шоча петлө нюм?  
Вай висьтав, нывка, ставсө меным гора,  
Вай восьты, эрдөд ассыйд дум.

Мөй дзикөдз вылө вунөдін нин менө,  
И важ моз төдса ог нин лөй ми?  
Мөй сэсся збыльысь кудри юртө тэнсьыд  
Оз малышт ньөтчид менам ки?

Но абу, абу веськыд тайёторйыс.  
Шу мыйкө мөдтор, сійөс мем эн чуйд.  
Тэ, лучшө, муса, менсьым мөвпөс дорйы,  
Мед өттшөтш тальны өти туй.

## МЕ ТАЛУН ТЭНЫД

*(Юкөн)*

Ме талун тэныд  
Сьылөм ассьым видза,  
Ме бөрья долыд,  
Кыпөдана тон;  
Мед лира ворсас  
Гажаа и мича,  
Мед бөрсьыс сьылас  
Дзордзалысь ныв-зон.  
Ме көсья, медым  
Ыпйис миян морөс,  
И йөктіс сьөлөм,  
Төв йылын, кыз би;  
Мед талун шонді  
Сөрөнджыка нерис,  
Мед талун дырджык  
Гажөдчимөй ми.  
Мед ывла вылыс  
Кыпыд вөлі, гажа,  
И тувсов горөн  
Йөла юргис мед.  
А миян садным  
Нюмьяліс мед надзөн,  
И дзордзалис сэн  
Вөвтөм мича цвет.

## *Муслун сьолөм динө инмис*

\*\*\*

Муслун сьолөм динө инмис  
Меным, ог төд ачым кыз.  
Шор пос вылын сулалім ми  
Окасигыр рытивбыд.

Вөлі басни, вөлі сёрни,  
Нывка варов и зэв вөй.  
Янсөдчигөн вөлі сёр нин,  
Но эз бурмы сьолөмөй.

Өдва аски луныс воис.  
Муса рытыс дыр эз лок.  
Лунтыр морөс пытшкөс сөйис  
Быттьө рад и быттьө шог.

Югыдөн на гортысь петлі:  
Корси этась, корси тась.  
Войбыд туй кузя ме ветлі –  
Милөйөй эз паныдась.

Юр вем пытшкын чужис полөм...  
Аттө, ыджыд мокасьтө!  
Часлы, шор пос дорө вола –  
Гашкө, мөдкөд окасьө.



Мича лун сьомӧс гажа берегӧд  
Ӧтнас ветлӧдліс ва дорӧд ныв.  
Тӧвру ю вывсӧ неуна серӧдіс,  
Нывка сьыліс сэн сьыланкыв.

Сійӧ сьыліс зэв надзӧник, чӧла,  
Быттьӧ неуна гажтӧм и нор,  
Быттьӧ кодӧскӧ казътыліг меліа  
Корис ас дінас нюмъялігсор.

И ме бокисянь сы вылӧ видзӧдіг,  
Ӧзйи сьӧлӧмӧн лачаӧн тыр.  
Став том сямлунӧн чолӧм видзиг  
Мича нывкалань матыстчи пыр.

Радлун бушколӧн морӧсын гыаліс,  
Сійӧ сьӧлӧмлы лӧньны эз сет...  
Кисӧ чабырті...  
Сӧмын тай ки улӧ,  
Сынӧд кындзиыс, немтор эз шед.

Тӧвру ю вывсӧ неуна серӧдіс...  
Ылыс мӧвпъясӧн юр вемӧй дик.  
Мича лун сьомӧс гажа берегын  
Со тай сулала ӧтнамӧн дзик.



Горӧда ме сьывны,  
Горӧда ме гора,  
Медым кутіс кывны  
Менам милӧй дорӧдз.

Горöда ме гора.  
Тöv пöпутнöй, ну вай,  
Лэбзыы сьылöм сорөн  
Ылö, Коми муö.

Медым кутіс кывны  
Сэні менам сьылöм...  
Мелі кывйөн милöй  
Казытыштас ме йылысь.

Менам милöй дінöдз  
Сьыланкывйöй мунас.  
Муслуныс кө вына,  
Гашкö, эз на вунöд.

Гашкö, эз на вунöд...  
Если кө и вунсис,  
Сöмын верма шуны  
Атьö важ муслунсьыс.

## НЫВЛЫ ПИСЬМÖ

Гижа тэныд ме, сьөлöмшөр нылöй,  
Тэ эн дивит, мый кывсьöртас жеб.  
Мед ме тэ дорсянь öні зэв ылын,  
Ассьым мöвпъясöс тэсянь ог дзеб.

Гажа сад йöрын августся рытын  
Тэнö аддзöдлі, сьөлöмшөр ныв.  
Тайö рытсö сöдз асывкöд йитіс  
Тэнад медбөрья меліа кыв.

Ме ог вунёд, кыз рыт кыа кусиг  
Откодь долыдөн кажитчис рыт.  
Сьолём сотыштіс, шуин кор «мусаёй»,  
Сөмын окыштны воча эг лысыт.

(.....)

Сійө кадсянь вель уна нин коли,  
А со сьолөмын пыр сійө би.  
Сөмын кыкысь на воча кыв воліс,  
Мыйла вунөдін, мыйла он гиж?

Ме со радейта важ моз на өнөдз.  
Тэ нө сэкса моз радейтан он?  
Тайөн помала письмөөс тэныд,  
Сиа муыс кодь ыджыд поклон.

Гижа тэныд ме кывбурья кывйөн,  
Тэсянь меным зэв уна оз ков:  
Висьтав меным тэ, сьолөмшөр нылөй,  
Кызди комиён шусьө «любовь».

♥♥♥

Унмөй оз лок  
Төлыся рытө.  
Мыйлакө мусаёй  
Талун оз лок.

Сад йөрын чөв,  
Лөнь – шы ни төв,  
Быттьөнөсь төлысьыс  
Матіник зэв.  
Быттьөнөсь сьолөмын

Быль сьыланкыв...  
Буракö, ылöдiс  
Збой синма ныв.  
Рытывбыд думайта:  
Мый понда радейта?  
Тöлыся рыт,  
Тöлыся рыт!  
Сорсьö быд мөвп,–  
Лöнь – шы ни тöv.  
Быттьöкö тöлысьыс  
Шванитчысь зэв.  
Шытор оз кыв,–  
Радейта тэнö,  
Радейта тэнö,  
Тэнсьыд быд кыв.  
Исковтö вуджөр,–  
Енэжыс кутшöм!  
Ме тшöтшъя кадö  
Кодi оз радейт?  
Тöлыся рыт,  
Тöлыся рыт!  
Унмöй оз лок  
Тайö сөдз рытö.  
Милöйöй, көн тэ?  
Мыйла эн лок?



*Вөвлі коркө менам кодзув*

МЕНАМ КОДЗУВ

Вөвлі коркө менам кодзув,  
Дзирдыс век на синъяс водзын.  
Синкым вевдорса пудпасыс  
Тыдалө на рыт и асыв.  
Мися, кодзулөс кө вошта,  
Важмөм тюни моз жө лошта.

Мыйла бара тадзсө шуи?  
Нылөс быттьө төв ныр нуис,  
Кыдзи коми мортыд шуө,  
Муніс, вошис мутөм муө.  
Муса кодзулөй көть берді,  
Туй визь кута кодзув серти.

Мортыд ур моз көть оз пуав,  
Чеччышти ме мутөм муас.  
Вои нин, а төдтөм жырийө  
Векджык пырсьө полігтырийи.

Мыжа инасьтөм, пось сьөлөм,  
Сы вөсна и кутсьө вөлөм  
Вугсө пыдди өдзөс дзирсө.  
Кыла, нылөй мөдкөд гирзьө,

Часлы, мися, зарни тугъяс,  
Кутчысьла на өд и вугъяс.  
Тракниті, и муслун вынысь  
Өдзөс калич вужнас мыніс.

## МУСУКЛЫ

Янсөдчигөн вөлі миян сёрни,  
Туйө петіг шуин меным кыв:  
«Ме кө ловъя, муслунлы не орны.  
Эскы меным, дона, муса ныв»

Помнита ме бура тайө сёрни,  
Сөмын думтө тэнсьыд, дерт, ог төд.  
Вермин вежны. Но ог понды ёрны,  
Мед көть тэкөд паныдасяс мөд.

## ВАЖКОДЬ НА МИЧА

Век на тэ важкодъыд мича.  
Өмидз моз өзъялө бан.  
Кодлы тэ мичлунтө видзан?  
Гусьөник висьтав мем, ань.

Гөлөстө тэнсьыд кор кыла,  
Кыла ме эзысьлысь звөн.  
Сыён тэ шогсян и сылан,  
А кывзысьыс коді да көн?

Воас-ө ловйөн бөр гортө?  
Воас жө, воас жө мед!  
Позьө мөй воштыны мортөс,  
Сьөлөмсө колис кө тэд?

## НЫВКАКӨД ЯНСӨДЧИГӨН

Кыз сьывліс пыр, оз сідзи сьыв,  
Нор шыён талун вөрыс шувгө.  
А менам сьөлөм шытөг увгө:  
Эн энотт менө, муса ныв!

Не өтчыдысь тэ шулін мем,  
Мый мусмис тэныд Коми муным,  
А талун көсьян шудөс нуны...  
Эн вөрзьөд, сьөлөмыд кө эм!

Ме песа лолөс, жугла юр,  
Ог гөгөрво, мый тэныд колө.  
Тэ көсьян өтнадлы кык олөм,  
Кор кыклы өтиыс тыр-бур.

Эм, сідзкө, тыдавтөм мөд вын,  
Эз тані чуж, а локтіс кыськө,  
Ме дінысь нылөс аслань кыскө,  
И янсалөмысь он нин мын.

Тэ мөдөдчин? Прөщай, бур ныв!  
Көть, мунан да, он кут нин кывны.  
Но тэ йылысь ме кута сьывны  
Нэм помасьлытөм сьыланкыв.

*Радейтчөм сылөн эз кус*

ТОМ ОЛӨМ

Лэччыны кутіс гөрд шонді,  
Кыаыс зэв мича, дон.  
Ывлаын пемдыны пондіс,  
Гудөкөн петіс том зон.

Ворсөмыс гудөклөн кылө,  
Сьөлөмтө кырыштө пыр...  
Бурлак зон кыпыда сьылө,  
Йөла шы юргө зэв дыр.

Вадорлань ворсігтыр лэччө,—  
Кыр дорас төдса льөм куст...  
Мича ныв воас кө сэтчө,—  
Радейтөм сылөн эз кус.

Льөм пулань долыда мөдіс.  
Мусаыс виччысис сэн...  
Өнісянь бурлак зон төдіс —  
Ныв сійөс радейтас нэм.

РЕГЫД, РЕГЫД МИ АДДЗЫСЯМ ТЭКӨД

Регыд, регыд ми аддзысям тэкөд,  
Выльысь кыпөдлам збой сьыланкыв.  
Гажа кыр йылын йөктыштам сэки,  
Зарни кудриа том мича ныв.

Талун ыджыд походө ми мөдам,  
Выльысь поткөдам морелысь эрд.  
Сюся велөдчам,– ачыд тэ төдан,–  
Видзны зумыда границаяс мед.

Кельыд төлысьыс енэжөд уйө,  
Кыптысь кыакөд нуөдө вен.  
Тэнад письмөйд, пета кор туйө,–  
Радлун ыджыдөс сетө пыр мем.

РОЧ НЫВ

Юкмөс дорсянь векни трөпа-туйөд  
Роч ныв нуис сьөкыд ведра гоз...  
Матыстчи да меліа ме шуи...  
– Юыштны мем ватө оз-ө позь?

Синкым увсянь чөвтліс лөзов синьяс,  
Видзөдласнас сотіс, кызди би.  
Югнитісны лым кодь еджыд пиньяс...  
Нюмъялігтыр нюжөдіс мем ки.

Көдзыд ва ме юи ведра помысь,  
Нывлысь кудри дзугис небыд төв.  
Сулалім сэн, кыкнанным ми томөсь,  
Өта-мөдкөд нимкодясим чөв.

Юом бöрын нывлы киöс сеті,  
Шуи сылы медся шоньд кыв...  
Война туйö коллис менö сэки  
Юкмöс дорсянь лунвивса том ныв.



## ГЕОРГИЙ ТОРЛОПОВ

---

### *Мудзём сьёлём мелі нюмён шонты*

ПЕТАВ ЖӨ МЕ ДІНӨ, МУСА

Сикт помын рытгоров сёрөн  
Кылыштө гудөклөн шы.  
Быттьөкө кодөскө корө,  
Нимсө көть сылысь оз шу.

Горалө шыыс и куслө,  
Кылө сэн кутшөмкө төжд.  
Петав жө ме дінө, муса,  
Радлунөн сьөлөмөс өзт.

Гажтөм мен рытйысьны тэтөг,  
Сьөлөмөс вөрзөдін кор...  
Петав жө, донаөй, петав,  
Абу на кадыс тай сёр.

♥ ♥ ♥

Менам өшиньянь ичөтик би  
Вөлі тыдавлө рытпомын сёрөн.  
Сійөс өзтысьлөн небыдик ки  
Коркө, сывйыштіг, сотыштліс морөс.

Бисö важөн нин öзтывлö мөд,  
Сöмын воддза моз пуксьывла сэтчö,  
Кöни содтыліс тіпкөмпысь öд  
Менам сьöлөмöй мыйöкө эскиг.

## ВИЧЧЫСЬ, МУСА НЫВ

Эжва дорö петав, муса ныв,  
Югыд васö гумовт визув юысь,  
Горөд мелі, нора сьыланкыв,—  
Ме йылысь тэ рытыв төвсö юась.

Казьтышт сэки шуда, гажа кад,  
Югыд войын кызди ветлім кыкөн;  
Сьöлөм миян помтөм вöлі рад,  
Кылім налысь муртса-муртса тіпкөм.

Воа регыд, пома сьöкыд туй,  
Виччысь менö радейтөмөн, дона,—  
Ставыс лоö, көсьям вöлі мый,  
Сöмын виччысь вунөдлытөг ёна.

Морös бердын новла тані ме  
Тэнсьыд муса, помтөм дона серпас.  
Тöда, сиин, видзас сійö мед  
Менсьым олөм, шудлун меным сетас.

Виччысь – локта, воча сэки пет,  
Кызди петö кымөр улысь шонді.  
Сывйышт менö, китö ассьыд сет,  
Мудзөм сьöлөм мелі нюмөн шонты.

Эжва дорö петав, муса ныв,  
Берег йылын виччысь менсьым воём.  
Горöd мелі, гажа сьыланкыв.  
Рытыв төвкөд ыста тэныд чолём.



Лоны эськө небыд тувсов төлөн,  
Коді пулысь кышöдыштö кор,  
Муртса öвтö руа пöжөм йөлөн,  
Вайö вöрысь чöскыд öмидз көр.

Лоны эськө Эжва кодь сөдз ваён,  
Коді югыд, рөмпöштан кодь лөнъ,  
Лöсталыштны төлысь улын войын,  
Кызди мича эзысь рёма вөнъ.

Лоны эськө асья шондi лучөн.  
Коді косьтö дзоридз выпысь ва,  
Вөтлө мортлысь ойбыр, сьөкыд мудзём,  
Лөктор некор некодлы оз вай.

Небыд төлыс мыськалыштас кудри,  
Югыд ваыс мыськас чужөмбан,  
Шондi лучысь дойдлём сьөлём бурдас,  
Миян олём лоö ещö шань.



*Колли сылём шы улын*

КОД РАДЕЙТӨ

Код радейтө, сы йылысь гораа оз шу,  
И кутшөм муслунлы йөз эрдө петны колө?  
Друг йөзасяс кө кызкө, муслун сыысь  
полө,—  
Өд сийө мича сэк, кор вевттыштөма ру.

И лөсьыд сэки сылысь кывны мелі шы,  
Кор гусьөник тэн пеляд мый йылысь кө  
вашкө.  
Көть сы йылысь, кызд вөлі төлысь кывтө,  
гашкө,  
Да сылысь мичсө эстөн петкөдлө лөнь ты.

И кывзан сийөс тэ. Да, кывзан и он мудз,  
И кутыштлыны сийөс кийд лоө нюдз,  
И мелі вом дор сылысь окалан тэ пөся.

Тэ өтчыд окалан и сёысь, но он пөт,  
И сэтшөм долыд тэныд! Дойман – дой он  
төд,  
И шуан: мыйла водзджык орччөн туй эз  
лөсяв?

ВУНӨДІН ТЭ МЕНӨ

Вылын гөгрөс төлысь –

Югьд, яр.

Лөнис лунся төлыс,

Узьö кар.

Сотчö менам морөс,

Ог узь вой.

Сывйыштчö тэ дорö

Небыд сой.

Но оз аддзы тэнö,

Некыз оз.

Вунөдін тэ менө

Вөтөс моз.

А өд кыз пу дорын

Сьөлөмтö

Визув шор кыв-ворөн

Вөзйин тэ.

– Некодыр ог вунөд,

Лөзов син,

Тэкөд ставсö муна,–

Висьтавлін.

Но оз аддзы тэнö

Сывйöй, оз.

Вунөдін тэ менө

Вөтөс моз.

Сöмын мича кывъяс,

Мелі нюм,

Сöмын вына сывъяс,

Поезд шум

Төд вылө мен колис,

Быттьö висьт.

Муслун йылысь доли.  
Но эз письт.  
Сыв оз аддзы тэнö,  
Некыз оз.  
Вунöдін тэ менö  
Вötöс моз.

### МЕ ТЭНÖ РАДЕЙТА

Ме тэнö радейта –  
Став сьöлöм тэөн тыр,  
Кыз ытва сывйөн  
Паськыз Эжва берег.  
И морöсысь оз веськав,  
Оз веськав сэтшöм сэрöг,  
Көн эськö тэ  
Кöть öти здук эн кыв.

Ме тэнö радейта,  
Кыз ассьым чужан му,  
Көн эзысь вöньөн  
Чуклялöны юяс,  
Көн миян помтöм муяс,  
Кузь шептөн öвтчысь муяс  
И öзийö югыд шондйөн  
Став луд.

Ме тэнö радейта,  
Кыз ассьым ыджыз шуд:  
Тэ синьясысь ме аддзи  
Джуджыз море,  
Код плавайтны лöz эрдас

Збой сьёлөмъясөс корө,  
Мед нимөдны  
Советской вольной му.

Ме тэнö радейта –  
Став сьёлөм тэөн тыр,  
Куш сөмын тэөн, –  
Мен тэ – югыд тулыс,  
Код дзоридзьясөн кышö  
Став веркөссö веж мулысь.  
Ме тэнö радейта.  
И öтнадөн ме тыр!

### ТЭНЫД КОРСЯ МЕ ДЗОРИДЗ

Ворсö Эжва лөз гыөн,  
Небыд төлыс зэв лөнъ.  
Югыд ывлаыс кыö  
Мича мөвпьясысь вөнъ.  
Колип сьылөм шы улын  
Мунам берегөд ми.  
Олö морөсын тулыс,  
Ыджыд муслунлөн би.

Тэныд корся ме дзоридз,  
Коді кья кодь гөрд,  
Менö дінад тэ дорин,  
Тэтөг места ог төд!

Мыйла сёрнитны уна?  
Гөгөрвоам ми сідз.  
Кытчö олөмыс мунö,

Шуд сэн – дзоридза видз.  
Ми ог кыссьой йөз бөрын,  
Сетчө миянлы удж.  
Ставыс бур миян йөрын,  
Норлун милань оз вудж.

Тэныд корся ме дзоридз,  
Коді кыа кодь гөрд.  
Менө дінад тэ дорин,  
Тэтөг места ог төд!



*Воча серөктіс эзысьён шор*

РОМАНС

Тан вөлім тэкөд  
кыкөн тувсов войө.  
Дзик ставыс вөлі гөгөр тадз.  
Тадз вөлі төлысь  
кельыд югөр койө,  
Пу лапъяс костөд кывтіс надз.

Шуд йылысь  
вашкөдісны веж пу коръяс  
сэн, көні ворсіс ышмысь төв.  
Шуд йылысь  
помтөг мойдісны и шоръяс,  
Ми тэкөд кывзім найөс чөв.

Но талун тані  
абу тэ ме дінын,  
Ме өтнам дзик, и сьөлөм нор.  
Мем допыд вашкөдөм  
оз кыв важинын,  
И мыйкө шогөс мойдө шор.

Шуд, кодөс сиис  
тувсов вой мем татөн,  
Тэ сьөрсьыд нуин курыд кадын.

## КЫТЫСЬ РАДЕЙТӨМ

Аддзи шорлысь ме тулысын письтөм.  
Шуи: радейтөм шедө кысь, висьтав?  
Воча серөктіс эзысьөн шор:  
Чужтө радейтөм шоръяслөн гор.  
Аддзи шонділысь нюмъялан чужөм.  
Кытысь радейтөм, юалі, чужө?  
Шонді воча мем: радейтан би  
Тэнад сьөлөмын – шонділөн пи.  
Аддзи, веж борті мунігөн, дзоридз.  
Кытысь радейтөм?– висьтав мем, кора,  
Тэныд, шуис мем гөрд дзоридз кор,  
Пырис радейтөм дзоридз дук сор.  
Аддзи лэбачөс кыз пу лап йылысь.  
Кытысь радейтөм?– висьтав мем, сьылысь.  
Сійө воча мем: радейтан гы  
Лэптө колипкай сьылөмлөн шы.  
Аддзи төвру кыз бадь корйөн ворсіс.  
Төвру, сьөлөм кысь радейтөм корсис?  
Вочавидзис мем, вашнитіс төв:  
Байи лунвылысь гусьөник, чөв.  
Аттьө төврулы, шонділы, шорлы!  
Аттьө лэбачлы, дзордзалан борлы!  
Чужтід радейтөм, шуд чужтід мем.  
Оз мудз радейтны сьөлөмөй нэм!

## ЭЖВА ВЫЛЫН

Шонді медбөръя зарни сі кыё,  
Рытыв вөн्याліс гөрд рөма шөвк.  
Паськыд Эжва выв сяркъялан гыа.  
Тэнад юрсіөн вильшасьё төв.

Кылөд миянөс, визув ю, кылөд.  
Кокни пыжнымөс лайкйөдлы, гы.  
Кыдзи сьылігөн йөлөга кылө,  
Сьөлөм кылө сідз мөд сьөлөм шы.

Волө серам шы сиктпаньысь төлөн,  
Көнкө, кылыштө, гудөк шы эм.  
Лыддьё миянлы көк мөдлапөлын,  
Лыддьё-туналө долыд кузь нэм.

Кылөд миянөс, визув ю, кылөд.  
Кокни пыжнымөс лайкйөдлы, гы.  
Кыдзи сьылігөн йөлөга кылө,  
Сьөлөм кылө сідз мөд сьөлөм шы.

Төлысь югөркөд ми визув шөрын,  
Коли ылө нин вадорса кыр.  
Кыдзи сынөдыс льөм дзоридз көрөн,  
Менам сьөлөмөй тэон дзик тыр.

Кылөд миянөс, визув ю, кылөд.  
Кокни пыжнымөс лайкйөдлы, гы.  
Кыдзи сьылігөн йөлөга кылө,  
Сьөлөм кылө сідз мөд сьөлөм шы.

Менам вермас кӧ инасьны колӧм,  
Сиа ме эськӧ дзик ӧтитор,  
Тайӧ шуда рыт нэм чӧж мед олӧ,  
Эжва кывтӧм моз некор оз ор.

Кылӧд мянӧс, визув ю, кылӧд.  
Кокни пыжнымӧс лайкйӧдлы, гы.  
Кыззи сьылігӧн йӧлӧга кылӧ,  
Сьӧлӧм кылӧ сідз мӧд сьӧлӧм шы.



*Кывъяс пыдди – сьолӧм висьӧм*

ЛОКТИ БӐР

Поезд котӧртіс, поезд саяліс, сиктыс сулаліс –  
шы ни тӧв.

Синмӧй кӧтасис, синмӧй яналіс – дыр ме татӧні  
эг нин вӧв.

Керка гӧгӧрным коркӧ садитлім муса нывкӧд  
ми уна пу.

Ӑта-мӧднымӧс ӧна радейтлім, кӧсйим мичмӧдны  
чужан му.

Сад йӧр чужӧма, сад йӧр быдмӧма. Абу сад  
йӧр нин – быдса вӧр.

Менам радейтӧм абу бырӧма. Муса сьӧлӧмшӧр,  
локти бӧр!

Петав, мусаӧй, мекӧд пукыштам! Сӧмын, тыдалӧ,  
морт оз пет:

Ӑдзӧс сиптыса, ӧдзӧс крукыштӧм – олӧ татӧні  
кодкӧ мӧд.

## РАДЕЙТӨМ

Перö пыдди – ловъя лолöй, кывъяс пыдди –  
сьöлөм висьöм.

Тэкöд орччөн – шудöй олö, тэтöг – уджыс  
киысь киссьö.

Гезтöм гезйөн менö домин, лун шөр лунö  
вöчин синтöг.

Кörтысь асык морöс вомөн пуктін меным ловъя  
шытöг.

Кöсья туйö петны-мунны – туйыс помассьöма,  
пöдса.

Кöсья вунöдчыны унмын – аддза тэнсьыд войся  
вöттö.

Пана тöдсаяскöд сёрни – тэнад нимыд песö кылöс.

Сöмын эновтчыны сёр нин, шуа: «Радейта ме  
нылöс.

Сылөн сьылöм – помтöм вөр-ва, сылөн нимыс –  
асья кыа.

Сылөн вом дор – öмидз көра; сылөн юрси –  
Эжва гыяс».

## ЭН ШОГАВ, НЫВ

Эн шогав, ныв, эн öшöд юртö, эн шу, мый мустöм  
кöдзыд төв.

Эн шогав, ныв, – быд рана бурдö, и тулыс волö  
уна пöв.

Эн шогав, ныв, эн войтöд синва – бөр вошö  
тэнад сьöлөм дой.

Эн шогав, ныв, да босытчы сывны, и кольо бөрө  
төвся вой.

Эн шогав, ныв,— быд бурыс водзын. Эм югыд  
шонді, гоҗся лун...

Эн шогав, ныв,— босыт ассыд козин да аслад  
другыд дорө мун.

## ТӨКӨТЬӨ

Ньөжйөнник матыстчө вой, төкөтьө кыаыс гөрд.  
Сьөлөмын кылыштө дой — сөмын ме сыысь ог  
бөрд.

Төкөтьө дырджык эн пет, гуляйтны сөрөдз эн  
лок.

Сьөлөмтө меным эн сет — сы понда гажтөм да  
лөк.

Төкөтьө визувтө ю, довъялө-төлалө төв.

Мыйла нө нинөм он шу, мыйла нө сулалан чөв?

Төкөтьө топөдлан тэ, төкөтьө сибдылас лов.

Радейта сьөлөмсянь ме — тэ кындзи некод оз ков.

## ПЫРАВ МЕ ОРДӨ

Юыс скөралө, юыс бергалө, руөн тырөма  
джуджыд сөн.

Пырав рыт помын, пырав керкаө, пырав,  
пырыштлы, муса зон.

Тэтөг тані ме, тэтөг важөн нин өтнам бырөда  
ассьым шог.

Коркө радейтлін, коркө гажөдлін, коркө пыравны  
корсьлін мог.

Көдзим көдзаяс, көдзим өтвылысь, көдзим,  
радейтім тулысбыд.

Сэки шулывлін мен эн өтчыдысь – менө гөтырөн  
босьтны быть.

Ставсө вунөдін, ставсө эновтін, весиг эновтін  
көдза йөр.

Волы ме ордө, пукышт ме ордын, сет мен  
сьөлөмтө ассьыд бөр.

## ВИЧЧЫСЯ

Гөгөра уялө, горзө, морөснас поткөдө ю.

Радейтысь зон менө корсьө – ветлөдлө,  
кытшовтө му.

Кытөні, мусаөй, ветлан – весьшөрө песан тэ  
кок?

Виччыся, надейтча век на – он-ө тэ миянө  
лок.

Өтнам ме кузя нин ола, абу нин важкодъыд  
том.

Талун ме ёна нин пола – аддзан-ө туйяслысь  
пом?

Югьялө, югьялө, ворсө ывла, и енэж, и ю.

Мусаөй өдзөсөс восьтө, сулалө, нинөм оз шу.

## МУСАӨЙ

Кор тэ локтан татчө,  
Менам муса аньой?  
Кор ме тэнö аддза,  
Мелиöс да шаньюс?  
Збыль мөй ставыс вуні,  
Тэныд эг ло муса?  
Збыль мөй шуда луныс  
Менам дзикöдз кусас?  
Эскыны ог көсийы,  
Тадз оз вермы лоны:  
Кузя ру оз öшйы  
Гожся төла лунö.  
Тэнсьыд воём вичча  
Сьөлөмөн и полөн.  
Тэкöд – быдтор мича,  
Тэтöг – абу олөм.  
Муса аньой менам,  
Олөм менсьым дзоньтышт.  
Öтув быдтор венам –  
Сөмын лок да шонтышт.



## АЛЕКСАНДР МАЛЬЦЕВ

---

### *Му вылас – мойд*

#### ЭН ГУСЬӨН ВИДЗӨД

Эн гусьөн, веськыда тэ видзөд, зон,  
Тэд кажитчана тődса нылыд вылө,  
Мед радейтөмла полыд лоас дон  
И сьөлөмыд мед вөлі мудзтөг сьылө.

Эн яндысь радейтөмсьыд – повзьи! кув!  
Мед биа висьом быттьө тэнө босьтис!  
Мед тődмавны и Олөм выв и ув,  
И юрбит сылы, коді сьөлөм косьтө!

Оз мыжав некод – быдөнлөн эм пай  
Тадз сотчыны, кор радейтөмыс суас...  
О, томлун! Олөмыслөн ад и рай!–  
Зэв водз тай Кадыс сійөс менсьым нуис!

#### МЫЙЛА СІДЗИ НЮМЪЯЛАН, МАРГО?

Синмөс сөйө бипурнымлөн тшыныс,  
Кытчө көть ог вешьи – вөтчө век.  
Кыанас со эжсис енэж джыныс,  
Лөнис, весиг пипу кор оз лег.

Ставыс лои пөръялана паса:  
Нюмыд, тшыныс, ёльлөн мелі гор...  
Гашкө, чайтан менө вывті асөн?  
Мыйла сідзи нюмъялан, Марго?

Видзөда тэ вылө, а ме аддза:  
Кольөм кадсянь нюмъялө мем мөд!  
Коркө сійө сьөлөм вылө тальччис,  
Но эз казяв, да и бөрыннас эз төд.

Сійө кадсянь – сьөлөмөй көрт кыша,  
Сійө менө видзө көні көть и кор...  
Өні өмөй восьтынысө ышма?  
Мыйла сідзи нюмъялан, Марго?

## ЗБЫЛЬ МӨЙ КОЛӨ

Збыль мөй колө тэныд выльысь эскыны,  
Збыль мөй колө важсө выльысь пестыны,  
Медым бара важ моз меөн шоналін,  
Медым бара важ моз дінад домалін?  
Видлы, инө, бура кө нин артыштін,  
Гашкө-й бара мелілуннад «гартыштан».

♥♥♥

Лөз енэжыслөн муртавлытөм пидөс,  
И алөй вөнь.

Ак, кутшөм муса ыркыд гожся рытыс  
И кутшөм лөнь!

Со кодкө вуджөртіс дзор сад йөр бокті...

«Вай петав, ныв»...

Көть дзик нин өшинь улө сійө локтіс,  
Кок шы оз кыв.

И сэтшөм вына чөскыд дука рытыс!

И... шпывгө вой.

Лөз енэжыслөн муртавлытөм пыдөс.

Му вылас – мойд.

\*\*\*

Ак, радейтө, радейтө шондісө дзоридз:  
Сөдз синваён асывсө виччысьө пыр,  
Лөз енэжас видзөдө рыгыяснас сёрөдз,  
Скөнъ медбөръя югөрыс кытчөдз оз быр.

О, радейтөм, радейтөм,—

Морт нимөс шонтысь,

Тэ кусан кө, кусас и көдзалас лов.

Сідз:

Битөгыс пачыс, көть пес эм, оз ломтысь;

Сідз: сынөдтөг весиг и кельчи оз ов.

## ВЫЛЬ ВОСЯ МОЙД

Кодзув дзирдьяссө Выхь вося войыс  
Ыджыд көш тырөн өшиньө койө.

Петам, донаой, дзирд шөрас сувтам,—

Татшөм здукыслөн казытывлөм кувтөм:

Войыс ловнымӧс йитас и топӧдас,  
И, он кӧсйы кӧть, тӧдлытӧг окӧдас,

Кутас выль волысь медводдза шыяс  
И съӧд синлысьяс помад тэн кыас

Медся кокныд да медмича прӧшви,  
Медым ёнджыка тэнӧ ме ошки.

Сэк ме сывйышта тэнӧ и нуа  
Локтан воясса мойд сяма муӧ.

### КЫДЗИ КОРКӧ

Да, кызди коркӧ, паныдасим ми,  
И гӧрдӧдыштіс тэнад мугыд чужӧм.  
Ме чайті: тайӧ – лолад ворсӧ би  
И съӧлӧмыд со ӧддзыны на кужӧ.

Кыв бӧрся кыв, и бара, кызди сэк,  
Ми панім олӧм йылысь... шылъыд сёрни.  
А съӧлӧм ёнтӧ, виччысьӧ на век,  
Мый он шу важ моз, мый ме сёрми...

Но гӧлӧсад друг кутіс кывны йи,  
И гӧгӧрвои: весьшӧрӧ ме эска!  
Да, кӧдзыд повтӧ пӧсьыскӧд он йит.  
Не тайӧтор кӧ, лӧсялім, дерт, эськӧ...

## НЫВЛӨН СЫЛӨМ

Войвыв дзирдалө көшнас,  
Тöлыс мудзöма пöлясьныс,  
Шöштак швачöдчö, шöштак...  
Кöч ку шапкаа тöлысьыс.

Мортлөн кок улын лымйыс  
Дзуртö ясыда. Матыстчö...  
Шöштак бара со лыйис,  
Весиг дрöгмунис матича.

Коді ывлаас шöйтö,  
Лолыс кодлөн нö инасьтöм?  
Көнкö, кöдзыдсö вöйпö...  
А öд век на ме игнасьтöм!

Мися, бөр, гашкö, волан,  
Мися, бурасям, гашкö да...  
Али лёк кывйысь полан?—  
Тэнсьыд нимтö век вашкöда.

Ышмис шöштакыс талун.  
Лымъяс-кодзувъяс усьöны...  
Мича дзирдъясыс налөн  
Лöня сьöлöмын кусöны.

## ТЭ – МЕНАМ АСЫВ

Вөлі дойдалысь вензьём  
Лов да вежөрөй костын.  
Кыдзи асыв, тэ менсьым  
Шогӧс пальӧдін, косьтін;

Сетін колиплысь сьылӧм,  
Лолӧс пальӧдысь лысва,  
Вӧлись нюммуніс сьӧлӧм,  
Вӧлись серавны лысьта.

Мем тэ асылӧні вӧлін,  
Сійӧн нэм кежлӧ колян,  
Уджын – ышӧдысь тӧлӧн,  
Шойччиг – ыркӧдысь ёльӧн.



*Кыдз нө тэнө он радейт*

\*\*\*

Киссьö енэжысь кокни лым,  
Быттьö пожйысь моз кодкö кöдзö.  
Мыйта колö пыр восьлав водзö,  
Но он кыв ассьыд мунöм шы.

Татшöм рытö мен эськö рад  
Босьтны сой пöлöд талун сийöс,  
Кодлы сьöлöмысь пöсь строка  
Тайö стих пытшкö гусьöн кыи.

Сöмын весьшөрö... Овлö сідз,—  
Нывлөн морöсысь пöльтö ыркыд.  
Муса кок туйсö югыд лым,  
Гашкö, сийөн нин дзикöдз тыртис.

\*\*\*

Тайö войö эн узь,—  
лоас чудö:  
потас льöм пулөн нэриник кор.  
Тэ кö вөр-валөн мичлуннас шуда,  
верман казавны аддзывтöмтор.

Тайö войö эн узь,–  
ставсö воштан:  
мулысь медводдза лов шы он кыв.  
Гашкö, тэныд тшöтш сё бордья пошта  
вайö лунвывсянь сё сьыланкыв.

Тайö войö эн узь,–  
кöть и сёр нин  
юкны кодлөнкö сьёлöмысь би,  
ловзьöм пу улын вашкöдчан сёрни  
кутам нэм помöдз казьтывны ми.

♥♥♥

Тэнад öшиньсьыд кусі биыд,  
ланьтис асылöдз мудзöм грезд,  
сöмын туйбердса тола пиö  
коли Тöлысьлөн югыд вез.  
Зарни Тöлысьöй, висьтав гусьöн,  
менö радейтö али оз  
сійö,  
син водзö коді усьлö  
сöмын удж вылö мунигмоз.  
Гашкö, сьёлöмöй прöста ноксьö –  
мöдöс радейтö муса ныв...  
Сідзкö, мед менсьым гуся шогсьöм  
сійö некор оз тöд да кыв.

## КОР ДЗОРИДЗАЛӨ ЛЬӨМ

Тшөкыд вөрлөн пила йыв  
тувсов енэж вевтсө пыкис.  
Талун тэкөд, муса ныв,  
мунам Эжва сайө кыкөн.

Йөзыс аддзыласны мед  
менсьым киөс тэнад кийсь.  
Муслун сэтшөмлы оз шед,  
коді оз куж корсьны сійөс.

Дзоридзьясөн льөм пу тыр,  
быттьө венеч улө мунө.  
Кык шуд йитны колө пыр  
буретш татшөм сөстөм лунө.

## КЫДЗ НӨ ТЭНӨ ОН РАДЕЙТ

Шогла воштывла садьөс,  
ог кө гөлөстө кыв.  
Кыз нө тэнө он радейт,  
алөй бандзиба ныв?

Быдтор вөчан зэв пелька,  
Биысь пось тэнад сыв.  
Кыз нө тэнө он лелькуйт,  
өмидз вом дора ныв?

Быд лун лосьода гусьөн  
тэныд выль сыланкыв.  
Кыз нө тэ абу муса,  
ловъя акань кодь ныв?

Коркө мөд динө кежан,-  
ог төд – кын, али сыв,-  
Кыз нө тэнө он вежөгт,  
сиктса медудал ныв!

## НЫВЛЫСЬ СЬӨЛӨМСӨ ГУСЯЛІС ЗОН

Нывлысь сьөлөмсө гусяліс зон...  
Тадзи артмис,- тэ веритан он?–  
Гашкө, шуан на, мыйла нө сідз  
Нылыс сьөлөмсө ассьыс эз видз!

Но өд коркө тэ вөлін жө том,  
Ассьыд помнитан лөнь Катыдпом,  
Эжва берегысь ичөтик сикт,  
Көні первойысь аддзысим ми.

Мыйла чегин сэк му вылысь шеп,  
Тэнсьыд некор эг юасьлы ме.  
Вөлі рыт... Сэтшөм шоныд да лөнь,-  
Весиг вуграліс туй бокун льөм.

Шеплысь джынсө тэ юкин, а ме  
Сеті сьөлөмсө век кежлө тэн.

Уна туй колис, зэв ыджыд кад,  
Но спокойнөй пыр вөлі душа:  
Сьөлөм, кодөс ме видзны эг куж,  
Төді, тэ ордысь мөдлы эз вудж.

ТӨДА

Төда, мый тэ абу ныв,  
сы вöсна и пола  
шуны куим мелі кыв:  
кыдзи öні олан?

Сёрниттöгыд туйыд кузь  
да и абу долыд.  
Торйөн сэк нин, кор оз узь  
аслад мыжа лолыд.

Öні, жаль көть абу жаль,  
ставыс коли бөрö,  
сöмын енэжлөн съод шаль  
кодзувьяснас вөрö.

Волас уна шоныд вой  
миян вöлөсть помö...  
Медым казытылö важ дой,  
мый ми вöлім томось.

♥♥♥

Пөръявлыны асьтö мыйла колö:  
«Öта-мөдтöг лөсьыдджыка олам!..»

Дивитны ог дивит: көть и шутка,  
Сьөлөмөйлы ваясны шог здукьяс.

Прөстö сійö, чайта, сöмын сөрö,  
Кодлысь синсö шонді помся ёрö.

Тупкылө и шондiсö сьöд кымөр,  
Небесасö чардбиясөн кырас;

Кымөр тэрыб бордьяс вылас төвзяс,  
Öшкамöшка сизим рөмөн öзьяс.

Бара лоö кокни тэнад ловлы...

Öта-мөдтөг он öд вермы овны!

## БАРА ОГÖ ТÖРÖЙ ÖТИ ПОЗЙÖ

Бара огö төрөй öти позйö,

ыръянитны тэкöд абу вöйöсь...

Мыйла нö ми, быттьö торья розьяс,

öта-мöдысь янсавлытöм гозья

корьяскö тшötш овлам татшöм йöйöсь?

Абу кокни олан туйтö вуджны,

Öти шуд нель киөн öтвыв дорны.

Видзны муслун колö ёна кужны,

кужны колö тшötш и прöща корны.

Гашкö, коркö чужасны выль войтыр,

мездмасны быд вуджöрысь да няйтысь,

донаджык сэк лоö синва войтыд

миян кадö ветлысь эзысь шайтысь.

Татшöм мича асывсö ми тэкöд,

вермас лоны, донай, ог аддзöй...

Медым öнi, ыджыд кыа петiг,

кыкнаннымöс кутас сотны яндзим.

♥♥♥

Сьöd дзоридз некор оз овлы,  
кыа важ паськөм оз новлы,  
катыд оз котөртны шорьяс,  
тöлын оз вежөдны корьяс.

Шондыс асылын петлө,  
пыр öти туй вывтi ветлө,  
гуляйтö Тöлысьыс-чойыс  
важ мозыс пыр сөмын войын.

Мыйла нө сёрнитан уна,  
кор öти вевт улысь муна?  
Чөв овны сэки öд колö,  
кык пельö орö кор олөм.

♥♥♥

Тэ мунін... Ставыс лои тыртөм  
и ывла югыдыс тшөтш сьöd,  
а кодлы ассьыд муслун пыртін,  
мед тайöс некор ме ог төд.

Пыр вөвлі тадз и кольö тадзи:  
кык, сьөлөм мырдысьөн он йит...  
Мый корсим, сійöс эгö аддзöй,  
да-й öнi ог нин аддзöй ми.

Кор кольö медся шуда тулыс,  
мөд сэтшөм тулыс оз нин лок,  
но колö чөв олөмөн нуны  
быд шогысь медся курыд шог.

*Ме помтөг шуда тэкөд орччөн*

ТӨВЗИС ЕДЖЫД СЬӨМЪЯ РОЗ

Карса праздник вылын тотшкө-йөктө  
Кочи ногөн бура вөччөм ань –  
Жбыркъялө кызды вылын юра пөтка,  
Чужөм вылас мича на и шань.

Сөмын регыд казавны ме понди –  
Ме вылысь оз вештыв аньыд син –  
Видзөдласнас ёрө быттьө шонди,  
Весиг эг кут аддыны ме ин.

Ставыс кутис бергавны син водзын,  
Сьөлөм нөйтчө, содтө тпкан өд –  
Абу-ө нө тайө югыд кодзув,  
Югнитис код менам томлунөд?..

Льөм пу улын сулалим ми сэсса –  
Төвзис-киссис еджыд сьөмъя роз!–  
Синьясаным өта-мөдлы пөся  
Видзөдим ми важья-важья моз.

– Чужөмыд тай дөрөм кодыд еджыд...–  
А ме сылы:– Пырсө эг и төд...

– А ме тэнö төдi пырысь-пыр жö,  
Тэ кодъыс тай абу сэсся мөд.

Казялі да, эбöс дзикöдз бырліс,  
Öдва-öдва кок йылысь эг усь,  
Сэсся-й быттьö бөр воис томдырöй,  
Быттьö-й меным бордъяс вайис юсь...

– Янсалөмсянь мыйта колис кадыс...–  
Меным некыдз сёрни визь оз во.

– А мем ставыс век на сэтшөм матыс,  
Визувтiс көть комын дай вит во...

– Кыдз нö олан? Велөдан на, кывсьö?..

– Олам тай со, сiсьтам Керöсйыв,  
Челядь быдмалiсны, верöс кувсис,  
Öнi выльысь лои öтка ныв...

Сылөн быттьö важ моз вильыш сёрни,  
Сöмын видзöдласас курыд нюм –  
«Вильысь аддзысьнысö ми тай сёрним!..»–  
Быттьö көсийö шуны гуся дум.

– Талунъясö сьөлөм кыліс менам –  
Татчö вотöдз вөталі кык вой:  
Быттьökö салдатö на тэ мунан,  
Ачыд сэтшөм авъя, сэтшөм збöй,

А ме помтөм шуда тэкöд орччөн,  
Менам быттьö сылө лы и вем,  
Кыськө китыр дзоридз меным мыччин –  
Пытшкас вөлөм лежнөг дзоридз ем,

Бытшкис емыс ёся менсьым киёс,  
А ме воча сероктышти – чаж,  
Сөмын тай и бытшкөма сэк сійө  
Миян дженьыд шуднымойлысь гаж...

Нормөмөн ме кывза татшөм кывъяс,  
Сэсся-й менө чунгө ем кодь мөвп:  
«Эг кө вөлөй сэки сэтшөм йөйёсь,  
Олөм вермис артмыны дзик мөд!..»

Ог ме өні норась немтор вылө –  
Олөмыслысь төдлі гуг и бан,  
Сөмын... кыз нө эськө ставыс вөлі,  
Коркөсө эз торйөд кө сьөд кань?..

– Дона письмөястө дыр ме видзи –  
Мед нин эз ор бөрья зарни сі,  
Сөмын тай и дзебасинө судзөм  
Чорыд мортлөн гөгөрвотөм ки;

Талун олөм курыдсө ме өкта –  
Сійөс ачым көдзлі уна во,  
Талун тэ водзын ме усьтөдз йөкта,  
Сэсся мый көть мекөд мед эз ло!..

Өтнам сулышти на льөм пу улын,  
Сьөлөм пессис дзугйын лэбач моз...  
Гөгөр праздник гора ворсіс-сьыліс...  
Вывсянь төвзис еджыд сьөмья роз.



*Югыд вöлі сійö войыс*

\*\*\*

Чöв олім, видзöдім ваö,  
Быттьöкö кывтöмöсь дзик.  
Гортö эз мунсы дай ставыс,  
Матын көть тыдаліс сикт.

Сідз эг и лэптыв ме синмöс,  
Öтчыд эг ыдждöдлы лов.  
Пельпомыд пельпомö инмис,  
Мен сэсса нинöм эз ков.

ВИСЬТАВ, СЬÖЛÖМÖЙ

Кывтö тöлысь кымөр пöлөнöд,  
Кышакылö пулөн кор.  
Мый нö тэкöд лои, сьöлөмöй?  
Мыйла талун сэтшöм нор?

Некор синва эг на кисьты ме,  
Бурöс вöтасьлі быд вой.  
Эн-ö, сьöлөмöй, тэ висьмы нин?  
Мыйла кылышта ме дой?

Оз на шудой менам чусаммы:  
Морос тырон ветло лов.  
Эз-о кодкө тэныд мусаммы?  
Висьтав, сьолөмөй, эн пов!

### МЕ КАЗЫТЫВЛЫНЫ КУТА\*

Ме казытивлыны кута  
Лонь рытсө тайө век.  
Ме талун лои шуда,  
Мый мекөд орччөн тэ.

Мен сьолөм вылын кокни,  
И өдийө ветло лов.  
Пось аттьө тэд, мый локтін,—  
Мем уна оз и ков.

Мен тырмас татшөм пайыс.  
Но өти көсийөм эм:  
Ок, эськө рытыс тайө  
Эз рыт кө вөв, а нэм!

### ВЫЛЬ ВО ПАНЫДА РЫТӨ

Выль во паныда рытө  
Аддзи первойысь тэнө.  
Өні, лоа көть кытөн,  
Сувтан син водзө меным.

---

\* «Сизимөд председатель» пьесаысь сьыланкыв.

Ыджыд сьодоват синъяс,  
Ру кодь ветпасыд кокни...  
Тэлань сьолөмөй синіс,  
Тэлань ышөдіс локны.  
Вөлі нылыс көть уна,  
Тэнө танцуйтны кори,  
И сөдз асыв кодь нюмыд  
Менө век кежлө дорис.  
Кодыр бергөдлі крута,  
Горшын сибдывліс лолөй:  
Полі чорыда кутны,  
Но и мынтөдны полі.  
Мый пө, шуоны йөзыс,  
Көсьян, ваяс тэд выль во.  
А ме өтитор көсья,  
Медым радейтөм збыльмис!

♦♦♦

Ме талун татөн,  
Тэ дорын матын.  
А аски – кытчө суас вой.  
Но весиг ылын  
Ме тэнө кыла,—  
Тэ меным вөчин сэтшөм дой.  
Өд менам сьолөм  
Зэв доймысь вөлөм,  
Зэв вөлөм веритысь да нэр.  
Ме тэнө кора,  
Ме тэнө ёра,—  
Бөр он кө менө бурдөд-кер.  
Ме бурда регыд,  
Ме бурда сэки,

Кор аддза воча петысь нюм,  
И сэки меным,  
И сэки тэныд,  
Ме чайта, воас өткодь дум,  
Мый сэсса кыкөн,  
Но огö зыкөн,  
Ми кутам тэчны өти шуд.  
И муслун помысь  
Век лоам томось,  
И шогыс сибавны оз кут.

### ВОЙВЫВ КОДЗУВ

Войвыв кодзув, югыд кодзув,  
Ылын-ылын öзьян тэ.  
Сöмын лыдтöм кодзув письыс  
Öдйö корся тэнö ме.

Коми парма весьтын ломзян.  
Гажөн пуö кыркötш йыв.  
Сöмын частö тэлань дзоргö  
Чöдлач синма өти ныв.

Кодыр сиктсыным ме петі,  
Шуим кыкнанным ми сэк:  
Тэлань видзöдливны, медым  
Лоим öтпайнось век.

Абу нылыс ёна мича,  
Сьыліг гөлöснас оз босьт,  
Сöмын сьлөн сэтшöм сьöлöм,  
Некысь шаньджыкös он корсь.

Войвыв кодзув,  
Югыд кодзув,  
Ылын-ылын өзъян тэ,  
Сөмын лыдтөм кодзув писъыс  
Өдйө корся тэнө ме.

### ӨТЧЫДЫСЬ ВОЛӨ

Өтчыдысь волө –  
Узьөм ни олөм,  
Сьөлөмыд косьмө,  
Дойыс пыр ёсьмө.

Шань эськө дойыс,–  
Оз тай коль войыс.  
Сы мында көсйөм  
Нэм кежлө өзйө.

Ыджыд да мича  
Надея видзан,  
Баньид и гугыд  
Сөстөм да югыд.

Пөсьлуныд туө,  
Визулөн нуө,  
Кылөдө сылань,  
Кодөс тай кылан.

Медтыкө суны,  
Кык кыв и шуны.  
Көсйылін сёысь,–  
Мый лоан лыис!

...Öтчыдысь волö –  
Узьöм ни олöм,  
Шуд моз тэн усьö,  
Томдырөн шусьö.



Югыз вöлі сійö войыс,  
Кувны кута, да оз вун.  
Эг и мынлы сьöлöм дойысь,  
Эг и тöдлы чöскыз ун.

Морöс улын пöжи тэнö,  
Öнöдз сэтысь кыла на.  
Ог тöд кодi, морт-ö, ен-ö,  
Абу меным шулöма.

Важсö казгыла ме бурөн,  
Лёкöй тэ вылö. оз пет  
Эськö коркö ловъя юрөн  
Паныд лöсъявлыны мед.

Ог ме повзы, ог ме ойöст,  
Гашкö, весиг петас нюм.  
Югыз вöлі сійö войыс,  
Кувны кута да оз вун.

СЬӨЛӨМ ВЫЛӨ ЭН КӨ ВО

Быттьө менө вежисны,  
Быттьө лои мөд,  
Местаө ог инасьлы,  
Узьлөм ме ог төд.

Сьөлөм вылө эн кө во,  
Гашкө, тадзсө эз и ло.  
Он өмөй нө гөгөрво?

Войыс меным абу вой,  
Луныс абу лун.  
Кильчө вылад пукся да  
Некытчө ог мун.

Ог кө аддзыв асывнас,  
Лунтыр меным шог.  
Верма овны шондитөг,  
Но, а тэтөг – ог.  
Сьөлөм вылө эн кө во,  
Гашкө, тадзсө эз и ло.  
Он өмөй нө гөгөрво?

МИЧА ИЖЕМКА

Көдзыд войвылын  
Көрьяс войлөны.  
Лымйыс гожөмөдз  
Сэн оз сыв.  
Көдзыд войвылын  
Сьөлөм доймылө.

Табысь мыжаыс  
Öти ныв.

Мича ижемка  
Эн вөв мыжа кө,  
Лысыті шуны мөй  
Татшөмтор?

Мича ижемка  
Эн вөв мыжа кө,  
Эськө вөлі мөй  
Татшөм нор?

Тэнад синъясысь  
Зарни киньясыс  
Менсьым сотісны  
Сьөлөм шөр.

Тэнад синъясысь  
Зарни киньясыс  
Менө кыскөны  
Татчө бөр.

Мича ижемка,  
Эськө гижас кө  
Тэныд кысянькө  
Öти зон,—

Мича ижемка,  
Эськө гижас кө,  
Сылы воча кыв  
Сетан он?

Шогө усьлытөм,  
Биа-куслытөм,—  
Тэкөд вунөдлан  
Ар и төв.  
Шогө усьлытөм.

Биа-куслытөм,–  
Меным татшөм и  
Колө пөв.

Мича ижемка,  
Эськө йиджас кө  
Тэныд муслунөй,–  
Лоө бур;  
Мича ижемка,  
Эськө йиджас кө,–  
Меысь шудаыс  
Сэк оз сюр!

## МЕД ТЭ АБУ МИЧА

*Галялы*

Мед тэ абу мича,–  
Абу сыысь шог.  
Сьөлөм вылө воис  
Тэнад оласног.

Видзан менө лёксьыс.  
Ышөдан, кор – бур.  
Өтнамлы кө, шудыс  
Дырджык, дерт, эз сюр.

Абу тэ зэв лышкыд,  
Но и абу кын.  
Шуны кө, ме тэтөг  
Збыльысь вөлі джын.

Меным тэкөд кокни.

Тэкөд долыд мен.

Атгыё сыысь тэныд,

Мый тэ менам эм.

## МУСЛУН

Дивъя радейтнытө сэки,

Кодыр төдсаёсь на регыд,

Кодыр кыкөнөсь на сөмын.

Ставыс сэки зарни рөмын,

Шудыд – пөттөдз окасьөмын.

Вот кор кага бөрдысь лоё,

Мукөд төждыс лыдмас сёөдз,

Кодыр дөнзьөм кутас йирны,

Шудыд вый моз кутас чирны,–

Сэки лөсялас мед вирныд.

Сэки муслуныд и колё,

Сэки муслуныд и волё.

Нэмыд кежлө нин сэк локтө,

Вөтлө кокни оласногтө.

Оз ков песны сөмын лөктө.



*Ме тэ ради му вылас ола*

КУТШӨМ ОВЛӨ МУСЛУН

Муслун – сійө югыд сөстөм кодзув,  
Тэрыб бордьяс вылын лэбысь вой.  
Муслун – сійө кокныд, мича бобув,  
Колана и чөскыд сьөлөм дой.

Муслун – сэки майшась тэ да вежөгт,  
Курыд синва кисьтны уна вель.  
Муслун – сійө бытшкасяна лежнөг,  
Сьөлөм пытшкө йөрмөм чорыд жель.

Кутшөм көть оз овлы эськө муслун,  
Асьным көсьям, некор мед оз куслы!

ЭСЬКӨ ТӨДІ КӨ МЕ...

Эськө төді кө ме, кутшөм туйвежын лоамой воча,  
Весьшөрө кытшлалөм пыдди ме вөрзыйвтөг  
сулалі сэн,  
Медым аддзывны тэнө көть здук кежлө,  
ылісянь, шоча,  
Эськө төді кө ме, тэнө виччыси вояс и нэм.

Эськө төді кө ме, кутшөм ярьюгыз чардбийөн  
сотан,  
Гымлы-бушковлы морөсөс восьтыны некор эг пов.  
Он тай водзвылысь төд, мортлөн шудыз көн  
чинө, көн содө...  
Эськө төді кө ме, мый тэ тадзикөн ышөдан лов.

Эськө төді кө ме, кутшөм шаня тэ бурдөдан менө,  
Сэки важысянь, элясьтөг терпиті ёнтана дой,  
Синьяс ёрана тшынсө и пөдтана курыдсө вені,  
Эськө төді кө ме, лоас шондіа съөд пемыд вой.

Эськө төді кө ме, кутшөм лысваён асывнас  
мыссян,  
Койи быд турун сі вылө аслам рам синьяслысь  
моль,  
Кокныйд руён ме лэччи и бауён тэ дорө кысси,  
Эськө төді кө ме, мый тэ казавтөг менө он  
коль.

Эськө төді кө ме, сэтшөм пані ме сёрни,  
Кылін сійөс мед тэ, гөгөрвоин дзик өтнадөн тэ.  
Гашкө, сэки эг мытшасьлы, тэ дорө тадзи эг  
сёрмы,  
Эськө төді кө ме, эськө төді кө ме...

## АЛӨЙ ЛЕНТА

Ог төд: ягө ли, нюрө ли эндөма  
Тэа-меалөн өтувъя шуд...  
Муслун гөрддзалысь алөй шөвк лентасө  
Он тай нель киөн өтпырйө кут.

Алөй бордъя со лэбалө кыаыс,  
Алөй дзоридзөн вевттысьсө му,  
Шондї петігөн кельыдгөрд гыясөн  
Бара кодлыкө вашъялө ю.

Тэныд, тэныд мед олөмыс нюмъялас  
Алөй рөмъяснас талун и дыр.  
Сөмын ме аслам майшасян думъясөн  
Асья югөръяс улас ог пыр.

Жугыль думъясысь, майшасьөм вентөмысь  
Тэ эн лөгась и менө эн вид:  
Оз нин муслунлөн алөй шөвк лентаыс  
Тэа-меалысь олөмсө йит.

Оз нин шед менам сьөлөмөй лэчкавны,  
Бордтөм гулюөс моз он тай кут,  
Но кор югөр моз син улам веськавлан,  
Мем нин сійө и козин, и шуд.

Алөй нюм бытгыө енэжыс пасьтала...  
Доймөм сьөлөмөй ёнтны оз ланьт,  
Менө жалиттөг тіпкөмнас казтылө,  
Мый тэ колана, дона и шань...

## МЕ ТЭ РАДИ МУ ВЫЛАС ОЛА

Он төд, кутшөм муса тэ, дона,  
Кыз сьөлөмөй тiпкө, он кыв,  
Мый тэ ради гажтөмтчө ёна  
Лөз войвылын өти том ныв,  
Мый во гөгөр виччысьö тулыс,  
Шань муыс моз сывлыны мед,  
Мый дзоридзөн петö лым улысь  
Да син улад тэныд оз шед.

Он тэ менсьым кывзывлы сьылөм,  
Он тэ орчча кок туйсö таль,  
Он тэ павкнит пельпомъяс вылам,  
Ни югыдлөз чышъян, ни шаль.  
Он тэ еджыд платтьöөн пасьтөд,  
Он тэ нимлун дзоридзсö вай,  
Көть тэнсьыд ме лов шытö казья,  
Кор лун төлөн пöльыштас май.

Ме виччысьтөм шудлы ог эскы,  
Öд олөмыд – абу на мойд,  
И некутшөм лун төв оз веськөд  
Ныв сьөлөмө поздысьөм дой.  
Но янсөдчөм понда ог кутöй  
Вай керавны муслунлысь нэм:  
Ме сийөн нин овывла шуда,  
Мый тэ тайö му вылас эм.

## НИНӨМ ЭЗ ВӨВ МИЯН КОСТЫН

Ылі том кадся муслунлөн востым  
Бара син водзам ыпнитлас со.  
Эськө-й нинөм эз вөв миян костын,  
Медым казътывны та мында во.

Вөлі тулыс, и саридз кодъ ытва:  
Суніс ва улө юшөрса ді.  
Школа помалан медбөръя рыгнас  
Син эг куньлөй ни шонді, ни ми.

Өддзөм ытваыс визувтис-ышмис,  
А ми раммөмөн пукалім чөв:  
Кывтім сэк, али кылаліс пыжным –  
Некоднаннымлы могыс эз вөв.

Нимкодясисны кыркөтшын козъяс,  
Мый тэ мича, а ме сэтшөм том,  
Мый зэв полігтыр льөм дзоридз розйөн  
Тэнад юр весьтысь повзьөдла ном.

Ытъя ю вомөн нюжөдчис милань  
Садьмөм шондісянь зарниа вөнь.  
Гашкө, кыссимө өтувъя билань?  
Гашкө, мөвпалім өтмоза скөнь?

Но ме муслунөс тэныд эг восьты,  
Дай эг ме сьөлөм косътысьнад ло...  
...Нинөм, нинөм эз вөв миян костын,  
Медым казътывны та мында во.



Ме вөвлі, кызд качөдчөм лэбач,  
Кызд дадь дорө велавтөм көр.  
Том зонъяслөн сямныс ни эбөс  
Эз судзсы, мед домавны бөр.

Но сүөдіс виччысытөг өні  
Пось муслунөн кольмөдан ру,  
И сюрөдчи-шедөдчи лөня,  
Эг пышйы ни кыв джын эг шу.

Эг, майбырөй, артась ни донъясь  
И водзөсөн нинөм эг кор.  
Мед чайтөны ас сиктса зонъяс,  
Мый ме, дерт жө, смилитөмтор.

Мед муслунөй сөмын оз ваймы,  
Яр бипурөн ыпъялас мед,  
А көрлы да жбыръялысь кайлы  
Дзик ньөти ог завидьты ме.

## МЕМ НИНӨМ АБУ ВЕСЬКОДЬ

Ме тэнө радейта.  
Мем нинөм абу веськодь.  
Мем абу веськодь, кызди коляс лун:  
Мед удж и сёрни ставыс вөлі веськыд,  
Мед сөстөм вөлі вөчөмтор и дум.

Мем абу веськодь, сёрнитө мый йөзыс  
Ме йылысь, коді сетө кутшөм дон:  
Өд ме вылө кө сөлас лөкыс, лөжыс,  
И тэныд инмас сійө лөжлөн пом.

Мем абу веськодь, кодыр шудлөн югөр  
Сөдз нюмөн шонтө тэнсьыд чужөмбан.  
Мем абу веськодь, кутшөм бөрья юөр  
Войнаяс йылысь ваяс Левитан.

И нинөм бытгьё майшасьнысё эськө,  
Ми тэкөд быдмам, быдмам воысь-во...  
Ме тэнө радейта.  
Мем нинөм абу веськодь.  
И төждыся,  
Мед тэныд лёк оз по.

## КОР ПӨЛЫШТАС ЛУН ТӨВ

*Ириналы*

Кыз ныв дырйи-д,  
Тэ воштылан унтө,  
Кор садьмасны шорьяс,  
Кор пөлыштас лун төв.

Сэзь енэж кодь сөстөм  
Лөз синьясад нюмыд.  
Сэк зэв югид бордыаса  
Овлывлө думыд.

О, кызди ме көсья,  
Мед пыр вөлі тадзи,  
Мед буквыштчөм луньяс  
Тэ нэмыд эн аддзыв.

Но волөны зэрьяс  
И виччысьтөм пужьяс,

А сайодны наысь  
Ме тэнö ог куж на.

Ме вунöдла тэнсьыд  
Став мывкыдтö, буртö  
И бушковтöг, төвтöг  
Кос вой пу моз дзурта.

Дерт, колö мем, колö  
Ён ниаён лоны,  
Мед тэныд, шань кыддзöй,  
Кыз шогö не воны.

Тэ медъёна колан  
И öнi, и бöрын.  
Кор тэ мекöд орччөн,  
И бушков оз пöрöд.

Кор тэ мекöд орччөн,  
И вой төв оз вунды.  
И кажитчö меным,  
Мый пöлясьö лун төв.

## ТЭНÖ КÖ РАДЕЙТЫСЬ ЭМ

Олöмыс овлывлö енэж кодь лöзөн,  
Жугыльтчöм оз көвъясь нэм,  
Пужйысь он кынмы и зэрысь он дöзмы,  
Тэнö кө радейтысь эм.

Окота төлысьöдз, кодзулöдз воны,  
Кодлыкö дзирдавны сэн,

Окота бордъяөн, вынаён лоны,  
Тэнö кө радейтысь эм.

Окота бур йөзлы отсөг ки сетны,  
Сөстөма колльөдны нэм,  
Биысь и ваысь, и из улысь петны,  
Тэнö кө радейтысь эм.

Лун кө нин воас, зэв гудыр и сімыд,  
Муслуныд отсыштас тэн:  
Кокныдджык шудлунтө бергөдны дінад,  
Тэнö кө радейтысь эм.

♥ ♥ ♥

Олөмсыйс ми быдөн корсям мичлун...  
Мөд ногөн и овны-вывны нем.  
Өтияслань мичлун локтө сідзи,  
Мукөдыс сы бөрся вөтчө нэм.

Олөм пужйыс көть и усьлө уна.  
Ме ог личөд мичлун йылысь дум:  
Верма весиг гажтөмтчигөн шуны –  
Воас,  
Воас,  
Воас  
Сэтшөм лун.

Лоас на бур ёргьяскөд бур сёрни,  
Мусаёйкөд лоас кутчысьлөм,  
Аддзыла на алькөс берег дорысь  
Тулыс помын дзоридзалысь льөм.

МИ ВӨЛІМ ПОНӨЛЬЯС КОДЬ ТОМӨСЬ

Ми сэки вөлім понөляс кодь томөсь,  
А сиктын вөлі сымда мича ныв,  
Но сьөлөм косьтысьяслы миян вомысь  
Эз лышкыда зэв петав мелі кыв.

Ми чорзьөдны век зілим небзьөм сьөлөм  
И гыим сэк, кор колө овны чөв.  
Ми мусаяслы лымйөн лыйлам вөлі  
Да алөй банттөг кольлам көса пөв.

И кодлөн вөлі медся мича көса,  
Мед талун оз жө гажтөмтчы да бөрд.  
Көть төрыт сійө эскыны эз көсйы,  
Мый понөлясысь быдмас джуджыд вөр.

\*\*\*

Өд бурдліс нин, но письтіс муслун дейөй,  
И важья серти мөрччана да ёсь:  
Он нетшышт сійөс и он вешты сойөн,  
И ки пыдөсөн тупкыны оз позь.

Оз жалит менө, косявлө и чашйө,  
То пөсьөдлас, то пөльтас көдзыд ру,  
То меным тшөктө повзьөдлыны важсө,  
То вөтөдны, мый некор нин ог су.

Көть ачым лэчкө шедөм тарөн нөйтча,  
И муслунөйлөн пузьөм ваө вөйтча,  
Но ыркыд төвру виччысьны ог кут.

И завидьтыны меным, гашкө, позьö,  
Кöть татшöм муслун дойдалас и водзö,  
Но и оз ков мем дэбыд, кельыд шуд.

♥♥♥

Ме ачымöс тöда: бурыс вежсьö дурөн,  
Кор ыпнитас пöжарөн муслун би.  
И менö, колök, йöйөн шуöй тi,  
Да дивитöй, да катлöдлöй сюсь юрөн,

Мый тöлка мортлөн гудыртчöма вежөр,  
Мый тайöс некод виччысьны эз куж,  
Мый тайö – гожся лунö чорыд пуж  
Да мир туй вылысь зыбуч нюрö кежöм.

Дерт, позьö менö дивитны и ёрны,  
И, гашкө, тöлка лоас тiян сёрни,  
Но ас кежаныд ышловзянныд чöv,

Мый öзьян томлун джуджыд йирö сунис,  
Мый пöся окасьöмныд важөн вунис,  
Мый ме кодь муслун быдөнлөн эз вöv.

♥♥♥

Дерт, сьölöм – йöй, дерт, муслун – синтöм-  
пельтöм,  
А радейтана мортыд енмысь бур.  
И мелi чадөн кольмöдамöй юр,  
И паныд сувтысь вежөрнымöс эльтам.

Мый муса мортсянь кылам – ставыс мыла,  
И дзуг оз дзуг, и веськыд чукля визь.  
Сэк сьёлём пыдди морёсын кө из,  
И сійö небзяс, шоналас да сылас.

Зэв сьöкыд корсьны зонмöс либö нылöс,  
Код радейтчигöн öтчыд көть эз ылав.  
И некодöс ме дивитны ог лысыт –

Ме ачым эскысь-ылавлысьöн вöлі:  
Эз синма-пеля вöв и менам сьёлём,  
Но вöлі мый – ог жалит вояс мысыт.

♥♥♥

Көть здук кежлö, көть ылісянь да гусьöн,  
Ме тэнö көсья аддзывны быд лун:  
Ме öшинь улад лысва войтөн уся,  
Быд лысва войтлөн дзирдыс – менам нюм.

Ме тэ весьтасöd кымöрторйөн лэба,  
Тэ асыввывлань восьсөн öшинь видз:  
Ме жырьяд пыра бобулөн и дзебся  
И юрлöс дорад ланьтöдчыла сідз.

Кор ыркыд лунö шоньд төвру суас,  
Тöд: тайö менам лов шы – абу төв.  
А рытнас лэчча кокни, небыд руөн  
И пельпом вылад пукалышта чöv.

Ме дзикöдз вылö тэнö кө нин вошта,  
Сэк тыртём лоö енма-муа костас.



Көть енмыс абу, но тэ век жö кевмы,  
Мед янсалöмным нюжаліс эз дыр,  
Эн тэрмась шоглөн зыбуч нюрö кевны  
Да гажтöмтчöмлөн тільö тэ эн пыр.

Тэ кевмы, медым янсалöм эз личöд,  
А гөррдзаліс да зэлöдіс на шуд.  
Тэ аскиланьыс ясыд синмөн видзöд  
Да ыджыд лача ичöt киад кут.

Көть талун эськö ышнясьö и дурö,  
Но мян весьтысь гартчысь синтöм турöб  
Оз ылыст тулыс, шондісö оз сай.

И гудыр кадö казытивны эн вунöд,  
Мый тэа-меа паныдасян лунö  
Му вылын ыпйис ясыд нюма май.



Ог шу, мед важсö казытивны эн лысыт тэ,  
Но аслам мөвпöй бөрланьö оз лэб:  
Тэ төрытьясö-кольöмсö эн висьтав –  
И бурсö дзеб, и лёксö пыдö дзеб.

Мед лёкыс-пежыс кыз йи улö пырас  
Да мян олігчöжным оз и сыв,  
Став гудырыс мед сөдзас, вöяс, бырас  
Да öти юöd мянкöд оз кывт.

А бурыс-шаньыс ловья шысö сетас,  
Тэ сöмын эскы, менам муса ань:

Бодз тулысын кө чеччас өзим петас,  
Ар кежлас быдмас зарни шепта нянь.

Но ачым ме ог дзеб, мый вöлі збыль:  
Ме тэкöд орчöн көсья лоны выль.

\*\*\*

Сöдз серöктöмьд – эзысь, быд кыв – зарни,  
Да юсьлөн борд кодь менö кутлысь сыв.  
Тэ сись кодь веськыд пожöмъяслөн ныв  
И вежöдан век öтмоз – төв көть ар нин.

Тэ авья, быттьö Эжва гожся кадö,  
Кор веркөстіыс кывтö енэж рöм,  
Тэ быттьö ластавывса тувсов льöм,  
Мый еджыд биөн ыпнитлывлö татөн.

Тэ тундравывса вөрзьöдлытöм лым кодь,  
Тэ – онялана шоныд, кор ме кынма,  
А пöсяліг да öзийг – ыркыд ру.

Ме чайта, тэнö чужтіс сöмын сійö,  
Код кужис öтны кодзувьяслысь бияс  
Да дзоридзьясөн эжны чужан му.

\*\*\*

Мед югзьöдін, мед повзьöдін сонетös,  
Мед кывбурьяссьым некытчö эн лэб,  
Көть босьт да нимтö рифма пытшкö дзеб,  
Мед сөньясын сöдз вир моз булькйис сэтөн.

Эн элясь вай, эн ышловззы тэ нора,  
Мый нимтö век ог дöжнав и ог доль,  
Но нинöмысь и эндыны ог коль,  
Ог эновт тэнö ваймöм бипур дорö.

Со дзоридз и лым пытшкысь петлö эрдö,  
А ме öд тэнö шонта сьöлöм бердын,  
И мелі нимыд музыка кодь мем.

Ме йöз син водзын кокниа ог чиктыв,  
Но тэнö ошкö сьöлöмлөн быд тiпкöм.  
Тэ ме вылö эн элясь талун, эн.

♥ ♥ ♥

Кор мелі видзöдласыд меным инмис,  
Друг шöйöвоши, полöй сибдiс сэк.  
Эг аддзыв ме, ас нэмын некор эг,  
Сэзь енэж рöма татшöм гырысь синъяс.

Кызд тувсов шондi видзöдлiн ме вылö,  
И синмöс ёрис мелiалысь би.  
Сэк вермис сывны клёнакылысь йи,  
А менам коньöр сьöлöм, дерт жö, сыліс.

Эг гөгөрво, эг казав, мый тэ вöчин,  
Но менам гудыр олöм бара сödзис,  
И бара ланьтiс нёнялана дой.

Ме тэнад синъяс югөр улын ола,  
И налөн чусмöм-кусöмысь ме пола –  
Мем лун югыдыс натöг – пемыд вой.

♥♥♥

Быд мортлөн муслун – ӧтчыд быдмысь  
дзоридз,

И сетсьӧ, кыз и олӧм, ӧти дзик.

И уна вояс вомӧн восьлаліг

Дзик сӧмын ӧтчыд инмас сьӧлӧм дорӧдз.

И инмӧдчӧмсӧ сылысь он нин вунӧд:

Он выльмӧд муслун, паськӧм моз он веж,

Он пышйы сыысь, туй бокӧ он кеж

Ни тулысын, ни букыш арся лунӧ.

И менам муслун – сійӧ сӧмын менам,  
Кӧть сэсся сійӧ йӧзысь бур кӧть лӧк,  
Сэн аслам югыд шуд и пемыд шог,

И олӧмӧйлӧн сюрса лыыс сәні.

Мый уна муслун вермас лоны нэмын,

Ме ачымӧс ог пӧръявлывлы, ог.

♥♥♥

Ой, томлун, томлун – ӧдйӧ колянтор,

Но дыр тай вояс пырыс тӧдчан югыда,

Кӧть уна эскӧм збыльмывлытӧг жугӧдан.

Кӧть быдӧнлы он козьнав вына борд.

Но весиг сыысь аттьӧ, мый эн кывт

Тэ весьшӧрӧ,

Эн кусӧд би кинь-надея.

И весиг сыысь аттьӧ, мый том ныв

Эз менӧ сэки виччысьлы ни радейтлы.

Эз радейтлы...

Но казытылём оз чин –

Он вермы мортлысь дона мөвпъяс

мырддыны.

А гөрддзасылытём муслун восьтлө син,

Мед олёмсө ми дугдём мойдөн лыддыны.

И кольлө ютём медся чөскыд ва,

И сьолём вужйыд нимкодя оз личавлы.

Но гусьоникөн шудсө вөзъя на

Ме буретш сылы –

Судзтёмлы да мичалы.

Выль томлун мөдысь оз нин дзирдышт, оз.

Кор өтдортчыны миянысь – оз юавлы.

Но ас думөн вот өнөдз, сэкся моз

Ме өти өшинь улын век на сулавла.

МИЯН ВОТӨС ПУВ

Мусукөйкөд пувла

Коркө ветлём ми.

Нэм помөдз оз кувлы

Казытылёмлөн би.

Окасьлём вом доръяс .

Өні көть на нюв:

Выйён мавтём коръя

Юмов вотөс пув.

Муслуныдлөн садьмём –

Югыд тувсов лун.

Суас арся кад нин,  
Но и сэк оз вун:  
Нинём сэссия торъя  
Син водзё оз сувт,  
Сёмын шылъыд коръя  
Сьёдгөрд вотёс пув.

Сьёлём абу изйысь,  
Сийё абу көрт –  
Муслуныд кор кисьмас,  
Арся пув кодь гөрд.  
Сьёлёмьяс оз торйёд.  
Курдөдны оз кут  
Во гөгөр веж коръя  
Чөскыд вотёс пув.

Медводдза шань муслун,  
Сё во көть тэ ов,  
Зэръясысь оз куслы,  
Пужъясысь оз пов.  
Лоас донаторйөн,  
Кытчөдз нэм оз сувт  
Лёсталанна коръя  
Парма вотёс пув.

Талун менам синмөй  
Вильыш дзирд оз кой,  
Но кор муслун инмас,  
Бурдтём сийё дой.  
Радейтчөмыд, ёргъяс,  
Му вылын оз кув:  
Пыр тай ловъя коръя  
Миян вотёс пув.

♥♥♥

Друг пемдылас: Му вылө вой шөр усьлө,  
Сьöd шог и лөж, и вир кисьтана кось,  
И лөгалөмлөн гыжйыс лэчыд-ёсь...  
...Но-й на костөд век чепөсьывлө муслун.

♥♥♥

Збыль, муслун нэм чөж нулывлөны кыкөн  
Да кыскөны; кыз верзьёма да вөв.  
Код радейтөджык, став сьökыдсө пыкө,  
И сөмын ньотчыд верзьөмөн оз сөв.

♥♥♥

Со видзөд пө, кыз дзоридзалө льөм,  
Да-й мелі лун төв бергөдчөма татчаньө,  
Да-й нимкодь чужтө ловзьысь вөр-ва рөм,  
Но тэтөг... нинөм ме ог вермы аддыны.

♥♥♥

Менам тулысөй важөн нин колис –  
Юрси гыөртан-пужьялан кад:  
Тэнө вунөдны войдөрлун колис,  
А ме аски на аддывны рад.



Ог вөрзбод кенясьом нин дойяс,  
Ог ворд тэд весиг ичот шог.  
Кор тэныд шонді югөр койө,  
Ме пемыд кымөр моз ог лок.

### ТЭКӨД ОЛӨМ ЛУНЬЯС МЕ ОГ ЁР

Кодыр олөм кывтө шыльыд-мольыда,  
Кодыр лун-вой кольө лөня-долыда,  
Шуда синьяс нюмъялөны кор,  
Тэкөд олөм луньяс ме ог ёр.

Шаньыс-бурыс мыйкө мында мыччысьліс,  
Көть эз ставыс, мый ми тэкөд виччысьлім.  
Но, да олөм сюрөс эз на ор –  
Тэкөд олөм луньяс ме ог ёр.

Овла бур ме, но и овла лёк нога,  
Одвакө ме нэмтө вывті кокньода,  
Но и сэки, скөравлывлан кор,  
Тэкөд олөм луньяс ме ог ёр.

Корлывлім ас вылө ковтөм бушковьяс,  
Асьнымөс ми мыжтөг сетлім чушкавны,  
Но ми бурдам тэкөд водз ли сёр –  
Тэкөд олөм луньяс ме ог ёр.

Дас кык во нин лёка либө лөсьыда  
Нель киён ми өти шудлун лөсьодам,  
Та йылысьсө думыштчыла кор,  
Тэкөд олөм луньяс ме ог ёр.

Важ муслунöйлөн чöскыд дой  
Оз дöжнав вояс пырыс менö,  
Но век жö жаль, мый сетчис венны  
Важ муслунöйлөн чöскыд дой.

Важ муслунöйлөн чöскыд дой  
Оз чужты аски кежлö эскöм,  
Но век жö бергöдлыны эськö  
Важ муслунöйлысь чöскыд дой.

Важ муслунöйлөн чöскыд дой  
Шог-майшасьöмөн коркö вöли,  
Но сэк жö шаньмöдлывліс сьöлöм  
Важ муслунöйлөн чöскыд дой.



*Эм сөмүн тэ*

♥ ♥ ♥

Гөгыльтчис му весьтө  
Төлысь – банийом сөчөн,  
Видзөдлыны эськө,  
Мый тэ өні вөчан?

Гашкө, лампа өзйө,  
А тэ лөня шойччан...  
Кутшөма ме косья  
Лоны тэкөд орччөн!

Вермас лоны, книга  
Кутшөмөскө пыддян,  
Унзиль кокньыдика  
Сывйыштө ме пыдди.

Эськө тшөтш и тэ кө  
Мөвпыштін ме йылысь,  
Шуда гыыс сэки  
Меөдз воас ылысь.

Лолын шоныд ытва.  
Гөгөрвоа өні:  
Весиг татшөм рытьяс  
Тэнө матыстөны.



Кутшом кывъяс меным корсьны,  
Мусмындыжык мед?..  
Сомын – аддза – кор ми орччон,  
Нином наысь тэд.

Чола босьта тэнö сывйö,  
Сёрнияс ог пан,  
Весиг медся мича кывъяс  
Ковтомось дзик тан.

Мед оз артмы немтор шуны  
Шуда здукас мем –  
Чоскыд чов олөмас уна  
Висьталөмыс эм.



Ме весиг отчыдысь эг кывлы,  
Кыз тэ сьылан,  
А, гашкө, тэ –  
Ог төд ме –  
Он и сьыв,  
Но сточа төда,  
И ог таын ылав:  
Тэ ачыл аснад  
Мыла сьыланкыв.

Тэ ставсьыс, кодос төда,  
Медся мича,  
Тэ ставсьыс, кодос төда,  
Медся шань.

Ме тэнсьыд нимтө  
Сьөлөм шөрын видза,  
Тэ менам медбур сыылан,  
Коми ань!

«ОГ...»

Сулалам.  
Он пыр, он пет.  
Өдзөс восьса.  
Өтнад сэни.  
Мыйкө шуала ме тэд,  
Мыйкө вочавидзан меным.

Тайө сёрни – сөмын нок,  
Серөктыштан шмонитөмөн  
И быд вөзйөм вылө – «ог»,  
«Ог» да «ог» и кыла сөмын.

Шуа: «Гажтөм мед эз босыт,  
Ветлам сэтчө, ветлам татчө...»  
Воча нюмъёвтан: «Оз позь...»  
Но и абу паныд, аддза.

Регыд өзйис сьөлөм би –  
Сюрим өта-мөдлы сывйө.  
Тэнад «огъяс» пырыд ми  
Век жө воим өти кывйө.

## «ЗАРНИ ЁЛЬ» РЕСТОРАНЫН

Рытнас локтін ресторанё,  
Ог нин виччысь вөлі скөнъ,  
Карыс гыалё, а тані  
Лөсьыд сы вөсна, мый лөнъ.

Пуксям өта-мөдлы воча,  
Өзтө менө тэнад мич,  
Сөмын жаль, мый вывті шоча  
Тэкөд аддзысьламөй ми.

Мыйкө шуам, мыйкө дзебам,  
Мыйла тадзи артмө пыр?  
Кадыс аддзысьлігад лэбө,  
Но а виччысьөмыс – дыр.

Мыйөдз сёрнианым воим,  
Миян костын коляс мед...  
Аттө, бура юим-сөйим  
«Зарни ёлын»  
Тэ да ме!



Аддзысьлана луньяс,  
Гажтөмалан войяс,  
Дженьыда кө шуны,  
Вуёдлытөм вояс!

Уна бур здук вичмис,  
Өта-мөдлы колім,  
Гуся шудөн мичмис  
Миян тэкөд олөм.

Вояс тэрмасьоны,  
Ыліас ог видзод,  
Вөвлөмасө өні  
Сьөлөманым видзам.



Тэ менам сыылан,  
Менам мойд,  
Тэ шонді югөрьяса асыв.  
Ен аддзө:  
Тэнө ме ог дойд,  
Өд лёксө вөчи эськө аслым.

Ен аддзө:  
Ышмывлам ми-вок,  
Друг шыбөльтас и туйсьыс кежа,  
Но юрө весиг мөвп оз во,  
Мый тэнө код вылө кө вежа.

Кузь стихөн дөзмөдны ог кут,  
Ме сөмын кыв-мөд содта татчө:  
Тэ менам олөм,  
Менам шуд...  
И, чайта,  
Енмыс тайөс аддзө.

♥♥♥

Тайё аньыс, коді муса,  
Абу менам...  
Сөмын кыдзи ышмөм сьөлөмөс ме вена?  
Медым, аддзысиг, не сёйны сійөс синмөн,  
Мед и ачыс синнас пыдіөдз эз инмы.  
Ог куж шуны өні, кыдзи тайё лоис,  
Мый мем сьөлөм вылө та выяөдз воис.  
И кор шмоньөн шулі коркө өттор-мөдтор,  
Мыйла менө сійө пырысь-пыр эз өтдорт?  
Йиджис меө сылөн авьялуныс, нюмыс  
Да и водзө вылө гөгөрвотөм думыс.  
Со и ветла вошөм юрөн стенысь стенө:  
Тайё аньыс, коді муса,  
Абу менам.

♥♥♥

Төрыт волім өти кывйө,  
Рытнас аддзысьлыны мед,  
Көсйи босьтны шоныд сывйө,  
Бур мед лои мем и тэд.

Сөмын нинөмыс эз артмы,  
Бара кокышти ме кыш.  
Ньөжйө довга рытъя карті,  
Весиг мөвпавнысө дыш.

Дзоргис чөла кельыд төлысь,  
Раммис ылөдөмсьыс лов,  
Сэки гөгөрвои вөлись:  
Тэд ог ков.



Бушков  
Уси быттьö кыськö вылысь,  
Миян костын  
Жугліс ставсö скöнь.  
Сэсса лои чуймöдана лöнь.  
Мый нö...  
Бурсö тэчны  
Панам выльысь.



Наян асланыд да ёсь,  
Но и шуны позьтöм мича,  
Помöдз воссъыны оз позь –  
Тэ водзын öд сöмын личав.  
Пыр и кыян, ворсігмоз,  
Ставнад вильыш руөн öзьян,  
Сэсса, лöсялö көть оз,  
Пөттöдз шуасян, мый көсьян.  
Ышловзыла сöмын: Э-эк!..  
Важөн тöда тэнсьыд рутö,  
Бара юрö волö сэк:  
Мый пö миянöс и кутö?..

♥♥♥

Ме важөн тэ дорё эг волы  
И збыльысь нинёмтор ог төд,  
Кызд тайё кольём кадсё олин  
И кутшөм радлунъясөн пөт.

Дерт, шонді миянлы эз куслы,  
Тэ, ме моз, төждлунъясөн тыр,  
Но век на ловъя, вёлём, чувство,  
И весиг вежөктөм эз быр.

♥♥♥

Ак, кутшөм овлан ме вылө тэ скөр!–  
Эн вөрөд сэки тэнө  
И эн сёрнит,  
Но олөмсыйд он вөтлы, сьөлөмшөр,  
Өд өтдортчыны ёрта-ёртысь  
Сёр нин.

Эз вөвлы муса та выяөдз мөд,  
Ме аддзи шудөс тэнө радейтөмын,  
И талун кежлө ачым нин ог төд:  
Көн унджык ме – ас пытшкын али тэын.

А скөр кө, таысь мыжа тшөтш и ме,  
Мый дзугсян кадө йитан пос эг лөсьөд,  
И талун кора: бергөд рутө,  
Мед  
Кык сьөлөм вылын бара лои лөсьыд.

♥♥♥

Ми лөгасьлам,  
Ог шуткаён,  
А збыльысь,  
И орлө  
Весиг бөрья йитысь вез.  
Но бурасям да  
Казяламой выльысь:  
Ми лөгасьлим,  
А сьёлөмъясным – эз.

♥♥♥

Тэ шуин:– Миян костын ставыс,  
И водзё нинөм нин оз ло.  
Эг чайтлы ме, мый буретш таво  
Ён бордьяс ассыс воштас лов.

А кыз нө тэтөг овны кута?  
А кыз нө вунас кольөм кад?  
Öд тэ и вөлін менам шудыс,  
Öд тэд и вөлі сөмын рад.

Но, со тай, олан ладыс быри  
И юрад öнi оз во тэд,  
Мый вөртас сайö шондi пырис  
И сэсса бөрсö оз нин пет.

Вуж выйөн вежсяс менам олөм,  
Но сийö тэ вөсна оз ор.  
Тэ коркө важас думнад волан  
Да сөмын зэв нин лоö сёр.



Тэ кужан ӧзтыны и кӧдзӧдны,  
Тэ кийн пессьӧ менам шуд,  
Тэ кывъяс сідзи кужан сӧдзӧдны,  
Мый гӧгӧр ставыс лолӧ руд.

Збыль могъяс тӧдчанлунсӧ воштӧны,  
И ачым лола вошӧм морт,  
Ме тӧда, тайӧ абу ошкана,  
Но усьлӧ кыпыдлунлӧн борд.

И жуглӧ мыйся вын – он гӧгӧрво,  
И гартӧ тыдавтӧм ён вез.  
Ме эськӧ ылі тәнӧ гӧгӧртӧ,  
Да ачым ог корсь тэысь мезд.

### ЗЭРА ЛУНӦ...

Эм сӧмын тэ,  
Эм сӧмын ме,  
И ӧшинь сайын зэра луныс.  
Мый татшӧм здукас тэныд шуны,  
Став радейтӧмӧй йиджис мед?

Кор синъяс матынӧсь нин зэв,  
Кор лов шы тэнад сотӧ менӧ,  
И мирыс орӧ керка стенӧн,  
А енэж йирыс – керка вевт.

Кор збыльӧн лоны позьтӧм мойд  
Друг лӧня пуксьӧ небыд киӧ.  
И мый ме аслым нӧшта сия,  
Кор кутӧ тәнӧ менам сой?

Тэ менам... Шуны тадз ог пов.  
Кык сьолём тіпкёны, кызд өти.  
Ог талун яндысь тэысь ньёти,  
Өд тан ми тэкөд – өти пов.

\*\*\*

Ак, тэнад нюмыд – кокни нюмыд,  
И еджыд яйыд – чёскыд нөк,  
Кор кыкөн тэкөд ми, он шу мый  
Быд лунся оласногыд стрөг.

А тайё сідзи, збыльысь сідзи –  
Крут кывйыд быттьё октём лэч.  
Но нюмтё вомдорьясад видзан  
И тёда: ас дорсьыд он лэдз.

Да ме и ачым шуны көсья,  
Мый некор тэ дорысь ог мун,  
Өд сөмын тэ дорын и өзья,  
И вошта ассьым узян ун.

Ог пов, мый коркё тэысь ума,  
Быд лун тэ аслад мичён выль.  
Ак, тэнад нюмыд – кокни нюмыд  
Став лёксьыс видзё менё збыль.

## ВОСЬТӨМ

Кор он эскы мем, и скөр,  
Лөсялөмным кодыр орө,  
Сэки, менам сьөлөмшөр,  
Орчөн чөв олыштам, кора.

Он нин надейтчы, но друг  
(Тайөс водзвыв сьökыд төдны),  
Бытьөн воас шуда здук:  
Нюммунамой өта-мөдлы.

Кыкөн. Орчөн. Олөм чөж.  
Мөд ног оз и вермы лоны.  
Менам татшөм ыджыд төжд:  
Тэнө радейта ме ёна.

Олөм гыяс костас век  
Бытьё өта-мөдөс корсям...  
Медся шудаёсь ми сэк,  
Кодыр коставлытөг орчөн.

\*\*\*

Тэысь бокын –  
Тэкөд век,  
Ылнаыс оз тэнө сайөд,  
Овлө, судзтөминөдз вайө  
Өзьян кыпыдлунөй сэк.

Гашкө, нинөм ог и шу,  
Коркө мөдысь лoa варов,  
Вежөктөмьястө эн гарав,  
Мед эз пышйы полысь шуд.

Бокö вешты ассъыд төжд,  
Чөвлунсö вай шөри юкам.  
Мый эм бурджык татшөм здукысь?–  
Нинөм!  
Корсь көть олөм чөж.



Мунін тэ,  
И менö пыр жö босьтис шог,  
Некод сэсса меным оз шу  
«Эн» да «ог».  
Коді вильшасяс тадз мөд,  
Ме ог аддзы и ог төд,  
Весиг луньюгыдыс лои меным съөд.

Крука сёрниясөн некод нин оз йөрт,  
Веськодпырысь менö кывзöны,  
Көть бөрд.  
Быттьö некодлы ог ков,  
Ноко, видлы тадзнад, ов,  
Көн тэ, менам шоныд сетысь  
Ловья лов?

Төда, төда, регыд воан татчö бөр,  
Тэнö топыда зэв кутла, сьөлөмшөр,  
И мый көсьян – сійөс шу,  
Ме ог кыпөд зык да шум,  
Видза хрустальысь на жулпысына  
Шуд.



Кор ме тэнö сывйышта  
Топыда и пöся,  
Менам öзйöм йидждысяс  
Пыдидз и тэд.  
Вöвлытöма лои мед  
Кыкнаннымлы лöсьыд,  
Тэнö пöттöдз окавны  
Вöля меным сет.

Мöдысь вылö надея  
Ас пытшкад эн песты –  
Кор на лоас татшöмыс,  
Öнъяыс,  
Мый эм...  
Радейтчигөн, мусай,  
Сьөлöмыдлы эскы:  
Сöмын шуда здукъясысь  
Артмö шуда нэм.

### ЗЭР УЛЫН МÖВПЪЯС

Сыктыв весьтын эзысь зэр,  
А тэ мясянь бара ылын.  
Лэбзя төвру бордъяс вылын,  
Шуа: Гажтöмтчи ме зэв.

Чайта, шензыны он кут,  
Радейтчöмад быдтор овлö,  
Нинöм дивöясысь повны,  
Медшөр дивöыс öд – шуд.

Мекөд олан гажсө юк,  
Аскөд лэбовтлыны кора  
Быльён чөвтөм зорөд дорө,  
Аддзам пытшкас номер «Люкс».

Бошас ывлаыслөн сер,  
Кыклөн лов шы сөмын кылө,  
И мед помтөг ассьыс сьылө  
Сыктыв весьтын эзысь зэр.

♥♥♥

Ак, менам му выв югыд кодзув,  
Эн ло ме дорө стрөг и скөр,  
Өд кадыс өдйө лэбө водзө  
И здук кезлө оз кослы бөр.

А тэныд быттьө оз и инмы,  
Мый мян абу помтөм нэм,  
Но видзөдлам на, кутшөм синмөн  
Дыр мысти петкөдчылан мем.

Ми важсө казтылам сэк ёна,  
Кыз быттьө пöрысьлун эз таль,  
И мыйкө лоө друг зэв дона,  
А мыйкө – синва петтөдз жаль.

♥♥♥

Тэныд коді ме?–  
Ог төд:  
Абу верөс,  
Абу мусук,  
Абу матыс-ылыс рөд,  
А со лөсялөм оз чусав.

Мый көть гөгөр  
Ыджыд мир,  
Орччөнөсь мед вөлім дыр на,  
Өд кор янасынөсь ми,  
Быдса мирыс сэк оз тырмы.

Оланногнымөс ог кут  
Торкны восьсөн, либө гусьөн,  
Сөмын төда: менам шуд  
Важөн тэнад нимөн шусьө.

♥♥♥

Ме тэнсьыд видзөда альбом,  
Тэ сэні мичаник  
И том,  
Но меным мусаён тэ лоин, – ояныа А  
Кор өнъя арпыдөдзыд воин.

Дерт, тулыс –  
Волөн мича кад,  
Но меным сьөлөм серти гожөм,  
Кор дзоридз синьяс водзысь вошө,  
И кыскө мөдторйөн лөнь сад.

♥♥♥

Миян костысь тулыс вешйис бөрө,  
Мый эм, весиг гожмөн он шу,  
Но тэ лөня шуин меным төрыт,  
Мый нэм кезлө коли ыджыд шуд.

Сійө быттьө джуджыд, югыд керка,  
Көні поздысьома кыпыдлун.  
Томлунтө, дерт, он нин некор бергөд,  
Но өд сійө сьөлөмысь эз мун.

Та вөсна и шогавны ог пондөй,  
Выль ног вощьо олөмыслөн мич,  
Тадзи весиг ыркыд кадө шонтө  
Аспас повья дзоридзьясөн видз.

Өта-мөдөс радейтам ми ёна,  
Мичмөдамөй тайөн олан нэм,  
Коді, кымын водзө – сымын дона,  
Олөмыс өд – радейтөм и эм.



*Тэ кытысь нывбабаыс сэтшöмыс*

♥♥♥

Быд мортлөн кодзув аслас эм –  
Тадз шулывлöны йöзыс.  
И кöнкö енэж вылас сэн  
Бур шудыс сылөн öзйö.

Оз кыскы менö енэж выв,  
Ог виччысь сэсянь водзöс.  
Эм менам радейтана ныв,  
Кыз медся югыд кодзув.

Ёль дорын

Енэж вывсянь дзоргис тöлысь-чарла,  
Изъяс костöд сяльöдчис сöдз ёль.  
Миянöс жö дзевис пöрысь парма,  
Шуин сöмын меным тэ: – Эн коль...

Шуднымöс эз вермы йитны войыс,  
Колльöдчöмыс бара вöчис дой.  
Тэрыб ёль сöдз васö резис-койис,  
Весиг синлыс вылад öшйис войт.

Куим ар эг кыв ме ёльлысь дзольгём,  
Волін отнад сэтчө куим во...  
Мыйла öнi кывзан йöзлысь больгём?  
Ва моз öмöй визувтiс любов?

♥♥♥

Гашкө, сыысь и коз пуыс веськыдөн кайö –  
Сылысь мичлунсö видзö ёсь емьяслөн тшöть.  
Гашкө, сыысь и мусаджык нылыс мем тайö,  
Мый и нюмъявны кужö, и лөгавны тшöтш.

♥♥♥

Тэ кытысь нывбабаыс сэтшöмыс?–  
Пыр кисьтан көлөкөльчик гор.  
Ме чайта, усян кө тэ петшөрö,  
И то оз серам тэнад ор.

Пинь саяд дзедбан ассьыд шогъястö  
И гора ваксыны он пов.  
Пель саяд колян ассьыд могъястö,  
Вой синмад вöйтöмыд любов.

Тэ дорын быттьökö ме праздникын,  
Став керка быттьö паськыд эрд,  
Тшöтш менсьым серам гөрöd разьны кө,  
Ми шуда челядь вöлим дерт.  
Но сiдз нин тэ дорын ме томма век,  
Кöть весиг синкымöй нин дзор.

Тэ водзын ме век быттьö зонмала,  
Кызд первой аддзысим тай кор.

Во дас-ö, кызь-ö коли сэсянь нин,  
Код төдас, збыль-ö, абу збыль.

Эм нылыс-зонмыс тэа-месянь нин,  
И луныс локтö выльысь-выль.

А тэнö төда вывтi этша на,  
Кöть нюмысь синъяс пытшкад сун.

Тэ кытысь нывбабаыс сэтшöмыс  
Мен усин, татшöм озырлун?

\*\*\*

Помнитан, кызд виньдiс кöккыд,  
Кор ме вояс пыдди?

Вöли торйöдчыны сьöккыд –  
Ставсö пуктi пыдди.

Весиг быттьö сувтiс сьöллöм  
Тэнад шоныд сывйын.

Мортлөн шудлуныс тай вöллöм  
Абу кöклөн кывйын.

\*\*\*

Кор тэнсьыд китö босьта аслам киö,  
Сэк быттьö вуджас сöнысь сөнö вир.

Став лолöй быттьö пыралас сэк биö,  
Син водзын вежсьö ставнас олан мир.

Кызд быттьö асыв сувтö Коми муö,

Быд баддын дзольгö-сьылö колипкай.  
Став лёксö быттьö дзебас кодкö гуö.  
И весиг кымör аддзö дзебсян сай.  
Кор тэнсьыд китö босьта аслам киö,  
Дворецöн кажитчылö мяян олан чом.  
Пöсь кийд тэнад шог и мудзлун виö,  
И тэ сэк том, и ачым важкодь том.

♥♥♥

«Ме тэнö радейта»,—  
Зэв кокни куим кыв,  
но кутшöм сьöкыд

ötчыд найöс шуны,  
Кор тэныд мусмис первойысь  
том ныв,

Кор вирыд кутис пöртйын  
сир моз пуны.

Ме тэнö радейта.  
И сы вöсна ог лысьт,  
Вир-яйöс сотысь мортöй  
ötчыд шуны.

Век меным кажитчö:  
Сэк муслун лоö кысь,  
Кор сьöлöм пытшкын  
нинöм лоö нуны.

«Ме тэнö радейта»,—  
Зэв кокни куим кыв.  
Но кымын во  
ог лысьт ме сийöс шуны.  
И сыысь ачым  
век на быттьö том,  
Мый ассьым тайна  
ог сет аслым гуны.





Ме тэнö виччысьлі,  
Кыдз колип асья шонді.  
Тэ менö колльöдлін,  
Кыдз ичöt нылöс бать.  
А гусьөн, полігтыр  
Кор окавлыны пондін,  
Тэ менö шонтылін,  
Кыдз сэтөр тусьöс бадь.  
Ме тэнö радейті,  
Тэ быттьökö тай тожö.  
Тадз мөдлы шудыс быттьökö  
Оз усь.  
Но мунін тэ...  
Тадз пышйö арысь гожом,  
И пасьтөм чалпын  
Кынмö сэтөр тусь.



Бара тэ йылысь ме сыла,  
Дона мортöй, шондібан.  
Бара томлунöс ме кыла –  
Ворсö клуб дорын баян...

Кутшөм вын нö кыскö менö  
Тэ дорö со кымын во?  
Мыйла радейта ме тэнö,  
Өнөдз ог и гөгөрво.



Али мукöд тэысь мича,  
Али мукöд тэысь шань?  
Али карса паськөм видзан,  
Коми сиктса коми ань?  
Мыйла тэкöд менам сьöлөм,  
Мыйла тэлань менам син?  
Тувсов дзоридзөн тэ вöлөм,  
Кор ми тэкöд аддзысим.



Эм коми ань.  
Сьöд вадъяс сылөн эмось.  
Ме наö вöйи –  
пöдi-ö, эг пöд...  
Эм коми ань.  
Оз мыччы ки,  
ог кевмысь.  
Оз радейт кö,  
мед оз и радейт мöд.

## МИ – СЭТШӨМӨСЬ

*«Миян зоньяс весиг китö оз окавны»  
(Коми нывлөн сёрниысь)*

Да, ми сэтшöмöсь:  
Аньлысь кисö огö окалöй,  
Олам-вылам важ моз сэтöнöсь,  
Кытöн кырныш уль яй кокалö;

Да, ми чорзöм киöн малыштам  
Муса аньлысь небыд чужöмсö,  
Да, ми окасьны век польштам,  
Дзебам тöдöмсö и кужöмсö;

Коркö ковтöм кывйöн дойдыштам  
Муса аньяснымлысь сьöлöмсö,  
Нинöм абусö на мойдыштам,  
Вöлöмсö и абу вöлöмсö.

Кодкö шуас: «Коми – кöдзыдöсь,  
Кывныс вомас öдва пышъялö».  
А ме васö юны сöдзöда,  
А ме йöвсö юны сысьяла.

Сидз и олöм вылас видзöда,  
Видза ойдöмьясысь муслунöс,  
Сотчысь сьöлöмöс век кöдзöда,  
Но ог лэдзлы бисö куслыны.



*Тайо ыджыд му вылас*

ПРАЗДНИК

Тэныд воча нуис менö туйыс,  
Нуис менö кодзув динö моз,  
Тэкöд менö вочаöдис тулыс,  
Бöрсö оз нин янсöд сийö, оз.

Быттьö менö лэптін выпö-вылö,  
Нюмъевтін, сьöд синмай, тэ кор.  
Ковтöмторйыс сьöлöм вылысь сылö,  
Радейтнытö некор абу сёр.

Вөр-ва шыыс пырис менам лолö –  
Лёксö вöтлысь медся сöстöм шы.  
Мед нö мян пытшкöсаным олö  
Тулыслөн да радейтöмлөн гы.

Тэрыб бордъя вояс лэбовтöны,  
И дзик быдөн кольö ассьыс пас,  
Налы паныд орччөн мунам öнi:  
Мен тэ ас, и ме тэн лои ас.



Чышъян помтö кисьыд нетшкö тöлыс,  
Сöмын сийö кызди кöть оз дур,—  
Аддза тэнö. Кыла тэнсьыд гөлöс.  
Мен и тэныд – кыкнаннымлы бур.

Восьса синмөн аскисьыс не повны,  
Восьса сьөлöмысь оз кусав би,  
Кызд нö öта-мөдтөг вермим овны,  
Талунöдз эг вочаасьлöй ми?



Тэнад öшиньыд рытивбыд восьса,  
Ачылд том, ачылд шань тэ, пыр сьылан.  
Быттьö рамаö босьтöм портретын –  
Öшинь дорас тэ тулыскöд воча.

Тэкöд тулысыс, төдöмысь, ладмö:  
Берин чутъяс со бандзибад ляскөм.  
Сьыв, эн яндысь, öд шогысь оз сьывсьы,  
Шудылд көнкö öд тан жö, ас грездын.

Зарни көсатö чушь помад гартан –  
Дона көсатö чушь помсьыд разян.  
Ланьтлан сутш, лөвтö тэрмасьтөг вежан,  
Тувсов гы моз сэк морöсыд лыблö.

Мыйкö гусятор синьясад төдчö:  
Лолан зумыш – и нюммуна бара.  
Асшөр тулысыд, тыдалö, воис –  
Сийö öтчылд да пыр кежлö волö.

\*\*\*

Мый миян костын вөлі и мый лоё,  
Оз, миян кындзи, некод сэсса төд.  
И весиг төдса кыз пу гөгөрвоё,  
Мый ме моз тэнё тан оз радейт мөд.

Но ме и татшөм көсйөмөн тшөтш ола –  
И тайё тэнё пыдди пуктан пас –  
Мед тэд и мөд зон козыналас, кор колё,  
Бур синма, менам кодь жё, видзөдлас...

\*\*\*

*А.Г-лы*

Тайё ыджыд му вылас, көн ола,  
Кыз пу кор сентябрыс бара гылөдө.  
Вонас өтчыд арыс, Тося, волё,  
Гожөмсө моз томлуннымөс кылөдө.

Тайё ыджыд му вылас, көн ола,  
Коркө эгө төдлөй өта-мөднымөс.  
Кымын вөлі миян костын тола!  
Кымын видз выв дзоридзьяснас  
Мөвкйөдліс!

Тайё ыджыд му вылас, көн ола,  
Кызкө тай нө сямми тэкөд вочасьны.  
Төдлытөм на ру сэк пырис полё,  
Сьөлөмөн и кыв-ворнам мед рочасьны.

Тайё ыджыд му вылас, көн ола,  
Сьөлөм туйяс йитім өти гөрөдөн.  
Мед сэсса сентябрыс мыйта колё  
Ышмөмвывсьыс төдса кызсө дзөрөдө.

♥♥♥

Ваксян-сералан, шмонита кор;  
Менам радлунлы воча тэ радлан.  
Тэнад, том аньой, серамлөн гор  
Бара тувсовъя пармакөд ладмө.

Кокни тэныд сэк, кокни и мен,  
Быттьö ставыс сэк мунö, кыз колö.  
Но эн вунöд, сьöд синмай, эн,  
Мый и шогыс на миянö волö.

Мен кө виччысьтөг лоö зэв лёк,  
Мен кө олöмыс мыччөдлас гугсö,  
Шонтысь кывйөн сэк он öмöй лок?  
Менсьым шоглунöс он öмöй юк сэк?

Метог сьедьбамс ызгнс колалс.  
Гун ээ тырми да, нощла вой.

♥♥♥

И берегö, и сьөлөмö  
Садьмöm гыыс кучкис.  
Ми тэкöд пыжö сөлимö –  
Кыкнад кывтны лючки.

Ог öкмыс ва да му сайö –  
Быдөнлы ог шуö,–  
Но, кытчö колö, мусай,  
Кывтам тувсов юöd.

Кык берег. И ми кыкөнöсь.  
Сöмын юыс öти.  
А мукöд ныв-зон кытөнöсь –  
Веськодь меным öни.

Öд тэ да ме – ми өтнаным.

Тэд и мен со долыд.

Öд тэ да ме – ми өтпайн.

Шогыс мед оз волы!

А эсийö веж вөр дıыс

Юасьны мөй кутас,

Тэ кыасьыс-ö гөрдөдін

Лиbö аспад шудысь?



*Шонді бана тулысьяс  
чужан муо волоны*

\*\*\*

Жоньыс пелысьсö кушöдз кокаліс,  
Ньöти абу нин биа моль.  
Коркö пöттöдзым тэнö окавлі,  
Талун нинöмыс мен эз коль.

Метöг свадьбаыс ызгис-кодаліс,  
Лун эз тырмы да, нöшта вой.  
Ылын локнысö вöлі подады,  
Пöжны кольöма сöмын дой.

Вина пыдöссö эськö кисьтöны,  
Да оз примит тай ньöти лов.  
Кöсийи эськö на мыйкö висьтавыны,  
Да оз, буракö, нинöм ков.

Жоньыс пелысьсö кушöдз кокаліс,  
Ньöти абу нин биа моль.  
Коркö пöттöдзым тэнö окавлі,  
Талун нинöмыс мен эз коль.

♥♥♥

Коръяс окасьмөн сөмын төлалө,  
Банйө рытылын вөр-пу йыв.  
Ок и лөсьыда гудөк чөлалө,  
Ок и лөсьыда сьылө ныв.

Сиктсьыс мунсьөма бура ылө нин,  
Тэкөд танъясын эг на-й вөв.  
Мед и ворсөны, мед и сьылөны,  
А ми сулыштам тэкөд чөв.

Көка лэбулас эзысь кисьтөма,  
Регыд зарниөн письтас сэт.  
Мыйкө тэныд ме талун висьтала,  
Мыйкө висьтала сөмын тэд.

♥♥♥

Бара на рытыс зарни кисьтис,  
Меным ни тэныд көть оз ков.  
Кытчөкө бара мунны письтім,  
Кытчөкө нуө ышмөм лов.

Бөрья ме кывьяс тэныд шуны,  
Кутшөмөс шуны, ог на төд.  
Кытчө нө эськө тэкөд мунам –  
Юыс и ваыс дзик тай мөд?

Рытыслөн мичлун йылысь доля,  
Збыльысь өд гажа ывла выв.  
Шутөг на, сідзкө, мед и коляс  
Меным и тэныд төдса кыв.

## КОРӖСЬ

Талун петі гортысь кильчӖ вылӧ,  
Кодкӧ вӧлі лӧсьыда зэв сьылӧ.  
Муні сэтчӧ нинӧм вӧчӧм дорысь –  
Ӧти ичмонь тэчӧ вӧлі корӖсь.

Мися, мый нӧ, мича нылӧй, вӧчан?  
Шуис збоя: керала пӧ кӧчан.  
Мися, меным, сідзкӧ, тшӧтш жӧ керав,  
Аслам петіс нылыслӧн моз серам.  
Тэнсьыд юртӧ керавны пӧ колӧ,  
Шуис тадз, а меным вӧлі долыд.

Бура дыр ме, нинӧм вӧчӧм дорысь,  
Тэчи ськӧд лапгья пеля корӖсь.  
Этша меным, вӧлӧмкӧ, и колӧ,  
Медым овны колипасян лолӧн.

## КЫДЗИ СӚ ВОСАЙСА ЮЛЫН

Кыдзи сӚ восайса юлыс шӧрын,  
Тӧчилатӧ бергӧдлыштӧм бӧрын  
Митрей Иван керка сайӧ волы,  
Куим здук кӧть морӧс вылам олышт.  
Висьтав меным, кыдзи коли луныс,  
Эз-ӧ мыйкӧ батыд-мамыд шуны?  
Быть-ӧ налы висьтавнысӧ колӧ,  
Кытчӧ, вонйӧ пырӧм пыдди, волан?

Зарнианӧй, волы, шылькнит юрӧс  
Да мен шу, мый тайӧ-й вӧлі бурыс.



Некор некодлы ог висьтав,  
Ачым төда кө и – бур,  
Кызди сэки, зэр тай кисьтис,  
Зорөд улө дзебим юр.

Пышйим йөзсьыс бура ылө,  
Виддзыс кулигаа көн.  
Весиг зэрөмсө эг кылөй,  
Өттор-мөдтор вөчигөн.

Муртса-муртса школа бөрын,  
Но и ладнө, но и мед...  
Тэнө казтылі ме төрыт,  
Менө казтылан жө, дерт.

## КЫНМӨМ ПЕЛЫСЬ

Кынмөм пелысьсө сөйи да сөйи,  
Көть и джагыдөн вөлі гөрд роз.  
Көн нин зарава вийөдан войыс,  
А со шогөдіс төрытъя моз.

Садьөс воштi да челядь моз дури,  
Медтө вөлі көть неуна том.  
Кынмөм пелысьыс абу пө курыд,  
А со дзикөдз нин шоммөдіс вом.

Ачым артала, дона ли донтөм  
Вөлі вежөрөс путкыльтан сыв.  
Кынмөм пелысьлөн биыс оз шонты,  
Весиг гөгөрсьыс лымйыс оз сыв.

## ОЗ ГУДӨК ВОРС...

Оз гудөк ворс, а брунөдчө гитара,  
Аккордыс муртса артмыштө – и то.  
И мыйла кысыкө тэнө корси бара,  
Ог некыз талун ачым гөгөрво.

Сэк дзик жө тадзи брунөдчис гитара,  
Кор рытсө пуким окыштчалігмоз.  
Ми сөмын вөлім Сыктыв бокса карас  
Да нөшта чөскыд «Варна» тыра доз.

Да, сэки вөлі брунөдчө гитара,  
Студент ли, код ли песіс, көнкө, чунь...  
Эн шуав нинөм, кольөмсө эн гарав,  
А сөмын, кызди сэки, синтө кунь.

## КЫЗЬ ВОСЬКОВ

И бара на аддзи да кылі,  
Кор вотчинныд Көдзыд шор раскын,  
Кыз шуис лөз вом дора нылөй,  
Мый воланныд татчө и аски.

«И аскомысь,– шуин тэ,– волам,  
Тэ радейтан чөдсө тай йөлөн...»  
Ме польштны пу сайын полі,  
Көть кызь кымын воськолыд вөлі.

И рассыс ті петінныд мыйөн,  
Ме нитш вылас кымыньөн воді.  
Эм верөс, код кыйө и лыйө,  
А ме эськө тиянлы коді?



Мөдлөн лоин да, аддзысьлам шоча,  
Но и та вылө вывті ме рад.  
Вай жө пуксьылам бара ми воча,  
Вай жө олыштам ассъыным кад.

Вай жө синъяснад нюмдыштлы бара,  
Бара йөйөн ли, мыйөн ли шу.  
Ме на тэнад и Енмыс, и царыс,  
Мед и кок улын бергөдчас му.

Кодлы кутшөм нө миянөдз делө?  
Коді төдө, мый позьө да оз?  
Медтө вөлін тэ татшөм жө смелөн,  
Медтө радейтін өнія моз.

## ЛЬӨМ ТУСЬ СИНМА МУСУК

Менам вөлі мусук льөм тусь синма,  
Кутшөм нимыс, некодлы ог висьтав.  
Кута вөлі матыстчыны дінас,  
Быттьө чөскыд өмидз дінө письта.

Сійө платтьө кокчөрйөдзыс новліс –  
Еджыд чутьяс лөзов ситеч вылын.  
И кор сылөн кыпыд вөлі лолыс,  
Өттор-мөдтор лөсьыдика сьыліс.

Коркө мамыс окасигөн суис,  
Абу сэки пукавсьөма чөла.  
Коркө сэсся батьыс меным шуис:  
Мед пө, пиө, гөтрасьөма вөлі.

Тулыс вöли, шондi дзирдсö койис,  
Классö пырны гора тiльгун корис.  
Вийөр борд моз öвтыштчисны вояс,  
Но öд кылö öмидза вом дорыс.

### ТЭ ТАЙ МЕНЫМ МУСА ЛОИН

Арся ванас вель на öда  
Сэтөр дзуөн тырём ёль.  
Сöмын тэа-меа тöдам,  
Сэтөр розъяс кымын моль.

Сьökыд вожйыс мулань нёрö,  
Но оз дозным мяян тыр.  
Матыстчылан керка дорö  
Да мый пытшкөдзыс он пыр?

Буретш вотчынысö воим –  
Оз на киссый, абу-й кын.  
Тэ тай меным муса лоин,  
Он нин окыштöмнад мын.

Сöмын тэа-меа тöдам,  
Сэтөр розъяс кымын моль.  
Вай жö гортлань сэсса мöдам,  
Эз кө вöрас нинöм коль.

## ТАЙӦ ЗОНМЫС МУСА ВӦЛІ

Лэбӧ юсь, да абу сылӧн пӧлыс,  
Шоныд муас воас ли оз во.  
Тайӧ зонмыс муса эськӧ вӧлі,  
Да эз менам мыйлакӧ тай ло.

Меным сыысь мичаджык на сюрас,  
Оз на вайны ылі муысь ков.  
Колӧ сӧмын окыштлыны бура,  
Колӧ сӧмын ышмӧдлыны лов.

Часлы, коркӧ лымйыс быть ӧд сылас,  
Оз и нэмыс жугӧд сьӧлӧм дой.  
Часлы, коркӧ гудӧкыс на кылас,  
Оз на метӧг гажъяв тувсов вой.

Кузь да кӧдзыд вӧлі тайӧ тӧлыс,  
Мед жӧ мӧдысь татшӧмыс оз во.  
Тайӧ зонмыс медся муса вӧлі,  
Сыысь муса некод нин оз ло.



Зэв тай ӧдйӧ арыс воис,  
Плавгис пельпом вылӧ шаль.  
Мыйкӧ гажтӧм меным лоис,  
Кольӧм томлунӧй зэв жаль.

Кельдіс менам пӧлӧзнича,  
Пемдіс менам тувсов вой.  
А ӧд вӧлі вель жӧ мича,  
А ӧд вӧлі вель жӧ збой.

Öти зон тай паныд лоис,  
Паныд лоис да эз кеж.  
Сьөлөм ылө ёна воис,  
Некод ылө эг и веж.

Зэв тай өдийө арыс воис,  
Плавгис пельпом ылө шаль.  
Этша гажөдчөма лоис –  
Тайө меным медся жаль.

### ЧӨСКЫД ÖМИДЗ

Чөскыд өмидзсө быдөн вотө,  
Шома ыжмансө – некод оз.  
Сөмын тэ вөсна сьөлөм потө,  
Кытчө саялін шонді моз?

Вала туй бокын пөлөзнича  
Лөзөн вөлі да лоис блед.  
Кодлы эськө нө асьтө видзан?  
Эз жө ылөдны тэнө мед.

Ю дор пөлөнсө йиөн дорис,  
Көть и көдзавліс өти лун.  
Пасьтөм кыз улас эськө корин,  
Да өд, буракө, ог нин мун.

Гөгөр еджыд, а синмөс сотө  
Кынмөм пелысьлөн биа роз.  
Чөскыд өмидзсө быдөн вотө,  
Шома ыжмансө – некод оз.

КЫТЧӨ НӨ ТЭ ВИДЗӨДАН?

Окасьоны гөлубьяс,  
Ми нө мыйла ог?  
Ставыс бур на вөлі да,  
Мыйысь тэныд шог?

Кытчө нө тэ видзөдан  
Өшиньөдыс пыр?  
Сьөлөм бердын видза да,  
Он жө мун да быр.

Мед кө корйыс гылаліс,  
Коркө петас выль.  
Код нө тэнө ылөдіс,  
Али муса збыль?

Өти пыдди видза да,  
Он жө сыв да быр.  
Мыйла бара видзөдан  
Өшиньөдыс пыр?

КОРСӨ ПИПУ ГЫЛӨДӨ

Корсө пипу гылөдө  
Коймөд лун да вой.  
Ёна эськө сыла да,  
Коркө пөжа дой.

Гөгөр зарни туплясьө,  
Да оз нинөм шед.  
Тэ тай эськө чуксасин,  
Да эг мыйкө пет.

Шаргö катшашыдöсысь  
Йизьöм керка выв.  
Вошис енэж пыдöсысь  
Менам сыланкыв.

Оз нин зарни сюръяөн  
Сотчы пипу ді.  
Көрöс, зарни сюраёс,  
Тэкöд корсям ми.

♦ ♦ ♦

Олöм эськö жö дай олöм,  
Жальыс некодлөн оз пет.  
Мича нылыс ёна колö,  
Да оз меным кисö сет.

Биö-й, ваö эськö пыри,  
Да оз шу тай кыв ни джын.  
Ыджыд дойөн сьölöм тырис,  
Некор сыысь ме ог мын.

Мый нö, мый нö нывлы колö?  
Кыт нö, мый нö менам лёк?  
Олöм эськö жö дай олöм,  
Аттö ёна жö мен шог.

Олöм эськö жö дай олöм,  
Жальыс некодлөн оз пет.  
Мича нылыс ёна колö,  
Да оз меным кисö сет.

## МУСУКАСЯН РӨМ

Еджыд гыён вöрсö койис,  
Катша шорын еджыд льöм.  
Керчомъяö югыд войыс  
Вайис мусукасян рөм.

Сизим верста сиктын кылö  
Сизим пöвста гудöк гор.  
Ок и гажа Эжва йыпын,  
Льöмйыс дзоридзалö кор.

Керчомъяын ныпыд тырыс,  
Зонмыс оз жö этша ов.  
Кодлөн кодысь гажыс бырис,  
Ачыс тöдö, тэ он ков.

Сюрас, кодлы коді колö,  
Йöзлысь дзирьясö оз восьт.  
Керчомъяын коді олö,  
Сійöс гажтöмыд оз босьт.

\*\*\*

Сöмын öти медся муса вöлі,  
Сöмын öти, да эз мусмы мöд.  
Морöс пытшкысь көсйö петны сьёлöм,  
Кöні потас, ачым ме ог тöд.

Сöмын öтчыд вöльнöй светас олан  
Да мед эськö синваыд оз пет;  
Коді колö, вывті ёна колö,  
Тэныд эськö Енмыс сетіс мед.

Муо усьны пипу корйыс лэбис,  
Регыд сибдас жөлөб помө йи.  
Код нө эськө кытчө тэнө дзебис,  
Некор нин ог аддзысьлөй нин ми?

Сөмын өтчүд вольной светас олан  
Да мед эськө ставыс вөлі бур.  
Коді колө, вывті ёна колө,  
Меным некор, некор нин оз сюр.



Юыс кытчөкө менө кылөдө,  
Пыжам берегыс зарни гылөдө.  
Төдса пастаыс, төдса вомыныс,  
Төдса пелысьыс визув вомөныс.

Эстөн коркө ми тэкөд юрасим,  
Томось вөлім да, өдийө бурасим.  
Эстөн сэтөрсө вомө сюялім,  
Баддьөд-эжөрөд ёна уялім.

Эстөн окасим, эстөн лөсялім,  
Ытшкөм-куртөмысь ёнджык пөсялім.  
Өні мөдъяс нин талань волөны,  
Биа-бордаось тадз жө полөны.

Юыс кытчөкө менө кылөдө,  
Пыжам берегыс зарни гылөдө,  
Мед и кылөдас, мед и лэччөдас,  
Аслам томлунө менө чеччөдас.

*Лыа ді вылын*

ЛЫА ДІ ВЫЛЫН

Чөвлы! Немторйысь менö эн мыжав,  
Пуксьы öдйöджык пелькиник пыжас...

Важөн ю дорас виччысьö сійö!  
Босьта кокныдик пелысьяс киö.

А тэ бöжавны, чайта ме, кужан...  
Лыа ді вылас йöз дінсьыс вуджам.

Мусö эновтам бушковнас-грöзнас,  
Шогнас, миянöс дивитысь йöзнас.

Дзедбсям-саймовтчам шумысь да зыкысь,  
Лыа ді вылас овмöдчам кыкөн.

Лун и вой кута радейтны тэнö –  
Оз нин суклявны миянöс сэнi.

Лёксö вунöдам, ловъясөн выльмам!  
Гашкö, ставыс на олöмын збыльмас.

КЫК ШОНДІ

Төвру ворсөдчө валъялысь гыкөд...  
Тэкөд ді вылас гожйөдчам кыкөн.

Дыр на шонділы енэжас кайны...  
Динө топөдчы доналөм яйнад!

Татшөм шудсө ме дыр нин эг төдлы –  
Важсө казгытыла омөлик вөт моз!

Олі өтнамөн, майшаси-кынми,  
Эг нин чайт татшөм олөмысь мынны.

А со воин да югзьөдін нэмөс  
Зарни юрсинад. Вөт али вемөс?

Вемөс! Дінысь ме лов шытө кыла –  
Сійө колиплөн дзопльзөмысь мыла.

И, сө майбырөс, шонтөны менө  
Гожся шонділөн жарыс, и тэнад...

♥ ♥ ♥

*«Сьөлөмөй бөрдө и сьылө,  
Виралө быдсяма ног...»*

Лэбөма рытыс – эг төдлөй...  
Вой рытсө ді вывсьыс вөтлө.

Пемыдыс кельыдлөз рөма,  
Енвевтсө төлысьнас дөмө.

Мусалон, небыд жө сойыд!  
Шоныд да лонь гоҗся войыс...

Весьшөрө зыньгөны номъяс –  
Туй налы тупкөма вонйө.

Узьоны ю сайын козъяс...  
Шуан – вай отувтам позъяс?

Энлы! И войыс на пемдас!  
Мекөд тэ майшасян нэмтө.

Ыркөдас ывласө бара  
Ёртөй – шог синъяса арыс.

Мыйсө на олөмыс ваяс!  
Муслуныд – ада и рая...

Кодарас кежөдас-сюяс?  
Визулөсь олөмлөн юяс!

Унатор водзысьыс кылө –  
Сьөлөмөй бөрдө и сьылө...

♥♥♥

Ді сайсьыс, оз нин и ыпысь,  
Арыслөн кок шыыс кылө.

Войяснас бара нин пемыд...  
Дженьыдик гоҗөмлөн нэмыс.

Мед! Сійө бара на волас!  
Мөдторйысь майшасьө лолөй:

Эз-ө нин ыркавны понды  
Ми костын ыпмунлөм шонди?

«Мусаой!..», «Донаой!..», «Шаньой!»—  
Тадз тэнö ыдждөдла, аньой.

Быттьөкө пөвторъяс помся  
Шыблала биö, мед помзяс...

Ловьясын бипур кодь муслун  
Ёнджыка ыпмунө? Кусө?

\*\*\*

Енвевтыс öшйöма, буквыш –  
Дінымөс муртса оз люкышт...

Зэръясось тупкыны корö  
Коньөр моз йөжгылытчөм зорөд.

Төвруяс абу нин чожөсь!  
Вошті веж рөмьяссө гожөм.

Гожөмөй! Тэысь на уна  
Вошті ме кымөра луннас.

Вөзйылө сьөдөдөм лолөй:  
Быть өмөй овнысө колө?

Вадорыс тыртөммис бара...  
Тэнö ме весьшөрө, арөй,

Ёртөс моз, пуктылі пыдди –  
Локтін да мусаөс мырддин...

\*\*\*

Муслун йылысь гижа  
Арся гөрдас-вижас.  
Арся көдзыд руас,  
Енэжас и муас.

Гижа сэсся төлын  
Едждөм мөдлапөлас,  
Зумыш козья вөрас,  
Ыргөн төлысь шөрас.

Югыд тувсов лунө  
Гижа уна-уна  
Рөмпөштанас-тыас,  
Лэбач дзользьөм шыас.

Гижа гожся войö  
Сьөлөм гажөн-дойөн...  
Сэсся арся вижас,  
Воас кад да, гижа.

Гижа – быттьö бөрда  
Рытъя кыа гөрдас...  
Гижа – быттьö сыла...  
Кор тэ менö кылан?

\*\*\*

Вежон чөж шондыс абу,  
Дзебсис – оз нюмъяв, оз пöж.  
Пристаньын кызувса лабич  
Тыртөм нин вежон чөж.

Жугыля съывывлө тöлыс,  
Гартывлө енэжас ёг.  
Тэкөд дзик ставыс тан вöлі,  
Ставыс,  
Мый мöдысь оз лок...

Мед! Менам сьöлөмöй шуда  
Сыысь, мый олöмын эм  
Казытылөм, шондi кодь югид,  
Сійөн и колляла нэм!

Шуда и сыысь, мый тöда,  
Тöда на олөмпысь дон:  
Шондiыс ыпъявны мöдас –  
Аддзыяс нывкакөд зон.

Бара сөдз нюм сорөн – кыз нö!–  
Олөмыс, шондiбан,  
Лабичсö вашкөдчысь кызнас  
Сэк налы козыналас тан...

♥♥♥

Эн радейт менö киподтуйысь, сямысь,  
Эн радейт менö збойлунысь ли рамысь.

А радейт сыысь, мый мем лoин важөн  
Нэм кежлө сьöлөм дойөн, сьöлөм гажөн.

Мый муслун меын дзоридз моз жö чужи,  
Мый радейтны да вежөгтыны кужа.

Мый, быттьö колип, муслун йылысь сыла  
Да видзöдлассьыд вый моз лолөн сыла.

Мый рök кö суас – медся бөрья здукö!–  
Ог бурдöдчысьöс либö Енмöс чукöст.

А сöмын тэнö динö сэки кора  
Да сёрнисьыд бөр вуджа таладорас,

Вот сыысь радейт, сьөлөмшөрöй-нылöй,  
Мый тэнö пукта ставсьыс медся вылö.

Став мукöдторсьыс – мусаöй, эн дözмы!–  
Мед радейтöмыс мойвиö бур йöзлөн.

♥♥♥

Вотчим да и воймим тэкöд вöрас...  
Биаси ме дзоля кушин шöрас.

Быттьö козьяс пövстын зарни пипу,  
Пемыд пиас югзис мян бипур.

Би киньяссö трачкöдчöмөн койис...  
Енэж бердас найöс арся войыс

Ляскаліс зэв уна чутөн-пасөн!  
Би киньяссö вöчис кодзувьясөн...

Югьялöны найö енэж шöрын,  
Быттьö катшасинъяс тэнад йöрын.

Бипурным, кор воис вöрас асыв,  
Кусі...

Кусі-й биыс сьөлөмъясысь.

Сөмын менам нэм помодз оз вунны  
Би киньяс кодь югьд войяс-луньяс.  
Да и чайта – тэ он вунд менө,  
Кытчөдз видзө кодзувьяссө енэж...

\*\*\*

Волывлө тувсовья войыс  
Радлунөн... Волө и дойөн.

Топөдө войыслөн лөньөн  
Сьөлөмөс, быттьөкө вөнён.

Лөньлунсьыс чуналө пельыд!  
Төлысьыс жугыль да кельыд,

Быттьөкө муслуныд тэнад –  
Шогөй и нимкодьөй менам.

Чужлөма войыслөн чөлысь,  
Муслуныд – олөмын төлысь...

Ылісянь югьялө-ворсө,  
Лөдсалө сьөлөмысь норсө.

Тэланьө писькөдча-муна!  
Уна на тэ дорөдз, уна.

Тэ вылө радейтчөм здуксянь  
Тувсовья вой нэмө пуксис.

Сорласис вемөсыс, вөтыс...  
Мый лоө?  
Код сійөс төдө...

\*\*\*

Увтасінас – тōдан өд –  
Кōні ёльыс варов,  
Шонді пуксян рōмыдас  
Аддзысям на бара.

Коддзылам сэн винатōг –  
Быттьō райō лэбам...  
Увтасіныс миянōс  
Йōз синьясысь дзедас.

Сьōлōм пытшсьыд дойястō,  
Полōмлунтō вōтпыв...  
Тайō гажа вой йывсьыс  
Некод оз и тōдлы.

Некод,  
Мый эг кольōй ми,  
Тэ-меа, шудтōг!  
Варов эськō ёльыс да,  
Сійō өд оз удты...

\*\*\*

Вой шōрнас пет ывла вылō,  
Пельястō чошкōд – и кылан:  
Тōв, быттьō верзьōма вōла,  
Рōдтыштō шы ни тōв чōлас.

Быттьōкō лэбō, кōть бордтōм,  
Войыслысь чōвлунсō торктōг:  
Чōв пиас мусаōй узьō!  
Ветлōдлōй, сёрнитōй гусьōн...

Энө жө садьмөдөй, энө –  
Мед сийө вөталас менө.  
Вөтас көть збоймыла полөн,  
Сьөлөмысь вөтпыла полөм.

Козиньяс ньөба да нуа,  
Ставсө, мый көсийлі, шуа...

♥♥♥

Локта нэм чөж тэ дінөдз – быттьө  
кыркөтш кая...

Локта эськө локныд да – мый и  
сьөрысь вая?

Гашкө, гажөн-серамөн, локта кыпыд полөн?  
Гашкө, вая озырлун, шань да кокни олөм?

Но ог пөрьясь – асланьө, абу сюсь  
да наян –  
Төждьяс, шог да майшасьөм нэмад  
тэныд вая.

Вая тэнад олөмө арся зэра луньяс...  
Но и вая радейтөм – сьөлөм тырөн, уна!

Сөмын тэныд өтнадлы муслун  
ассьым видза!  
Өдзөс меным восьтны-ө – ачыд  
сэсся видзөд...

\*\*\*

Со и мунис гожомыс,  
Быттьо эз и вöv...  
Нормомаоьсь пожомьяс,  
Ывла вылын чöv...

Окасьлім – эг пöтпывлöй!  
Вöлі да эз ло...  
Сöмын дінсьыд вöтпыны  
Вай эн тэрмась, но?

Вöтлан – расö муна ме  
(Лолын – жугыль мог):  
Арся биас сунышта,  
Воша юр ни кок...

Ог нин бöрсö мыччысьлы,  
Кыв ни джын ог шу –  
Йöжгылясьысь кыдзьяскөд  
Сотча лы ни ку.

Тэнад зэра луньясö  
Ог нин сэсся лок.  
Метöг зэв на унаысь  
Босьмас тэнö шог.

Ловтö сьöкыд изкинас  
Изас уна пöv...  
Со и гожом исковтис,  
Быттьо эз и вöv...

Кадыскөд тай ставыс бөрө кольө,  
 Тулыс, томлун – ставсө нуө кад!  
 А өд сывліс миян весьтын колип,  
 Сөстөм ванас сёльөдчисны ёльяс,  
 Уна рөмөн ворслис төдса вад...

Мыйсө вөчны олөмын эг көсйөй!  
 Чайтлім, гожся луныс оз и чин...  
 Кыа сөмын миянлы и өзйис,  
 Юркытш кыны виддзыс тэныд вөзйис  
 Вижьюр, пөлөзнича, катшасин...

Вөлі... Вөлі... Соссынысө нинөм...  
 Сөмын миян йыпысь больгис сикт!  
 Думыштла да – вунөма и нимыд,  
 Но, а көні вотлім катшасинъяс,  
 Öні тшапа быдмө борщевик...



Йөз му ёнысь гаравланы кымыныс...  
 Со тай, шөпөй – быдмө өтка пу  
 Лбу дивө болыма муни кымыныс,  
 Дивө – оз кө шөпөй чужан му.

*Ме радейтны чужи*

♥♥♥

Ягыс кыпид, ягыс сьылö –  
Вöрса олысьясөн тыр.  
Кодкö улын, кодкö вылын  
Ассьыс олём нуö пыр.  
Кöккльсь воясöс ог юась,  
Тöда: менам асшөр нэм.  
Вöвлі курыд, вöвлі юмов,  
Водзын бурыс эм жö, эм.  
Ыджыд нэмын öмöй шудыс,  
Он кö мöдлы бурсö коль?  
Мед жö быд лун лоö югыд,  
Мед жö сöстём лоö ёль.  
Мед жö шувгö, сьылö вöрыс,  
Сылы позьö – абу грек.  
Кодлы овсис – сійö пöрö,  
Кодлы овны – сувтас век.

## ВУЖЪЯС

Эм тэнад радейтана зон.  
Мен сійö ёртөн коркö шусис,  
Но мыйла, нылöй, он вун, он  
И частö вöтөн меным усян?

Мый вöвлі важөн, бөр оз ло,  
И лёкөн казътивны ог куж ме...  
...Ён бушков пөрöдіс том коз.  
Но муö колины кузь вужъяс.



Быттьö туй морт бушков дырйи вошöма,  
Сулалö да кынмö öтка пу.  
Тöда: сылы любö жö зэв гожöмыс,  
Но öд гортö пач дінад он ну.

Шоньд лунөн абу лышкыд Войвывным...  
Но ме тані паськөді ён вуж,  
Радейтчöмла сьöлөм тані доймыліс,  
И ме сійöс мыжавны ог кут.

Тэ со бара таркөдан мем öдзöсö,  
Тайö шысьыс некор ме ог ум,  
Кöть и пыртан сьöрсьыд ывла кöдзыдсö,  
Пыртан тшöтш и, мусаöй, пöсь нюм.

Йöз му йылысь гаравлөны кымынысь...  
Со тай, нылöй – быдмö öтка пу!  
Абу дивö Войвыв муын кынмыны,  
Дивö – оз кö шонты чужан му.

Пувйыс таво  
Розъя-розъя  
Зіля вотчоны  
Том гозья,  
А кор дышодыштас,  
Сэк  
Окасьыштны  
Абу грек.

Но, а ягыс –  
Сылөн вөля –  
Кыё помасьпытём  
Висьт:

«Лоад коркё  
Пөчөн-пөльён,  
Сэки вөрад  
Он нин письт...»

Кымөр улын  
Куйлө пестер,  
Чөла дзуртё  
Пожём пу...  
Көть и талун  
Тыртөг лэччан,  
Лёк кыв вөрыслы  
Он шу...

## ПРИМЕТА

Эм примета: кузь туйö кө петіг,  
Паныд локтö тэн куш киа морт,  
Сідзкө, шудыд оз ло орччөн тэкөд,  
Сідзкө, бурджык, он эновт кө горт.

Быд приметалы ог ёна эскы,  
Көть и йөзсянныс мыйсö ог кыв,  
Уна во сайын кузь туйö петіг,  
Тыртөм ведраа аддзысис ныв.

Ачыс пелькиник, синмыс – лөз енэж,  
Юрсö катовтліс, козьналіс нюм...  
Сійö важөн нин гөтырöй менам,  
Ола-выла и некор ог ум.

## ЯБЫР ПОЗ

Юра кымөръяс оз нин разавны,  
Пельсы өшөдіс сьökыд розьяс.  
Гожся луньяссö сөмын казытылө  
Менам ябырлөн тыртөм позйыс.

Шонді мыччысылө сөмын корсюрө.  
Этша ва öні сійö юö.  
Лэчыд төв нетшкө пулысь корьяссö,  
Ньöти жалиттөг вөтлө-нуö.

Частö казытылам мыйыс вөлөма,  
Тэкөд өтвылысь шуда гозья...  
Сөмын тыртөм мед оз ло сьөлөмным,  
Кыдзи арьясын ябыр позьяс.

Лун шөр лунё, а оз войё  
 Татшөмторйыс мекөд ло:  
 Быттьё мойдын көкө-чойё  
 Көкис меным уна во.

Лыдди, лыдди, сэсся торкси,  
 Мөдысь босытчи – тшөт эз сюр.  
 Весиг дөзмышті да ёрччи,  
 Эн пө, көкөй, вывті дур.

Ветлам, нылөй, вөр ді бокас,  
 Чөскыд намыр сёям сэн.  
 Гашкө, бара төдысь көкыс  
 Кузь нэм туналас тшөтш тэд.

Этша кө, эн пукты пыдди:  
 Тэ эн шогсы, ме кө эм.  
 Ставыс, мыйта водзын пыддис,  
 Тырмас тэн и тырмас мем.

Чайтлі век, мый радейта ме тулыс,  
 Сэки ставыс выпысь повзьё-чужё,  
 Сэки быдөн меліасьны кужё.  
 Чайтлі век, мый радейта ме тулыс.

Чайтлі век, мый арыс меным мустөм:  
 Сэки гөгөр кельдөдө да чусмө.  
 Чужан муёс эновтёны юсьяс...  
 Чайтлі век, мый арыс меным мустөм.

Чайтлі век, мый радейтчöмыс кустöм,  
Шудлуныслөн некөн абу помыс.  
Вöвлі коркö удалөн да томөн,  
Чайтлі век, мый радейтчöмыс кустöм.  
Ставыс вöвлі: радлуныс и шогыс,  
Öнi тайö ныв-пиянын олö.  
Эг кө тöд ме ассьым олан могöс,  
Сэки эськö водзö овны полі.

### МИЯНÖС ЫШÖДЫСЬЯСЛЫ

Мича нывъяс,  
Дона аньяс,  
Кытысь татшöмъясыс тi?  
Небыд сывныд,  
Асьныд шаньöсь,  
Тiян водзын сывлам ми.

Эн кө вöлöй –  
Ми эг олöй,  
Эг и тöдлöй гаж ни шог.  
Тiпкö сьöлöм,  
Овлö долыд  
Миянлы тшöтш аслысног.

Тiян празник –  
Гөгөр кыпыд.  
Тi кө эмöсь – ставыс эм.  
Олан гажсö  
Сöмын кыклы  
Быть нин ковмас юкны нэм.

Мича нывъяс,  
Дона аньяс,  
Кытысь татшөмъясыс ті?  
Овны-вывны  
Бурөн-шаньён  
Водзё нуны олём би!

\*\*\*

Козъяс вылын лымйыс  
Уна дзирдён  
Пөртмасьё сідз –  
Синтё весиг ёнтё.  
Рытыс көдзыд,  
Суктё сөнсьыд виртё –  
Ывлаё көзяин  
Оз лэдз понсё.

Тайё здукас некод  
Некён абу.  
Тöлысь ёртöс  
Гуны көсийö Ёма.  
Но ми тэкöд  
Некор абу лябöсь –  
Мунан орччөн  
Сиктöд помысь помö.

Лымйыс варов,  
Кок уланым дзуртö.  
Окасям, öд гажным ёна быри.  
Татшөм рытнад  
Гуляйтнытö бур тай;  
Нинöмыс оз тыдав  
Öшинь пырыд.

## РАДЕЙТЧӨМ ЙЫЛЫСЬ

Вылө он пуксыы,  
Он янөд асьтө,  
Сэтшөм и эм, кутшөм колан.  
Шуднад век юксян,  
Отсыштны дась век,  
Йөзыслы бур вылө олан.

Тэ югыд кодзув,  
Тэ мелі шонді,  
Мөд ногыс кыз сэсся шуан?  
Уджын век водзын,  
Эбөс он кондыв.  
Менө тшөтш аскөдыд нуан.

Радейта тэнө,  
Пөрысьө-нэмө,  
Нэм помөдз тэ меным колан.  
Тэ сөстөм енэж,  
Тэ менам енмыс,  
Та вөсна помтөг ми олам.

## МЕМ ТЭНАД НЮМТӨГ...

Ми өта-мөдлы –  
Пөсь ни көдзыд,  
Ме тэныд быттьө  
Кортөм гөсть.  
Көть эськө овлім  
Лөня, сөдза,  
И вөвлі радейтчөмным

Пөсь.

Мый лои тэкөд,

Мекөд, аньой,

Сьод каньыс костөд

Эз-ө вудж?

Ме шулі тэнө

Шондibanөн,

А өні тэнад

Синмад мудз.

Мем тэнад нюмтөг

Көдзыд, шуштөм,

Оз шонты би...

Он асьтө төб.

Он вермы удждывны тай

Шудтө.

И некор муслунтө

Он ньоб.



*Вай жё' окаям, мича ныланой*

**МУСЛУН**

Муслуныд –  
збыльысь кө сійё пось муслун –  
Писькөдчө сьөлөмад  
дзольгысь ключ горөн,  
Шонді моз некор дзик,  
некор оз куслы,  
Дзоридз моз югыдлань  
чужомнас нёрө.

**НАТАШАЛЫ**

Весиг кула, да коля ме ловъя,  
Коля му вылас ассыым пось лов:  
Тэнад борд улын сынөдөн лоа –  
Ачыд гулюён меным тэ ло.

Медводз нылыдлысь этшсö  
Помöдз гөгөрбок төд,  
Кыдз пу ачыс со еджыд,  
Көть и вуджöрыс сьöd.

\*\*\*

Эн пет войпукны тарыт, ныланöй.  
Аддзан, төлысь джын сöмын чусалö.  
Сэк пö нывбаба аддзö мусасö,  
Гөгрöс төлысь кор югзьö ывлаын.

\*\*\*

Мыйла, сьöлөмöй, талун тэ пессян?  
Мыйла ывлаыс мен öмидз көра?  
Талун вом дорöс гильödö менсьым  
Нывлөн синьяс кодь кельыдлөз төвру.

\*\*\*

Тэнад морöсyd гы моз кыпьялö,  
Сьöлөм чеччөмтö весиг кыла ме.  
Мелі синьясад муслун ыпьялö...  
Вай жö окасям, мича ныланöй.



## МЕДМИЧА РИФМА

Кодыр тэнсьыд ме аддза  
Гожся вой кодь руд көса,  
Сэки син водзё сувтё  
Эжва пөлөнса ордым.

Кодыр тэнсьыд ме аддза  
Гы моз кыпъялысь морёс,  
Сэки съёлөмөй менам  
Өда бипур моз öзйö.

Кодыр тэнсьыд ме аддза  
Тувсов асыв кодь нюмтö,  
Сэки син водзё сувтö  
Алöй дзоридзлөн воссьюм.

Кодыр тэнсьыд ме аддза  
Шондi бана том чужöм,  
Шоньд рöмөн сэк кыа  
Менсьым олөмöс мавтö.

Кодыр тэнсьыд ме аддза  
Мелi кельыдлöз синьяс,  
Сэки чужöны юрам  
Мелi кельыдлöз думьяс.

Кора прöститны менö:  
Чужтi рифматöм кывбур.  
Тэ öд му вылас ачyd  
Медшань, медмича рифма.

НЫЛАНӨЙ, МУСАӨЙ, КӨН ТЭ?

Енэжын пөртмасьысь кодзув  
Войбыд со лөз биён сотчө.  
Төлысь сэн – еджыд тшап дзодзөг –  
Быттьөкө кокасьө-вотчө.

Гашкө, и мусуксө корсьө,  
Пөвтөгыд кузь төвся войыс.  
Сылы моз аслым – ог соссы –  
Некодлы нюжөдны сойөс.

Стөрөж моз довъяла өтнам,  
Ывла выв лөньлунсө видза.  
Ныланөй, мусаөй, көн тэ?  
Шоглунөс мыйла он личөд?

Дзирьятө он восьты мыйла?  
Ылын на югдандор лөзыс...  
Кодзувсө босьтыны мый ли  
Муслунөс сьөлөмад өзтны...

## КОЗИН

Лөнь тыысь гумовта кыа,  
Олан туй эз пемдыв мед.  
Эжвалысь сялькөдчысь гыяс  
Гаж вылө козьнала тэд.

Меддона изйысь на мича  
Лысвалөн дзирдалысь сер.  
Козьнала лысваа видзьяс,  
Гарьясөс польдчөдысь зэр.

Шонділысь югөр тэд каття,  
Лоан мед шонді кодь том.  
Кыз пулысь чусмывтөм платтьö  
Козьнала казытыланпом.

Козьнала юсыяслысь горзöм,  
Кельыдлöz енэжлысь от.  
Донай, мыйөн ме озыр –  
Водзöстөг ставсö тэ босьт.

### СЁРÖН КАЗЯЛІ

Зарни амыся тöлысьсö судзöда,  
Брошка пыдди мед öшöдны морöсад.  
Тэнад синъясö лöz рöмсö рудзöда  
Паськыд люстра кодь енэжысь – коран кө.

Ёлысь гумовта бисер кодь кодзувсö,  
Пеляд исерга пыдди мед пысавны.  
Дзирйыв восьта пöсь сьöлөмлысь öдзöссö:  
Сэтысь пыддян тэ, мый ог шу кывъясөн.

Гажа раскын тэд зарава войтöда,  
Кыз кодь еджыдөн көсьян кө лоны тэ...  
Тадзи шупывлі тэныд ме войпукиг,  
Кор тай ыдждöдлі тэнö пыр шондйөн.

Сöмын көсйысьöм лоис тай весьшөрö:  
Тэд эз ковмыны кодзув ни, тöлысь ни...  
Мöдлы мойвиин... Колин мен вежөрö  
Паськыд пармаын юралысь йöлаөн.

## ОЗ-Ө КЫДДЗЫС КОЛЛЬӨДЧЫНЫ КОР

Со и ваймө,

ваймө лунся жарыс.

Гожъялыштөм ныв кодь ывла выв.

Потшөс вывсянь петук чилзө яра,

Садйын чикыш тэчө сыланкыв.

Дзэбсьё шонді мөдлапөвса раскө,

Унзіль тыын пуө посни гыч.

Небыдика менам өшинь тасө

Инмөдчылө өшинювса кыздз.

Мыйкө меным шөпкөдыштө кылө,

Төвру улас сыркмунлө веж кор.

Петала да юала ме кызлысь:

Оз-ө менө колльөдчыны кор?

\*\*\*

Кызлөн гыпалө виж кор,

Пасьтөм ань кодь кыздзыс лоө.

Букыд арыс кодь жө нор

Менам сьөлөмөй сэк овлө.

Бара, бара кольө во,

Содө чужөм вылын чуқыр...

Көн тэ, медводдза любовь –

Ылі кодзувлөн нэр югөр?

Сьөлөм весьшөрө оз вись:

Олөм ваймө, синмыд чусмө.

Морт олөмыд – сотчысь сись,

Өзъялыштас, сэссия... кусө.

*Ме тэныд өкті катшасинъяс*

ЗЭРИГӨН

Ме тэнö сэки эг и окав,  
Ме тэнö сэки эг и кутлы.  
Ми мунім, кыдзи чоя-вока,  
И дзоридз көрөн өвтіс луд выв.

Ме тэныд өкті катшасинъяс,  
А сэсса... ок, и ёна зэрис...  
Мен тэнсьыд мелі чөдлач синъяс  
Со бара казытіс югыд зэрыс.

ПЕРВОЙ МУСЛУН

Быдөн дінö волö первой муслун,  
Быдөн кывлö сьөлөмыслысь дой.  
Сійö дойыс дыркодя оз куслы –  
Узытөг кольö лыдтөм-тшөттөм вой.

Думайтан сэк сөмын өти йыпысь,  
Коді торкис тэнсьыд чөскыд ун.  
Думайтан да казытылан тэ выльысь,  
Аддзысинныд кыдзи – первой лун.

Кажитчө, мый сытөг здук он вермы  
Нюжөдны тэ ассьыд шуда нэм,  
Но он төд, он төд мый колө керны,  
Медым сийө кисө мыччис тэн.

Первой муслун быдөн динө волө,  
Сийө сөстөм, кыдзи вөрса ёль.  
Сөмын татчө пасйыны тшөтш колө,  
Мый оз быдөн пиын сийө коль.

## ТЭНӨ КОЛЛЬӨДИ

Тэнө колльөди  
Кодзула войын.  
Ставнас эзысьөн  
Дзирдалис сикт.  
Дзуртис лым...  
Тэнад керкаөдз воим,  
Колө янсавны –  
Ог вермөй ми.  
Бара котөртам  
Сикт мөдар помөдз,  
Сэсся окыштчам сералигмоз.  
Тэнад банйөма чужөм,  
А вом дор –  
Быттьө гожөмын  
Кисьмөма оз.  
Тола эшкынын  
Керкаяс чөлөсь.  
Лунся мудзөмсө  
Пальөдө му.  
Вөтчө ми бөрся

Көвдүм кодь төлысь,  
Сөмын мянөс  
Некыдз оз су.

♥♥♥

Частө овпывлө сідзи,  
Ызгө вына лөз гы,  
Но друг ар воас – йизьө,  
И оз кыв сылөн шы.

Муслун ыпйө яр биөн,  
Но друг чизыртас пуж,  
И сэк тыдовтчас мян,  
Сылөн пыдын-ө вуж.

МЕНАМ РАДЛУН, МЕНАМ МОЙД

Ывла вылыс лымъя, – көдзыд,  
Оз нин тыдав мулөн чут.  
Тэныд колис поездөдзыд,  
Муса нылөй, вит минут.

Еджыд пухысь юрад чышъян,  
Бандзиб вылад синва войт.  
Регыд менө колян, пышъян,  
Менам радлун, менам мойд.

Кадыс ассыс туйсө венө,  
Сійөс нинөмөн он кут.  
Нөшта өтчыд кутла тэнө,  
Сэсся бур туй да бур шуд.

Поезд төвзис...

Сьökыд вьвтi!  
Ставсö водзвыв төдан кысь?  
Быттьö мунiс сьөлөм вьвтi  
Нылөс нуысь поездыс.

## ВЕЖСИС ВОЙВЫВЛӨН РӨМ

Вежсис войвывлөн рөм,  
Бара гөститө тулыс.  
Сявкйö-дзордзалө льөм,  
Эжва сикт бердөдз туис.  
Сөстөм енэжлөн йир,  
Шондi югөрсö ыстө.  
Лунтыр асывсянь пыр  
Дзользьö-гажөдчö пыста.  
Бара ставыс тай сiдз,  
Кыдзи кольөм во вөли,  
Гөгөр вөр-валөн мич,  
Тiпкө тшөкыда сьөлөм.  
Сөмын мыйкө тай оз  
Меным, буракө, тырмы...  
Ог нин коркөя моз  
Вермы тэ ордө пырны,  
Шуны некымын кыв,  
Тэныд козьнавны дзоридз...  
Тэ өд медводдза ныв  
Инмин сьөлөмөй дорөдз.  
Тэкөд торьялим ми  
Көдзыд сьөд зэра арын.  
«Эм кө сьөлөмад би,  
Регыд аддзысям бара»,—

Тадзи шулін тэ мем,  
И ме виччыси век өд,  
Но эг йитöй тай нэм,  
Кыдзи көсйысьлім тэкөд.  
Ми эг аддзысьöй, эг,  
Дзикөдз торъялім, нылöй!  
Таысь тулыснас век  
Сьөлөм доймөмöй кылө.

## ТУЛЫСЫС КӨ ВОЙВЫЛӨ ЭЗ ВОЛЫ

Тулысыс кө  
Войвылө эз волы,  
Ывла вывсьыс лымйыс  
Эз и сыв,  
Колип,  
Коді көдзыдлунсьыс полө,  
Енэж дзибйын эськө  
Эз жö сьыв.

Тулысыс кө  
Войвылө эз волы  
Бура төда,  
Олім эськө сідз:  
Сьыланкывтөг  
Лун-войсö пыр коллим,  
Эгö аддзöй дзоридзьяслысь мич.

...Тэ кө меным  
Эн ло öтпыр паныд,  
Татшөм шуда  
Öнөдз ме эг вөв,

Сьөлөм вывтi,  
Кыдзи тундра банөд,  
Ветліс эськө сөмын  
Көдзыд төв.

### ВЕТЛІ ЫЛЫС ВИДЗЬЯС ДОРӨДЗ

Ветлі ылыс видзьяс дорөдз,  
Кадыс эз вош весь.  
Вайи тэныд китыр дзоридз,  
Муса нылөй, сэсь.

Тэ друг быттьө өзйин-повзин,  
Нюмьёвтыштін мен,  
Сэсся шуин: «Мича козин,  
Аттьө, зонмөй, тэн».

Меным долыд вөлі збыльысь,  
Юрын чужис дум:  
«Аски ветла на ме збыльысь –  
Аддза тэнсьыд нюм».

### ГОЖӨМЫС ЭНОВТАС МЫЙӨН

Гожөмыс эновтас мыйөн  
Миянлысь войвывса му,  
Көдзыдыс дорас кыз йиөн  
Парматі визувтысь ю.

Сыкөд, код меным зэв муса,  
Коркө кө торьялам ми,  
Сьөлөмөс менсьым, кызд юсө,  
Дорас жө кодзыд кыз йи.



Ме тэнө кузя,  
                    чөскыда зэв окышти,  
И ыджыд радлун  
                    сьөлөмөс друг сотыштіс.  
А сэсса бара  
                    крепыда зэв сывьялі,  
А пельөс сайсянь  
                    Торьялөм нин кыйкьяліс.

## МЕНӨ ЙӨЙМӨДИС ТЭНАД МИЧ

Менө йөймөдіс  
Тэнад мич,  
Сьөлөм ыпнитіс  
Муслун биөн.  
Эг кут ачымөс,  
Артмис сідз:  
Лои тэ водзын  
Кутюпиөн.

Эски дугдывтөг  
Лун и вой,  
Мый тэ радейтан  
Сөмын менө.

Но друг козыналін  
Сэтшөм дой,  
Кодös сьөлöмьд  
Шоча венö.

Вөлөм мусаджык  
Мөд морт тэн,  
Коді меьсь на  
Збойджык варыш...  
Мыйла, мусукöй,  
Сідзкө, эн  
Меным та йылысь  
Водзвыв гарышт?

Ме öд эг эськө  
Тадзи вись  
Да эг мучитчы,  
Кызди öнi.  
Водзджык прöйдитiс  
Эськө визь,  
Пырны код сайö  
Вунөдöны.

ТЭ СІДЗИ ЭН И ГӨГӨРВО

Да, кольö вояс бөрся во,  
Но менö мөвп век венö:  
«Тэ сідзи эн и гөгөрво,  
Кызд радейтлі ме тэнö».

Мый сьолөм менам вөлі пым,  
Тэ сідзи эн и казяв.  
Эз кытчөдз торьялөмлөн гым  
Став йитөдьяссө разяв.

## ЭГ КУЖ

Ме аддзи өтпыр сэтшөм мича из,  
Код пөртмасис дзик өшкамөшка рөмөн.  
Но кодкө менсьым сійөс гусяліс,  
И колис сыысь казытылөмыс сөмын.

Ме сэки эг на сэтшөм төлка вөв,  
И донаторйөс пукті вывті матө.  
А бөрас видлі корсьны уна пөв,  
Но он тай курав джоджсьыд киссьөм ватө.

Тадз, изйыс моз, ме вошті муса нылөс,  
Сы бөрын уна паныдавлі выльөс,  
Но ыджыд муслун на дінө эз чуж.

И өні менө өти мөвп век виө,  
Мый шудөй менам вөлі аслам кийн,  
Но сійөс бура видзнысө эг куж.



*Ассьыд шогтö палыд*

Сийма Л.П.Логиновалы

АРСЯ КЫВБУРЪЯС

♥ ♥ ♥

Бара енэж ырзөмөн со бөрдө,  
Сьөлөм вылө кольö шуштөм пас.  
Бара пелысь ичмонь моз дзик гөрдөн  
Вөччөдөма сикт дор кыддза рас.

Регыд пөрччас сийө ассьыс паськөм,  
Мичлун воштас, кусас сылөн би.  
Оз ков усьны сьөлөмөн, өд, гашкө,  
Локтан арын аддзысьлам на ми.

Бара паныдасьлам арся мичкөд,  
Сөмын Енмыс олөм сетас мед.  
Оз кө мойви лоны воча тэкөд,  
Арся луныс сьөлөмысь оз берд.

\*\*\*

Öшинь сайын синва кисьтö  
Колльöдчигмоз жугыль ар.  
Öтка льöм пу гажтöм висьтөн  
Юксьö мекöд – быдсөн жаль.

Вай эн майшась, воас тупыс,  
Бара ныв кодь лоан тэ.  
Лым кодь дзоридз чукöр муыс  
Козьналас на выпысь тэд.

Ассьыд шогтö пальöд, öлöд,  
Кöть и тöлыс лоас кузь.  
Тöд, мый öти арөн-тöлөн  
Миян олёмным оз кус.







Ме некор эг вөв тэныд муса,  
Кыз медся дона да бур мортлы.  
Кыз менам мусалы и ёртлы,  
Но öзйысь сьёлөм он тай кусод.

Ог эскы, мый тэ меысь пышъян,  
А тэтөг мен көть сотчы, вөй.  
Мед шуасны кө, мый ме йөй.  
Но бара юрын мича чышъян.

Ме аддза ачымөс бөр томөн.  
И сераласны кө, и мед.  
Ме бара ыста письмө тэд  
Сидз юяс, лөзов парма вомөн.



Да, коркө вөлі тайө өшиньясыс муса,  
И виччысьпывлі сэтысь бияс кусөм.  
И сөмын сэки узынысө ме водлі,  
А өні найө öзйөны нө кодлы?

Код радейтө сэсь рытъя югыд бисө,  
Код кутлө сылысь вөвлөм муса кисө?  
Ог ме, а мөд, код шудаджык ме дорысь.  
Ме өні быттьө өшинь улас корысь.

♥♥♥

Көсйи тәнө вунөдны,  
Паныдасьны поли.  
Тэ йылысь жө мөвпьясөн  
Сөмын на пыр оли.  
Уджөн көсйи пөдтысьны,  
Вунөдны мед тәнө.  
Сөмын тэнад синъясыд  
Янөдісны менө.  
Сэсся вөрө шойччыны,  
Пальөдчыны муні.  
Тэ йылысь пыр мөвпалі,  
Мукөдторйыс вуні.  
Думайті, мый вунөда,  
Кор ме узыны воді.  
Сөмын войбыд вөтъясын  
Тэкөд дзоридз воті.  
Сэсся кывбур гижигөн  
Вунөді нин быттьө.  
Сөмын сійө вөлөма  
Тэ йылысь, кор лыдди.

♥♥♥

Югыд шондіой менам,  
Му выв гажлунөй менам,  
Сьөлөм доясөй менам,  
Кыз нө муслунөс вена?

Гажыс му вылас уна,  
Шудыс му вылас уна,

Бурыс му вылас уна.  
Сөмын налөн ме вуні.

Тэтөг гажтөм мем ёна,  
Тэтөг сьökыд мем ёна,  
Тэтөг öтка ме ёна,  
Öтнад му вылас дона.

Тэтөг луныс мем кусө,  
Тэтөг шондыс кусө,  
Тэтөг олөмөй кусө.  
Мыйла тэ сэтшөм муса?

### ТЭНӨ ЗАРНИӨН КӨ ШУА

Тэнө зарниөн кө шуа,  
Мыйла зарниыс нө меным?  
Тэнө мичаён кө шуа,  
Он өд мичаён ло нэмыд.

Тэнө донаён кө шуа,  
Ог куж висьтавны и донтө.  
Тэнө мусаён кө шуа,  
Тайө кывйыс менө шонтө.

Муса кө нин, сідзкө, мича.  
Радейта кө, сідзкө, дона.  
Коді уна зарни видзө,  
Сы дорысь ме озыр ёна.



Шонділань быдмөг моз тэланьö кысси,  
Унджыкысь арся съод зэръясөн мысси.  
Көдзыд вой төвъясысь зумышөн лои,  
Век жö дас во мысти тэ дорö вои.

Сöмын тай сёрми ме та кузя туйын,  
Дас төв öд войвывса толаöd уйи,  
Кынмывлі дасысь и дасысь ме сывлі,  
Сы мында дойсö ме сьöлөмөн кывлі.

Мыйла эг усь сöмын, муні пыр водзö,—  
Юр весьтын дзирдаліс куслытөм кодзув.



Менам сьöлөмöй бурлунөн ойдөм,  
И öбидаыс сэтчö оз төр.  
Медым менö кө кедзовтан, дойдан,  
Век жö муса тэ мен, сьöлөмшөр!



Эм саридз менам – олөм,  
И пыжыс шöрас ме.  
И парус – менам лолöй,  
А төв нырыс, дерт, тэ.



Август пом нин, гылалёны корьяс.

Помся зэрьяс, бара тшака во.

Восьлала ме яглань тёдса борйёд,

Муса вөрөй матысмө нин со.

Мудза, веж нитш вылас гатшён уся,

Нюмьёвтас лөз енэжыс сэк мем.

Тэнад синьяс мозыд, менам муса,

Синва пыр тшөтш нюмдыла и ме.

### ТЭНЫД

Гулыд, югыд яглысь

Вайи чөскыд көрсө,

Сөстөм тэрыб шорлысь –

Дзольгөм шы.

Вайи тэныд ставнас

Льомью парма вөрсө.

Морөс тырнам –

Меліунлысь гы.

А тэ сійөс, бөрд көть,

Мусаёй, эн казаяв.

И дзик нинөмсө

Эн гөгөрво.

Горш дін гөрддзасис,

И син дорьясөй вазис:

Мыйта вайи!

Нинөмыс эз во...



Сентябрь помад тай  
Пармаё пуксьё сёр ар нин.  
Енэж кымёра,  
Пуяссиянь койё виж зарни.

Тайё зарнисьыс ывлаыс  
Шондіа быттьё.  
Кольём воястё талун  
Ми тэныд ог лыддьёй.

Кисьмём тусьяснас  
Пелысьыс гажөдө сьёлём.  
Пипу корьяссө лэбөдө  
Юр весьтти төлөн.

Талун аддзысим ми,  
Көть тэ тайёс эн көсйы.  
А со бара на ме  
Пелысь роз мозыс öзйи.

## МУСАЛЫ

Кокныд тэрыб воськола  
Локтан рытъядорсө.  
Еджгов небыд юрсинад  
Гожся төлыс ворсө.

Мича сөдз лөз синъясыд  
Мелілунөн тырөсь.  
Видзөдласыд сьёлөмөдз,  
Муса мортёй, пырө.

Котөртөны кокъясөй  
Асьныс тэлань паньд.  
Өмидз көра вом доръяс  
Сотыштөны банөс.

Дзольгө ёль моз гөлөсыд,  
Сыланкывйө пөрө.  
Менө видзысь ангелөй,  
Менам сьөлөмшөрөй!

♥♥♥

Лөз синъяса, муса и дона,  
Эн тэрмась вай, олышт, эн мун.  
Тэ колан мем, колан зэв ёна.  
Мед тэтөг эз вөв эськө лун.

Тэ менө он дөзмөд, он дзескөд.  
Вай шонді моз керкаө пыр.  
И олөмсө радейтны эскөд.  
Мед сыланкыв менам эз быр.

Лөз синъяса, муса и дона,  
Тэ некор нин менам он вун.  
Мый шуөма олөмас – поньы.  
Но сьөлөмысь сөмын эн мун.

♦♦♦

Шонді югөр моз пыралін керкаө,  
Мунін бөр, коли шемөс и чөв.  
Нинөм вөчны ог слөймы, сідз бергала,  
Татшөм вошөмнас некор эг вөв.

Мый нө пыраліс тэкөд тшөтш керкаас?  
Мыйла тулысыс лоис дзик мөд?  
Мый нө воштисө, мый корся, бергала?  
Сыла-й, бөрда, а мыйысь – ог төд.

♦♦♦

Аддзысьлөмсянь аддзысьлөмөдз олам,  
Важ мозыс на ёрта-ёртлы колам.  
Төждьясын да уджын, ог и төдлөй,  
Кадыс кольө, олөмсьыс ог пөтлөй.  
Олан туйыс менам тэкөд өти,  
Нинөмөн ог лыддысьөй ми ньөти.  
Радлунысь ми долыдмам да мичмам.  
Шогыс кыкнан сьөлөманым вичмө.

Аддзысьлөмсянь аддзысьлөмөдз олам,  
Важсьыс ёна өта-мөдлы колам.

♦♦♦

Челядь дырйи моз жө  
Нимкодяся төвлы.  
Ньөжйө лэччысь лымлы,  
Асья шы ни төвлы.

Едждөм мусянь югыд  
Керка пытшкө пырө.  
Муса мортысь быттьö  
Тöлысь гажöй бырөм.

Эг и тöдлы кызди  
Син дорьясöй вазис.  
Код нö горшысь гөрөд  
Öнi менсьым разяс?

Тöлыд сийö воас,  
Кöдзыд либö шоныд  
Сöмын муса мортлы  
Абу туйыс воны.

♥♥♥

Усьысь лымйыс оз шедöдчы киö,  
Сийöс сывтырьяс бергöдлö тöv.  
И зев ыджыд öбида ас пиын,  
Кутшöм некор на менам эз вöv.

Кызкө тöдлытөг кötасис чышъян,  
Кокныд лыштiс көть öти здук.  
Ме и ачым öд кодыськө пышъя,  
Сiдзкө, мыжавны тэнö ог кут.

♥♥♥

Да, тайö вöли  
сöмын на неважөн.  
Ми олим тэкöд  
öти шогөн-гажөн.

Да, óta-мөдтөг  
овнысö эг вермөй.  
Эг эскылöй,  
мый муслуныд тшөтш нэрмө.

Но сэк нин сьөлөм  
көдзалөмысь полім.  
Көть шуда дойөн  
ёрта-ёрткөд олім.

И со нин миян костөд  
вой төв швичкө.  
И рытнас сьөлөм дойтөг  
ун нин личкө.

## СЬӨЛӨМ БАРА ВӨРЗИС

Радейтлі ме сійөс,  
сөмын сыөн олі.  
Сьөлөм бара вөрзис  
чужанінө воліг.

Важкодь том да мича  
паныдасис ягын.  
Думыштны эг куж ме –  
тайө сылөн кага.

Тан жө кызь во сайын  
батыскөд ми вотчим,  
Ягыс вөлі гажа,  
эз на вөв сэк «Сотчөм».

Сылөн шуштём пасыс  
менам олём сяма.  
Эг ло муса мортлөн,  
эг ло талы мамөн.

Нетшыштчи да карё  
муни, ставсё вошти.  
Вёлёй менам бөжтём,  
доддьёй менам вожтём.



## ЕВГЕНИЙ КОЗЛОВ

---

*Кор йөз пөвстсыыс тэнө аддза...*



Кор узтөмөсь кольёны войяс,  
Кор зэр шыкөд падмөдчө пөнь,  
Сэк казытштан лэбовтөм вояс,  
И быттьө друг личалас сөн.

И лоө зэв югид и лөсьыд,  
И бара на кыпавлас лов.  
Мед олөмад мыйкө оз лөсяв,  
Но сы йылысь өні – оз ков...

Тэ казытив вай вөвлөмсө, казытив,  
Эн шу – сэні бурыс эз вөв.  
Сідз шуан кө – пөръялан асьтө,  
И, бурджык, вай олыштам чөв.

Тэ вой шыас кывзысьышт сюся,  
Тэ юр улад лөсьөдышт сой.  
А зэрыс мед шөпкөдас гусьөн  
Став исковтөм кад йывсьыс мойд.

Эм сэні и Пеля, и Сюра,  
Дай сьёкыд на овпывлө зэв.  
Но мойдыд тай помассьё бура,  
И сідз жө и помалас зэр.

А лэбасны өнія вояс,  
И өтчыд – кор лөсялас лад –  
Тэ казыштан татшөм жө войө,  
Мый шуда и вөлөма кад...

\*\*\*

Ме коркө ставсө тэныд висьтала,  
А өні юасьны оз ков.  
Вай, бурджык, курыдторсө кисьталам,  
Мед сійө небзьөдыштас лов.

Эн юась – көні шөйти-келалі  
Да мыйла кыв эг гижлы тэн...  
Ме өткөн овны дзикөдз велавлі,  
Но вөтпыны эн тэрмась, эн.

Өд сідз нин аддзысьпывлам шоча ми,  
А талун тэкөд сэтшөм бур.  
Тан сөмын лолөй менам шойччывлө,  
И тэтөг ньөти дой оз бурд.

И тэ кө эн вөв тайө му вылас,  
Ме эськө важөн нин эг ов.  
Өд кымынысь ме көсийи кувпыны,  
Но тэлань кыссис мудзөм лов...

♥♥♥

А коркө тэнад лоо ныв –  
Дзик тэ кодь кофе рёма синмыс,  
Дзик тэ кодь гөлөс,  
Тэ кодь ныр.  
И, гашкө, тэ кодь лоо нимыс.

И кольё ог төд кымын лун,  
И сійөс аддза ме  
И төда,  
И бара вошө менам ун,  
И сылы висьтавыны ме мөда:

А менам вөлі төдса ныв –  
Дзик тэ кодь кофе рёма синмыс,  
Дзик тэ кодь гөлөс,  
Тэ кодь ныр,  
И дзик жө тэ кодь вөлі нимыс.

Сэк йөй моз воштылі ме ун...  
Но, көть и лэбовтісны вояс,  
А нылыс некыдзи оз вун.  
...И сійө ставсө гөгөрвоас.

♥♥♥

А помнитан, ми шуда карысь пышйим!  
А помнитан, ю дорын бипур өзтім.  
А помнитан, сэн лунтыр дзользис пышкай,  
А кутшөм вөлі енэж йирыс сөстөм!

А помнитан, ми визув ваас сунім  
Да мөдлапөлас уйим эзысь войё.  
А помнитан...  
Ог помнит, ставыс вуні.  
Но кытысь, сідзкө, тэныд тайё дойыс?

♦♦♦

Тэнад кок шыясыд  
Войтвалөн точкөм моз  
Югыз да кыпид лунё  
Пырисны менам вежөрө.  
Сэксянь  
Мейн пессьё  
Тулысь...

♦♦♦

Кор йөз пөвстсьыс тэнё аддза,  
Чужөмө чепөсйё вир.  
Чайта да, овлө тадзи,  
Кор кысанё шедё сир.  
Ак, мый сылы вез кодь шөртыд,  
Гез орөдны судзсяс вын!..  
Но тыдавтөм дзугйыс пөртө,  
И некызди сесь ог мын...

♥♥♥

Видзөд, мыйта ловпу роскас гарйыс!  
Лежнөг чветыс кутшөм!  
Льөмйыс – м-м-м!  
Кымын во ми олам тайё карас,  
Этшаник, но чуймөданыс эм.

Нюмъялан да видзөдалан надзөн,  
Ичөт козин тэныд – ыджыд шуд.  
И быд меөн вайөмторлы аддзан  
Либө дозмук, либө мича куд.

Любө, мый тэ ме моз челядь руа,  
Сы понда и корся лунысь-лун  
Мыйкө сэтшөмтор, мед рыгнас нуны,  
Өдзөс восьтиг шуны: «Синтө кунь!»

Бур, мый миян ичөт олан жырйө  
Гым ог вермы йөртны,  
Пыртны ёль...  
Верми кө, став чуймөданыс быри,  
Синлы-ловлы дивёыс эз коль.

♥♥♥

*Теналы*

А вой улас зэрис.  
Зэв шоныда,  
Лөня.  
И зэрыскөд шөпкөдчис турун и кор.  
А кымөра эжөдыс сідз зэлапөма,  
Мый поті и разалис,  
Эз коль весиг тор.

А войыс зэв югыд!  
А лэбачыс садъяс!  
Здук чөв усьліс гөгөр, и шыасис бөр.  
Ме өшиньөс восьті,  
И вежөрөй садьмис,  
А ыззьөмыс вир-яйын чукйөн, оз төр.

А төвруыс ислалө енэжас, дзибьяс.  
Сикт пальөдчө-мыссьө,  
Көть унмыс эз пөт.  
Ме ю шөрө петі,  
Но кывта, ог зібьясь,  
И чөсмася-казытыла тэ йылысь вөт...



Меным кажитчө –  
Быд здук  
Водзвыв мөвпыштөма и артыштөма  
тэнад олөмын.

Меным сы понда тадзи кажитчө,  
Мый весиг здук  
Абу тэнад  
Звөнитлыны либө волыны.

А мукөддырйиыс кажитчө –  
Тэ өні ме моз жө өтнад, и гажтөмтчан,  
Пуксян өшинь дорад  
Да менам фотокөд вашкөдчан:  
– Йёюк! Тэ өд менам колана,  
Но ме пола на...

Но тэдзсө меным сөмын кажитчө,  
Өд төда –  
Быд здук  
Водзвыв мөвпыштөма и артыштөма  
Тэнад олөмын...



...И сьөлөм пытшкө желля дой  
Сэк поздысис, кор дзикөдз мунін.  
И лунсө вежліс пемыд вой,  
А войыс бара вежсис лунөн.

И дзузгис өшинь водзын би.  
И меө вой пемыдыс сидзис.  
И сымда ковтөмторсө видзи,  
Мый коркө төдліс тэнсьыд ки.

Сідз мыйкө босьтла, чөвта бөр,  
Ог гөгөрво, мый ловлы колө.  
А вольпасьын на тэнад көр  
Да тэнад шоныд руыд олө.

И кыті медбөрысьсө мунін,  
Ме сійө төвсө ветлі дыр  
Да кок туйястө лунысь лунө  
Бек выльмөдлі, мед лым эз тырт.

И лун-лун дзорги өшинь пыр,  
И тэнсьыд нимтө шөпкигтыр  
Лов пессьөді да шытөг горзі.  
Ак, аддзылін кө, кыз ме ворсі!  
И кытчөдз кок туйтө эз тырт



*И мыйкё виччысям на бурёс*



Татшөм кывъяс ме эг шупыв.  
Найөс меным сетіс тулыс,  
Вайис лэбысь дзодзёг-юсьыс,  
Гижис тювöй, ньöжйö усиг.

Татшөм кывъяс ме эг шупыв.  
Найөс шонді ыстіс мулы,  
Нуис юлы садьмөм шорыс,  
Менö аскөд сывны корис.

Татшөм кывъяс ме эг шупыв.  
Найөс төлыс вашкис пулы,  
Шөпкис медводз петысь дзоридз,  
Кодыр төвлөн көдзыд орис.

Татшөм кывъяс ме эг шупыв.  
Сыысь, гашкө, шуд эг сулы.  
Кылан, öні сьөлөм сьылö.  
Тайö сылан – муслун йылысь.

## МЕДВОДДЗА МУСЛУН

Медводдза муслунӧй  
Сьӧлӧмӧс сотыштӧс...  
Коркӧ нӧ збыльысь-ӧ  
Тэ менӧ окыштӧн?

Коркӧ нӧ збыльысь-ӧ  
Шуалӧн кывъяссӧ,  
Кодъясысь шонавлӧс  
Весигтӧ ывлаыс?

Коркӧ нӧ збыльысь-ӧ  
Мӧвпалӧм сэтшӧма,  
Кӧсйылӧм енэжысь  
Кодзувъяс нетшкыны?

Медводдза муслунӧй,  
Татшӧм-ӧ вӧлӧмыд?  
Мыйла нӧ ӧнисӧ  
Ёнтылӧ сьӧлӧмӧс?

♥ ♥ ♥

Ставсӧ вунӧда...  
Сӧмын сийӧс  
Некыдз вунӧдны  
Ме ог вермы,  
Кыдзи дзедьсылӧм  
Льӧмъяс пиын  
Тэкӧд медводдза  
Гожся зэрысь.

Льомлөн корьясыс  
Дыр эз кутны  
Ыльгысь зэрыслысь  
Көдзид ватө.  
Мед эн көтась тэ,  
Орччөн сувті,  
Дай и топөді  
Матө... Матө...

Колис паметьын,  
Быттьö вурьис,  
Тайö томдырся  
Югыд здукыс...  
Весиг öні на  
Менам юрöй  
Кольмö зэр дырйи  
Льомлөн дукысь.

\*\*\*

Сідзи артмис тай,  
Сідзи лоис –  
Тувсов гажа май  
Лымйөн койис.

Муслун гөрддзасьліс  
Да и разьсис,  
Таысь мыжаöсь  
Сöмын асьным.

Лымйыс сапкысис  
Сьөлөм вылө.  
Мыйла янсөдчам,  
Мича нылöй?

Төдам – сылас на  
Шоньд воас,  
Уна гөрөдысь  
Дзоридз лоас.

## СІЙӨ ЗЭРЫС

Сійө зэрыс  
Көтөдыштіс миянөс,  
Муслун йылысь  
Нинөмтор эз төд.  
Енэж вывсянь  
Өдөбтөмөн вияліс,  
Но ми пыдди  
Дзевсис кодкө мөд.

Ёрта-ёрткөд  
Сэтшөм матын сулалім,  
Мый ми костө  
Зэр тусьыс эз усь.  
И эз кыскы  
Саймовтчыны пуланьыс,  
Быттьө зэрыс пыдди  
Киссис бус.

Сійө зэрыс  
Важөн вуніс йөзыслөн...  
А ме век на помнита...  
Оз вун.  
Кодкө көсйө,  
Медым енэж лөзаліс,  
А ме көсья талун  
Зэра лун.



Эз вөв сійө олөмам  
Ярыюгыд кодзулөн,  
И торъялан мичлунөн  
Лолөс эз ышөд...

Ме мөдъяслөн кывъясыс  
Дурмытөдз коддзылі,  
Бур кыв вылө мөдъяслы  
Вөлі зэв лышкыд.

Ме думъясөн лэбали  
Ылі да выліті,  
Көн гөн кодьось изъясыс,  
Лым еджыд – няйтыс,  
Көн ветлөдлан туйясыс  
Веськыдось, шылбыдось,  
Көн сы мында лөсьыдыс –  
Он куж и чайтны!

Эз вөв сійө олөмам  
Ярыюгыд кодзулөн  
И торъялан мичлунөн  
Лолөс эз ышөд...

А муніс...  
И югыдыс быри ме водзвылысь,  
А муніс –  
И вошті ме  
Медыджыд мыджөд.

## ТӨВ БӨРЫН

А төлыс быттьö эз и вöв.  
И сэтшöм лöсьыд öнi гөгөр!  
И пöльтö небыдик лун төв,  
И некод сы вылö оз лöгав.

Ми паныдасям, олам чöv.  
И ог нин важъя мозыс дурöй.  
И мыйкö виччысям на бурöс...  
А төлыс быттьö эз и вöв.

♥♥♥

Тэ зэв бур – ме тöда.  
Ме тэнö ог ылöд.  
Ме радейтi мөдöс  
И эскылі сылы.

Кор окалан менö,  
Мем важыс пыр кылö.  
И радейтны тэнö  
Ог вермы ме, нылöй.

♥♥♥

Усьö кок улö  
Вижөдöм кор.  
Тайö вöлі нин коркö...  
А кор?  
Тэнö виччыси,

Кынми ме дзик:  
Быдса час тэ эн лок,  
Сэсса – кык.  
Менам чужомой  
Котасис весь.  
Гашкө, зэрысь...  
А гашкө, и эз.  
Шуи аслым сэк:  
«Нөшта на здук  
Тэнө виччышта...  
Водзө ог кут».  
Усьө кок улө  
Вижөдөм кор...  
Өнөдз эска,  
Мый воан...  
А кор?





*Шуа тэнö Еджыд юсьöн*

МЕ ЮСЬЛЫ МОЗ ТЭНЫД ЭСКА

Ме юсьлы моз тэныд эска,  
Да пола варышысь моз.  
О, вöлим кө öткодьöн, эськө  
Ми важөн нин лöсьöдiм поз.

Тэ дозмөр моз вунöдлан асьтö,  
Но тар моз на вежлалан дум.  
Ме кора: вай важсö эн казътыв  
Да дзебыштлы ворсöдчан нюм.

Дзик байдöгпысь босьтöмыд мичсö.  
Но синмыд тай кутшлөн кодъ ёсь.  
Эн медводз кө видзöдлы сiдзсö,  
Сэк менö, дерт, кыйны эз позь.

Ме юсьлы моз тэныд эска,  
Да пола дзик варышысь моз.  
Тшöтш вöли кө лэбач кодъ, эськө  
Ми важөн нин лöсьöдiм поз.

## СЫЛАН КАД

Сэтөр синъяс, оз тусь көра вом дор,  
Коркө таысь пөтла али ог?  
Ме ог эскы, шогсян кад пө томдыр,  
Сэк, кор пышъяс сійө, гашкө-й шог.

Но а өні, морөсын кор чукйөн  
Пуө муслун, сөнын ворсө вир,  
Верма вуджны медся вөра чуркйөд,  
И оз повзьөд медся джуджыд йир.

Кодыр сывсьө – шогсьыны мөй понда,  
Сылан кадыс оз өд сэсса лок.  
Сэтөр синъяс, оз тусь көра вом дор –  
Коркө таысь пөтла али ог?

## ШУА ТЭНӨ

Шуа тэнө Еджыд юсьөн –  
Сэтшөм нин тэ сөстөм,  
Шуа тэнө зарни тусьөн –  
Мичыд лолөс өзтө.

Шуа тэнө шонді биөн –  
Тэтөг пемыд светыс.  
Шуа тэнө, нылөй, сійөн,  
Коді шуд мен сетіс.

## НАМЫРЛА

Эжва веркӧс шылъыд кутшӧм!

Пыжным шуныгӧ чӧла.

Намырла ми тӕкӧд вуджам

Рытнас мӧдлапӧлӧ.

Мунам ылӧ видзьяс дорысь

Бӧръя зорӧд весьтӧд,

Аддзам дзусӧ тӧдса борйысь –

Ок, и вотчам сӕсьтӧ!

Намыр, намыр, чӧскыд вотӧс,

Соддзӧ тӧртӧм розьяс.

Медым ӧдйӧджыка содас,

Ӧкта тэнад дозийӧ.

Ваймас кыа кельыд биӧн –

Вӧлись петам сьӧртысь.

Сотчысь вом дорьясным миян

Намыр кодъ жӧ гӧрдӧсь.

## ЭН ШУ

Эн шу, мый сьӧлӧм менам кын,

Эн шу, мый пӧсьлун менам абу,

Эн шу, мый этша менам вын,

Эн шу, мый полӧмла ме ляба.

Тэ эскы меным, китö сөт,  
Кöть öтчыд нюмды меным, муса-й,  
Сэк верма, тадз кө колö тэд,  
Ме öтнам бергöдны став мусö.

### КÖДЗЫД АСЫВ

Весиг ноддяыд асьядор ваймö –  
Кольö пöим да ымралысь шом.  
Кöть и пессö эг этшаник вай ме –  
Сöмын туплясьö кык сэрапом.

Гегдöм киястö тшыныс оз шонты,  
Выльысь пестыны бипурсö сёр.  
Ок, и бура жö сотчö кос конда,  
Сöмын бырис тай лöдсалантор.

♥♥♥

Лёка лоис торйöдчöмыс миян:  
Ме эг кевмысь, ачыд эн жö кор.  
А öд костын вöлі ныла-пия  
Да и нöшта мыйкö ыджыдтор.

Лöня тупки мустöм жырлысь öдзöс,  
Öнi татчö ог нин волы дыр.  
...Ывла вылын вöлі сэтшöм көдзыд –  
Синкымъясöй гыөрзисны пыр.

## КУИМӨН

Куимөн. Ме төда: тан ог ков,  
Но сідзи нин тай выжывыдлөн артмис.  
И өні пессьö вежөгтысь яр лов,  
Дась кыкнаннысö ...окыштны и вартны.

## ТЭНАД НЫВ ДЫРЙИ, МЕНАМ ТОМ КАДӨ

Сьöлаоз көра вом доръяс окалі  
Да сьöd сэтөр кодь синъясö видзөді.  
Тэкөд, колипөй, коркө кө шогалі,  
Сьöлөм дойөс пыр тэкөд жө личөді.  
Асья кыа моз эскөдысь-туйдысьöй,  
Рыгтя шонді моз пелькуйтысь-шонтысьöй,  
Овны мичаа, кыпыда чуйдысьöй,  
Тэнад авъялун кытчө нө кондысис?  
Зарни горадзупь козьнавлі сывтырйөн –  
Вирыд пуө кө, аддзан, дерт, помкатө.  
Сөмын вөлі тай тадз тэнад ныв дырйи,  
Сөмын вөлі тай тадз менам том кадө.  
Чизыр төв менсьым еждөдіс юрсиөс,  
Тэнад чужөмын тыр синва шор визьыс.  
Кодыр янсөдчим, уна и бур сии,  
Абу сюрөма, коньөрөс, дорйысьыс.  
Асья кыа моз эскөдысь-туйдысьöй,  
Рыгтя шонді моз пелькуйтысь-шонтысьöй.  
Овны мичаа, кыпыда чуйдысьöй,  
Тэнад авъялун кытчө нө кондысис?

## ВЕНЗЬӨМ БӨРЫН

Еджыд байдөг кыз репасө пырө,  
Сунін эшкынө тэ юр выв тырөн.  
А ме орччөн жө – пукала чөла,  
Кевма, унмыд мед чөскыдөн вөлі.

Сөмын шебраслөн толаыс пиын  
Байдөг борд моза шевкнитчис кныд.  
Тэныд, вөлөмкө, мусаник пөтка,  
Көдзыд унмовсьны репасад өткөн.

## МӨВП

Талун асыв бара на ме радейтча,  
Муслун биө юр выв тырөн суна.  
Абутөмсө эмөн вөчны надейтча,  
Яндзим төдтөг дзик став грек пыр муна.

Меным веськодь, мый көть сэсса шуасны,  
Гажтөм овны черань везья олөмөн.  
Бордья вөвьяс лэбөдасны-нуасны  
Вөля дорө – сөмын сійө колө мен.

Сьөлөмөй оз өшйы инас, маитчө,  
Унатор мен вөзийө пансьысь луныс.  
Талун асыв бара на ме радейтча,  
Яндзим төдтөг дзик став грек пыр муна.

...И өшиньö пипуяс дзоргисны,  
 И сөнiксö ыркыда кисьтiсны,  
 И кöдзыдсьыс некыдзи дорйысьны,  
 И некодлы бөрдыштны-висьтасьны.  
 И лов шы эз сывды нин гыöрсö,  
 И керкаысь вöтлыны кымöрсö  
 Ме öтнам эг вермы нин, эг.  
 Но шоглунöй сайöдчис сэк,  
 Кор дзуртыштысь öдзöсöд пырин  
 Да чöвтiн: Со вои жö дырөн...

### КЕДЗОВТÖМ

Кор тэнö эновтöны мусаяс,  
 Кор парскö сибыдджык да ён,  
 Дась мунны ва саяс и му саяс  
 Да выльысь шедöдны бур дон.

Мед öдийö кöдзалiсны тэ дiнö,  
 Оз, вöлöм, унаыс и ков:  
 Дзик ставнас асьтö налы сетiн и –  
 Тэ лоин кедзовтана лов.

Кöть абу тэ, а найö вузаяс,  
 Но мыждысян, кыз вöтлöм пон,  
 Кор тэнö эновтöны мусаяс,  
 Кор парскö сибыдджык да ён.

*И тайо шусьо радейтчом?*

♥♥♥

И вöли – ю.  
И пыж, и тас.  
И зарни сю.  
И гортöй – ас.

И сöмын эськö  
лэдзны вуж...  
Но ме эг куж...  
А эски, эски!

♥♥♥

Быттьö  
кык öтка морт,  
чöла видзöдöны öта-мöдыслы син-син,  
кыв оз вежны, –  
кык чашка  
менам асья пызан вылын.  
Кыкнанныслөн  
пыдöсас –  
тöрытья курыд сёрни колястор.

♥♥♥

И лётмуні ки,  
и кусі сьёлём би,  
и разьсис олём гөрөд...  
А водзвыв төді –  
сөрө.

♥♥♥

Эськө эски кө,–  
мый тэ радейтан,  
мый тэ виччысян,  
мый тэ шогалан,  
мый тэ вой шөр вой  
менө кодралан...  
Эськө эски кө,  
эськө эски кө,–  
пырысь-пыр жө и  
ассьым чужанін  
арся лэбач моз  
коли асывдор,  
качи енэжө,  
лэбзи тэ дорө,–  
эськө эски кө.  
Збыльысь эски кө.

Ыпьялө сись.

Сотчө на.

Пола,

регыд нин, регыд  
дзикөдз сотчас-бырас...

Ыпьялө радейтчөм.

Сотчө на.

Пола,

регыд нин, регыд  
дзикөдз сотчас-бырас...

Жаль!

Сотчис кө эськө  
сөмын лёкыс-курыдыс,  
но сотчө радейтчөм,—  
а сійөс жаль меным,  
жаль.

## ОЛӨМЛЫ

Ставсө мырддян,—

а ме,

быттьө арся видз,

выль пөв чужа

лым водзвыв турунөн,

казытылөмьясөн.

«И ТАЙӦ ШУСЬӦ РАДЕЙТЧӦМ?..»

(Кывбур чукӧр)

1

Кыськӧ тай

кӧвъясьӧма!

Черань везйӧн моз гартлӧма,

сьӧлӧмӧ вужъясьӧма,—

нискӧ и нискӧ!

Кад мысыт

дзикӧдз

став вын-эбӧсӧс

бырӧдас...

И тайӧ шусьӧ радейтчӧм?..

2

Сьӧлӧмӧй сьӧкыда пессьӧ

морӧс пытшкын,

висьӧмӧн висьӧ,

мый вынсьыс

пыксьӧ,

оз сетчы

вежӧрлы,

кодӧ,—

ой и чорыд!—

велӧдӧ сийӧс

вунӧдны тӧнӧ,

эновтчыны,

велӧдӧ овны тӧтӧг,

а тэ – дорся на,  
тані,  
матын!

А аски?!– вашкөдө вежөр.  
Аски? Аски? Аски?!!

3

Кымынысь босьтчылі мездысьны.  
Пышйыны.

Дзедьсыны,

Тэнад син улысь – ылөджык!

Но бара нин со  
довьяла

тэ водзын,

вынтөм-эбөстөм.

Но бара нин со  
тэнад киясын

личмунөм бордьясөй...

4

Сира

сьөлөм висьөм,

энтө и энтө.

Эськө верми кө

мыйөнкө

чирыштны сійөс

морөспань улысь

бертыштны мыйөнкө...

Тыдало, нинөмөн он вермы – дөнтөл  
кытчөдзкө.

Кутшөмкө кадколаст колытөдз.

А сэсса,

сөмын на мынтысян,  
сөмын на кокниа лолыштан, –  
выль сьөлөм висьом нин öзийома морөсад, –  
ловья лов кө...

И мед эськө.

Но мед сийө

лоө мөд пөлөсөн, –  
вын-эбөс

содтысьөн,  
бордьяс вылө качөдысьөн,  
олөм вылө ышөдысьөн!  
Сэтшөмөн!

5

Ме төда,

мый тэныд  
лои вывті сьөкыд

мекөтө.

Ме төда,

мый тэныд  
лоө нөшта на сьөкыд  
метөгө.

Но, тыдало, кад воис

мыйкө вежны олөмад.

И тэ бөрйин –

метөг олөм.

А öні кутчысь!

Кытчөдз верман,  
кевма,  
кутчысы!  
Кытчөдз верман...  
А кор нин дзикөдз сьөктөдас,—  
чукөст менө бара.  
А таладорысь,  
и мөдар югыдсьыс,—  
быдлаысь воа —  
удитөдча:  
ректан сьөлөмтө,  
пальөдан шогтө.  
Ме төда.  
Ме верма отсавны.  
Гашкө, сөмын ме и верма.

6

Кималасөн  
корся  
пемыдсьыс  
петанін.  
Ог сетчы повзьөмлы,  
ог сетчы сьөлөм усьөмлы,  
ог на сетчы...  
И эска!  
Эска, мый регыд нин,  
регыд  
шонді югөрыс  
писькөдчас пемыдас,  
съявкнитас!

Регыд нин

ясыд видзөдласөн,

кокни полөн

ме верма восьлавны водзө

да нимкодясьны:

муса-муса олөмөй!

7

Талун нин

быттьө дзикөдз вунөма,

быттьө абу и вөвлөма.

А төрыт на:

сьөлөм висьөм

вөлі йирө и йирө

морөсөс,

дугдывтөг,

йирө и йирө...

И со,

эновтчис!—

быттьө ори висьөм гөрөдыс,

разьсис,

лөнялі.

Быттьө кодкө кыліс

кевмысьөмөс

көнкө.

Сьөлөм вылын

руалө

чөв-лөнь.

Бара на коли ловъя.

Талун.

*Косөдөй важ шудсө*

ЕДЖЫД ВОЙЯС

Господьёй! А кутшөм югыд талун войяс!  
Бара гожөм мян Коми муё воис...  
Выльысь воссяс мын ланьтыштлөм  
нин дойыс,  
Мыйла сөмын тайё гожся войыс воис.

Еджыд войяс, еджыд войяс, еджыд войяс,  
Вай жё пальөдөй важ дойёс, еджыд войяс.

Быттьё неважөн на шуда вөлі войыс,  
Енэж тырнас меным шудсө ассьыс койис,  
Но а мыйла, мыйла öнi тадзсө лоис –  
Сөмын синва коли – шудлөн воча чойыс.

Еджыд войяс, еджыд войяс, еджыд войяс,  
Вай жё пальөдөй важ дойёс, еджыд войяс,  
Косөдөй важ шудсө, еджыд войяс...



Кор мян дорысь мунö медводдза любовь  
Да аслас чегöм борднас вевттьö мусö,  
Сэк быттьö öшкамöшка ньöжйöникöн кусö,  
Да кöнкö сьöлöм дорын сибдö лов.  
И кажитчö, мый оз нин бергав муыс,  
И кадыс тшöкмунö, и воштö ассьыс öд...

Но вояс кольöны... И разалыштö руыс –  
И со нин му выв ёртыд кодкö мöд.  
И сöмын коркö другысь садьман войнас  
И кылан, кыдзи сьöлöм петö ортсö –  
Тэ корсян, коран радейтана морттö –  
Но бара колян öтнад аслад дойнад...



Ме бöрдi бöрнас, öтнам...  
А сэки, сы дырйи –  
Ме гораа зэв сералi...  
И синмас видзöдiг  
Ме казялi, мый  
Синсö сiйö вештö...  
А морöсын  
Нидзулöн дзуглясис дой...  
Но серам вевттис  
Бöрдöмыслысь горсö.  
Ми торйöдчим,  
Но тöдi ме –  
Ми колям кыкöн,  
Сiйö кольö öтнас...

Кодзулыс күсі, эз усь – дод икни дод  
 Көсйөмөй менам эз збыльмы...  
 Өмидзлөн нярмөм нин тусь  
 Некор тай, некор оз выльмы...

♥♥♥

Көсьян, висьтала,  
 Кыдзи овлө,  
 Кодыр волө  
 Ме дорө любовь...  
 Көсьян висьтала,  
 Кутшөм небыдось  
 Турун да вом дорьяс,  
 Кутшөм  
 Пыдөстөм енежө  
 Качалысь лов.  
 Көсьян, висьтала...

♥♥♥

Лөня ме тэ йылысь кевмыся  
 Аслам ен пельөсын.  
 Югыдсө, шоньдсө, сөстөмсө  
 Кевма ме тэныд.



Позьö кö,  
 Тэно ме казытивны кута:  
 Узигад  
 Унтö ме тэнсьыд  
 ог повзьöд –  
 Селькнита сьöлöмад  
 Дзоляник ёльöн –  
 Тайö ме...  
 Ме узя...



Нинöм ог лысьт  
 Тэныд висьтавны,  
 Мед не повзьöдны  
 Дзоляник кöчпиöн  
 Тиралысь сьöлöмöс...

Нинöм ог лысьт  
 Тэныд висьтавны...  
 Ачыд кывзысьышт  
 Менам сьöлöмö...



Сöмын тулысöй воис,–  
 Мыйла енэжыс кымöра?  
 Сöмын тулысöй воис,–

Мыйла кымöрыс бушколөн грöзитчö?  
Мыйла пуйасыс вижöдны көсйöны?  
Мыйла туруныс рудöдö,  
Шондйыс дзебсясьö?  
Арöй, донаöй, нөрöвит  
Менсьым нэриник петассö кынтыны,  
Менам сьöлöмысь лов шысö кусöдны.  
Арöй, донаöй, виччысьлы!

### СЬÖДА-ЕДЖЫДА ГОЖÖМÖЙ

Гудöкыс бөръяысь дзажнитис –  
Олöмыс помасис.  
Сьöлöмö йөршитчис дой.  
Вой.

♥♥♥

Крепыдөн кажитчис шөртыс, да ори...  
Вöсни сунис моз,  
Дзик öти кывйысь и ори...  
Буракö, чорыджык вöлöма кывйыс...

♥♥♥

Кадыс арлань...

♥♥♥

Со тайö ичöтик виж корйыс  
Меным шöпкөдö:  
«Öд ар нин...»  
Пуяс кисьтöны ме ылö ассьыс зарни...  
А менам морöс пытшкын  
Сьөлөм инас öшйытöма пессьö...  
А менам морöс пытшкын –  
Арся енэж тырнас –  
Ме тэнö радейта!!!

♥♥♥

Кöсьян –  
Ме тэнад пыжөн лоа,  
Кывтам тэкöд ылö-ылö.  
Кöсьян –  
Төлөн лоа,  
Сöмын кутны менö удит.  
Кöсьян –  
Кодзулөн ме лоа,  
Менö судзöд...

♥♥♥

Ме тэнад юкмöсысь содз тырйөн  
Гумовта васö,  
Чöскыдсö,  
Сöstөмсö...  
Ме тэнад сьөлөмысь гумовта шоныдсö  
сьөлөмөн...

Ог төд,  
Дыр-ө ме, регыд-ө ола,  
Өтиысь пола –  
Мед тэнад сьөлөмысь шоныдыс  
Другөн оз помась.

\*\*\*

Му вылас менө крепыджыка кут,  
Лэбачөн кор енэжас ме кая...  
Енмыс төдө, кодлөн кутшөм шуд  
Мед жө тэныд муслунөс бөр вая...

Сөмын дзикөдз эн жө йөршит, эн  
Тэ өд ачыд бордьяссө мен сетін,  
Казытыв, кутшөм шуда вөлі ме –  
Тэ и ачыд енэжсьыс жө петін...

### ЧОРЗЬӨДЧА...

Мунысь кө – мун...

Сөмын төда ме,–

Коркө

Бауөн кыссян,

Да өдзөсөс ассьым ог восьты,

Синваён кыссян,

Да сьөлөмөй менам оз небззы,

Кевмыны кутан,

Да кевмөмыд кевмөмөн кольө...

Мунысь кө – мун...

♥♥♥

Коді мунома, сійос вунода,  
Мекод мунысьсö аскөд нуода...

♥♥♥

Енмөй,  
Отсав меным сійос вунодны!  
Эн!  
Эн... Эн...

♥♥♥

Кылан –  
Тэ меным колан!!!  
Тэ меным колан!!!  
Тэ менö кылан???

♥♥♥

Вай кызкө,  
Верман кө,  
Менö прөститлы,  
Ме, колөк,  
Радейтнысьсö  
Сöмын велөдча...

## А ЛЫМЙЫС СЫЛАС

А лымйыс сылас, быттьö эз и вöв,  
И бара тулыс сьöлөмъясын ойдас,  
Ми тэкöд вунöдыштам кöдзыд төв  
И веськалам на важся мойдас,  
Көн позьö радейтны, көн нинöмысь он пов,  
И сьöлөм восьсаөн пыр позьö видзны,  
Көн кокньöдыштас топавлөм нин лов,  
И синъяс югзыыласны радейтана мичнас.



Мунысь кö — нун...  
Сыннэ тöднэ нун...  
Корöд...  
Видöв кысса...  
Менö прöкшнöд кысса...  
Синнэв кысса...  
Радейтэвöн эн мөнсэ нинöдыш...  
Сыннэв кысса...  
Видöв кысса...  
Мунысь кö — нун...

## ЗИНАИДА ПРОШЕВА

---

*Кыдзи тэтөг та дырасо ола*

\*\*\*

Рытъя кыатö, тулыс, сёрмодан,

Асья кыатö лэдзан водз.

Сотчысь сьёлөмөс, тулыс, нормодан,

Он сет пальодны лысва содз.

Кыа костьясад томлун вирдалö,

Тэныд веськодь, тэ ачyd том.

Ачyd шуда: сё рөмөн дзирдалан...

Коркө волас мөй тэныд пом...

Мөд во бара выль томлун виччысян.

Шоныд лун төв шымыртас му.

Дзоридз чукөрөн йөзлы мыччысян,

Но мөдъяслы козьналан шуд...

Менам тулысöй, эн лөгась ме ылö,

Ассьым тулысöс эг кө төд...

Öни кытысь нин? Лэбин зэв ылö...

Видз, мед ме моз эз сорсы мөд...



Еджыд юсьён, мусаёй, сьёлём вылө воин,  
Сөдз гөлөса колипён гажөдан кузь вой.  
Асья сьылысь ыбкайён шондјөдзыс кайин,  
Тувсов тэрыб сырчикён вайин сьёлём дой.

Еджыд байдөг котырын менам вөтын  
лэбзин,  
Рам пыстаён матыстчин, меным кыв эн  
шу.

Небыд лымъя репасө тарён пырин-дзевсин.  
Жонь чукөрын вөччөдін өшинь улысь пу.

Вылын юра гордаён ме дінті тэ мунін.  
Мича еджыд каляёй, петкөдлан пыр веж.  
Эзысь бордья гулюёй, коркө мөй нө вунан?  
По көть төвся пышкайён, некодкөд ог веж.



Мыйла тэ эн сувтөд менө сэк,  
Кор ме чөла ог төд кытчө муні?  
Мыйла сэк тэ ме бөрся эн лок?  
Гашкө, эськө шудсө кыкнад суим...

Тэ эн лок, а ме эг бөрсө кос,  
Гашкө, выльысь паныдасьны полі...  
Корси ассьым мыжөс мунігмоз...  
А колі эськө косны меным, колі.

Колі эськө шуны бөрья кыв,  
Видзёдпыны ота-мөдлы синмө.  
Чорзьом сьолөм эз-ө эськө сыв,  
Лиbö мед нин сывтөм вылө кынмис.

Да эз пессы... Коли кымын во,  
Дженьыд гожомьяса да кузь төла...  
Өнөдз на өд ме эг гөгөрво,  
Кызди тэтөг та дырасө ола.



*Ачымос ме пыр на томон кыла*

♥ ♥ ♥

Мед коддзин кө, тэ табысь нөшта муса,  
А ме жө көсья өвсьыштлыны здук.  
Мед төдпытөг дзик рытя кыа кусас,  
Ми тэкөд талун колям кыкөн тшук.

Ме мусукасьом йыпысь тэд ог гарав,  
Тэ сідз нин метөг мужик көрсьыс пөт.  
Ме бурджык кывбур пыддя тэныд бара,  
Мед сійө коляс кызди мича вөт.

Мед гөгөрвоан, пыддя тэныд выльысь,  
Мед юргас сійө, кызди сыланкыв.  
А кывбурсө ме тэныд силі, збыльысь,  
Тэ сэки вөлін вөрзьөдтөм на ныв.

♥ ♥ ♥

Водыштлыны эськө лудыс вылө,  
Сьөлөм шонтө вежалысь июнь.  
Окавны мед тэнө пөттөдз, нылөй,  
Кытчөдз шонді синьяссө оз кунь.

Куйлігмоз мед радейтны да сьывны,  
Некор медым сьыланыс эз ор,  
Тэнсьыд сьёлём нетшкысьёмтö кывны,  
Морöс вылад юрöс пукта кор.

Ачымöс ме пыр на томөн кыла,  
Сы вöсна и радейтчыны дон.  
Туплясьыштам лудыс вылын, нылöй,  
Ме öд пыр на ыкшаасьысь зон.

Верöс сайö петлөмтö эн гарав,  
Ышнясьнытö, нылöй, эн жö мöд,  
Лудыс вылын лоам томöсь бара,  
Некод, чайта, грекнымöс оз тöд.

#### ТИМШЕР Ю ДОРЫН

– Эн вылö босьт,– тэ ытшкигмозыс велöдан,  
Ми нöшта сöмын ки сөнъясöс зэлöда.  
– Эн коляв,– бара дöжналан тэ куртігөн,  
Да воча нöшта нерсян юръяс сюртігөн.

Ми вежон чöж нин Тимшер дорын  
пуктысям,  
И сöмын пемдандорыс вонйö сунгысям.

И сэки, войнас, войыс мыйöн кокалас,  
Ме пинясьёмсьыд тэнö пöттöдз окала.

## ГУДӨК ЁРТ

Гажөд, гудөк, сьөлөмөс,  
Ворс мем, мудз эн төд.  
Мусаёйлөн вөлөма  
Радейтысьыс мөд.

Кодкөкості, төдлытөг  
Вошті муса ныв.  
Гудөк улын нязөда  
Коми сьыланкыв.

Чикыш бөж кодь муслунысь  
Ог на шогө усь.  
Ёрткөд войсө колпяла,  
Коді сьөд да кузь.

## ВОРСӨ ГУДӨК

Ворсө гудөк рытьяыв,  
Мыла горыс.  
Воча сьылө мича ныв  
Эжва дорын.

Рытья кыаыслөн мич  
Сьөлөм шөрын.  
Узьө мөдлапөвса видз  
Ытшкөм бөрын.

Кыа быттьө нюлө тшук  
Ывла вывсө.  
Сывйыштпыны эськө здук  
Мича нывсө.

Сөмын ачымос ог вен:  
Полөм кыла.  
Кысь нин вичмас сійө мен?–  
Мед нин сылас.

Дерт жө, ворсысьыслы ныв  
Кисө сетас.  
Төдлытөг дзик асьявыв  
Шонді петас.

\*\*\*

Керос бокын, анькытш көра рытө,  
Ыркнитис кор, топөдчыштін быдөн.  
Тэнө сэки сывйыштлыны коліс,  
А ме мыр моз пукалі да полі.  
Мелі кыв көть шуны эськө воча,  
А ме сөмын ышлолалі шоча.  
«Муна,– шуин.– И эн колльөд, аттьө».  
Анькытш гыас кывтіс тэнад платтьө.  
Пальөдіс нин сөмын асья руыс,  
Ышлолаліс мекөд анькытш муыс.

\*\*\*

Мамлөн ырөшыс кодь – чөскыд, кода  
Эжва дорса виддзыс.  
Вөйтча, вода...  
Турун сіяс пөвстас кокньыд ловлы,  
Шудаджыкөн таысь ог и овлы.

Радейтчөмсьыс, чайта, ог и пөтпы,  
Сөмын колис томлунöй, эг төдлы.  
Помтөм шудöй, муслунöй да дойöй!  
Колпöдчөмöй, югыд тувсов войöй!

Кодөс сэсся мөдысь он нин öзты,  
Коді шпывгис – видз кодьыс жö сөстөм...



Тэ юыштін, и банйис чужöмьд,  
Көть сідз нин мичаник, шань ныланöй.  
А меөдз мусукасьны кужöмьд  
Мен нинөм оз на висьтав, кылан-ö?

Ме, гашкө, тэныд серам ылө нин,  
А, гашкө, сөмын шогтö кылөдны.  
Мед сьөлөмъясным мыйкө кылөны,  
Но сьökыд тэнö öні ылөдны.

Да, вөлі рыт, и мыйкө öзйыліс,  
Көть водзынджыксянь муслун поздысьö.  
Ме тэныд кывбур сины көсйылі,  
Но эз тай артмы, сьөлөм косьтысьöй.



Тэнад гожъялөм кокъяссьыд бырөма гажöй,  
Öти рытö тай кодъясөс малавлі важөн.

Öти рытö тай доз сайын пукавлім кыкөн,  
Меным кокьястö мальштны эз вөв сэк пыкөд.

Өні юрситө шылькнитны көсья, и – чеччан,  
Ме пө важөн нин мөд зонлы сьөлөмөн  
сетчи.

Ме пө полөн и вир-яинам мусалөн-пөвлөн,  
Месө быттьөкө олөмад ньоти эг вөвлы.

♦♦♦

Эн сэтшөм вильышасө видзөд,  
И нинөм абусө эн доль.  
Ме вөлі коркө том да мича,  
А өні нинөмыс эз коль.

Тэ важөн мөдлөн мича нылөй,  
И тайө, гашкө, весиг бур.  
Көть сьөлөмөн и полөн кыла,  
Мый тэысь бурджыкыс оз сюр.

Ме тэныд ачымөс ог вөзйы,  
И муслун йылысь ог жө мойд.  
Ме сөмын өтитор и көсья,  
Мед тэнө некоді оз дойд.

Вай видзөд ме выпө, вай видзөд,  
Мед аддза чужөм вывсьыд нюм.  
Тэ өні медся, медся мича,  
И тэнад мичлунысь ог ум.

♦♦♦

Тайö кывбурсö сиа тэныд,  
Менам мусаник сьөлөмшөр.  
Сьökыд, сьökыд зэв ставсö венны,  
Кодыр нинөм он бергөд бөр.

Воас тулыс, но сөмын муслун  
Менам сьөлөмөдз оз нин во.  
Миян костын өд ставыс кусліс,  
Но, а выльысьсö нем оз ло.

Гижа кывбурсö сылан пыдди,  
Сыын – коркөя шуда вой...  
Гашкө, кывбурөс он и лыдды,  
Таысь нөшта нин йирө дой.

Но и мед! Бур, мый му вылас чужлі,  
Мортөс муслунысь он тай кут...  
Ме кө радейтны тэнö кужлі,  
Сідзкө, тайö нин – ыджыд шуд.

♥♥♥

Ме радейта, но яндыся да пола,  
Коть сөмын тэнад мичлунөн и ола.

Ме радейта, но шогыс помся йирө,  
И, гашкө, коркө, көдзалас на вирөй.

О, менам муслун! Кутшөма тэ сёрмин!  
Ме радейта, а сьөлөм дзикөдз нормис.

Но шоныд сыысь, му вылас мый олан...  
Ме радейта, и яндыся, и пола.

## ЛЕЖНӨГ

Лежнөг кодь тэ чуткасьысь, но юмов.  
Окасьөмсьыс коркө өмөй умам?

Быттьө лежнөг, гөрдөдөмыд, өзьян,  
Чеплясян, коть ачыл менө көсьян.

Быттьө лежнөг, сатшйөдчан да сотан...  
Өні өтнам лежнөгсө ме вота.

Пөттөдз вота, ар помын и төлын,  
Лежнөг кодьыс коркө-й меным вөлін.



Съивны эськө тэныд гудок улө,  
Но ог сяммы көсйымоныс тай.  
Медмусанас коркө тэнө шулі,  
Сөмын гортө гөтырөн эг вай.

Но эг вунөд, сьөлөм бердын видза,  
Тэнсьыд нюмтө, коді важкодь нач.  
Колис кад, а тэ со пыр на мича,  
Гашкө, меным кажитчө нин тадз.

Збыльысь мича, синмөй кө оз ылөд,  
Видзөдласнад весьөпөртлан здук.  
Коркө вөлін радейтана нылөн,  
Өні тэнад мичыд мөдлы тшук.

Ог, ог юась, кодкөд, мый да көні,  
Ковтөг нинөм абусө ог доль.  
Шуда ме, мый мича на тэ өні,  
Шудтөм ме, мый муслунөй эз коль.



*Шуда сьолөм шуда киньяс койö*

СЬӨЛӨМ ДОЙ

Ме вая шог  
Да син куньлытөм войяс,  
Ме сьолөм пыдыртана топыд дойöс,  
Кыз гуся козин,  
Төдтөг вөзья тэд.  
Век вөзья тэд.

А вөлі мог,  
Сэк, көпыся сөдз войö,  
Кор шуда сьолөм шуда киньяс койö,  
Тэд эськө сөмын  
Шудсө чөжны мед.  
Тэд чөжны мед.

Но көсья-й ог.  
А мөд ног на тай артмө.  
И сямма-ö сідз олөм визьöс гартны,  
Мед шоглөн налькйö  
Эн нин некор шед.  
Мед эн нин шед.

Ме вая шог...  
Оз артмы тай мөд ног...

♥♥♥

Ме төда: тэ он лок,  
А виччыся.  
Тэ төдан: ме зэв лёк,  
И видзчысян.  
А енэж пемыдлөз  
И кодзувтөм.  
И пемыд войыс – лөж.  
Но мудзпытөм,  
Көть төда: тэ он лок,  
Век виччыся.  
И төда: ме зэв лёк,  
Тэ – видзчысян.

♥♥♥

Со тай кодзулыс дзирдалө – эзысь.  
А ме көсьи, мед мездысян мемысь.  
А ме көсьи, мед дзирдалін ачyd.  
И тэ дзирдавыны кутін. Ме аддзи.  
Сійө югыдсьыс син водзам чусмис.  
Сөмын мыйла? Өд ачым тадз көсьи,  
Медым письтөдім быдөн ас ордым.  
Гашкө, кольсьөма полөй тэ ордын?..

♦♦♦

Тэ тай ылын – сё ю сайын.  
А тувсов юыс быттьо саридз:  
И сэні ойдом, и тані ойдом.  
И кыкнанымлөн – сьолөм дойдом.  
Дойыс – өти,  
Шогыс – уна,  
Радыс ньөти  
Оз тай инась.

Тэ, дерт жө, воан ылі муысь,  
Сэк, кодыр лоас ми дор туйыс.  
Дерт, тувсов ваыс дженьыд нэма,  
А ме пола: помыс эм-ө.

Помыс – өти,  
Туйыс – уна,  
Качча бөрти,  
Кытчө муна.



*Сьөлөмшөрөй менам*

МУСЛУН

Бордъя идөгыс\* морөсө лыйис,  
Зарни пегышсө мыш саяс дзебис,  
Борднас өвтыштис. Төврусө кыйис.  
Эм тай кытыськө сямлун да эбөс!  
Ньөвйыс сатшкысис сьөлөмө дойөн.  
Сөмын дойсьыс эг сыркмун, эг повззы.  
Дивө! Мойдкыв кодь кодзула войө  
Восьті синъясөс. Повзи ме! Повзи!  
Выльысь төдмалі сынөдлысь көрсө,  
Аддзи муслун пыр олөмпысь мичсө,  
Неминучалысь жугөді йөрсө,  
Нормөм сьөлөмпысь ёнмөді идзсө.

ШУД ДА ДОЙ

Көка войө, көка войө...  
Мича нылыс тшапкис сойөд.  
Гулыд кушин шөрө нуис,

---

\* *Бордъя идөг* – ангел (рочөн).

Синмө видзөдөмөн шуис:  
«Менам помтөм шуд,  
Менам помтөм дой...»  
Зэра лунө, зэра лунө...  
Нывлөн паметъысь ме вуні.  
Өні ачым бөрда-лөвта,  
Тывйө шогөс сөмын көвта...  
Вөлі помтөм шуд,  
Коли – помтөм дой.  
...Гашкө, шудөй сэки дудіс,  
Көкыд көкнысө кор дугдіс?

### ШӨВКТУГЙӨЙ...

Шөвктугйөй тэ менам,  
Сьөлөмшөрөй менам.  
Бара мыйкө нормин...  
Меным сьөкыд ормөн...  
Аддзыны, кыз петө  
Тэнад синва войтыд,  
Гашкө, бурджык метөг  
Овны, кызди мойдын?  
Гашкө, меным сывны,  
Водны мича гүө,  
Медбөръяысь сывны,  
Пөрны асья руө?  
Гашкө, лэбны войлань  
Кудрияса пула?  
Гашкө... Но ме төда:  
Тэтөг пыр жө кула...

Шөвктугйөй тэ менам,  
Гашкө, ставсө венам?

## ТЭТӨГ

Быттьö нинöм эз и вöвлы...

Сідз жö югыд шонді петö,

Сідз жö тöлыс тошöс летö,

Сідз жö кисьмö-воö сэтöр,

Радлö лолыд

вöльнöй светөн...

...Сöмын ставыс тайö – тэтöг.

## ПИПУ

Арся вöрын, кодi жуймöдчис, кын...

Дзикöдз кусöма бипур.

Сöмын босьтöма пöимпысь вын

Орччөн сулалысь пипу.

Сыкöд тулысын аддзысим ми:

Танi радейтчöм чужис.

Зонлөн синъясын öзъялысь би

Нывлөн сьөлöмö вуджис.

Пуыс шöпкöдö: локтас на мöд

Олöм ловзьöдысь тулыс...

Сійö, коньөрöй öнöдз оз тöд:

Важөн радейтчöм куліс.



Тэныд

1

А пуясыс, чөв усьём пуясыс – лэбачьяс енэжас,  
И Тёлысьыс – бобулён сьод ваас тіралө  
өтнас...

И төрытья войыслысь коръясыс  
Ваясны вунөдөм вөтьяс  
тэ йылысь...

2

Еджыд зэрас  
Өтчыд восьтан өдзөстө –  
Лөня арыс пырас тэнад лолө.  
Сөмын коръяс – инмөдчан да –  
Көдзыдөсь...  
Вөтьяс-коръяс –  
Инмөдчан да – көдзыдөсь,  
Со и ньөжйө кусө наын олөм.  
Мунан арас –  
Мыйкө шогсьыс төлыскөд,

Коръяс вывті – быттьö вунöм вöтö.  
Сöмын кольö,  
кольö тэнад гөлöсyd,  
Менам лолö –  
Тэнад ылі гөлöсyd.  
Сійö накöд вашкöдчыны мöдас  
Пемыд паркын.

3

А тöдан,–  
Тöрыт бара локтіс тöv,  
И еджыд лымйöн тыртіс  
лэбач позъяс...  
Тэ Му вылас эн вöv,  
и ме эг вöv,  
И некод дорö ловъясыслы косны.  
А ки пыдöсö усьö Тöлысь войт,  
И вöтала ме,  
быттьö локтö тулыс...  
А лымйыс лэччö –  
улö,  
улö,  
улö.  
И тöдан тэ, мый арыс оз нин ло.

4

И лымйыс кылö  
лэбачьяслысь шогсö,  
И мыйкö лолöй көсйö тэныд шуны.

А тэ со бара  
сэтшөм ылө мунап  
и кок туйястө лым вылас  
он коль...

Ме көсья Тэкөд –  
Тэнад югыд муө.  
Ме көсья Тэкөд  
турун вашкан чөлас.  
А өшинь вылын  
ньөжйө сылө Төлысь...  
И асылөдзыс коли –  
сөмын вой.

5

Тайө вөлі уна сө во сайын,  
кор синьясө видзөдіг  
Медводдза лэбачьяс  
Медводдзаысь мунісны лунвылө,  
И ме тэныд шуи –  
– Ар нин...  
А Шондіыс шыасис меным  
чөв-лөньөн...



*Ме тэнö вунöдi*

♥♥♥

Ме век на тэнад серам шыөн код.  
Ме век на тэнад енэж синмөн керём.  
А рыгтя зэрыс некыдзи оз вод.  
Он гөгөрво – то жалитö, то нерö.

Эг көсйи велавны тэ динö, эг.  
Регыдья янсöдчöмысь, быгтьö нывка, повзи.  
Чайтi, мый сьёлём ичöтик да жеб.  
А кулём пыдди тулысыскöд повзи...

♥♥♥

Овны, эськö, овны,  
Апавны веж сынöd.  
Некодысь не повны,  
Мунны енэж вылöd.  
Асылödзыс тэкöd  
Варовитны-сөрны.  
Төвся грекьяс дзевтөг  
Тувсов шыас төрны...

♥♥♥

Ме пола, мый тэ өтчүд  
он во бөр,  
А локтан кө,  
Ме тэныд ог ло муса.  
И менсьым полём  
Некодлы он вузав,  
Көть керка пытшкө  
Сійө оз нин  
төр...

♥♥♥

Бара на тэкөд ме пиняси.  
Кыдзи нө водзөсө овны?  
Кыдзи бөр му вылас инасьны?  
Юсьөмысь важ ногыс повны?

Мыйла нө мукөдыс кужоны  
Муслунлы видзөдны бөрө.  
Сө арөс төдлытөг вуджоны,  
А ми өти здукас ог төрөй...

♥♥♥

Тэ менам асья зэр.  
Тэ олөмө он кольччы.  
Ни зелляйй эз кер,  
Ни синъясысь эн коддзы.

Кок туйтö нюлас лун,  
И быттьö эн и волы.  
Мун, асья зэрöй, мун.  
Ме тэтöг шуда лоа...

\*\*\*

Тэнад синъясыд  
    менам синъясын.  
Пөдін төдлытöг –  
    и он сюр.  
Курыд синваөн  
    ог жö войтыштöд.  
Ставыс, шондiй,  
    лоас бур...

\*\*\*

Воддза гожöм окаліс  
    катшасинъясөн.  
Таво гожöм коялö  
    катшашыдöсөн.  
Кытчö бара-й вошины  
    муса нимъясöй,  
Кодъяс öнөдз олісны  
    сьөлöм пыдöсын...

♥♥♥

Ен да му костас  
Ола-лэбала,  
Паськыд лов шыё  
Мырся-велала.  
Ог төд, лым чирён  
Али кодзулөн  
Усьны кок улад,  
Мед тэ кодзылан...

♥♥♥

Этша мелі кыв тэныд ме вичмөдлі.  
Тэнад синваён некор эг бөрд.  
Зэлыд морөстө  
кужтөг ме личөдлі.  
Тэкөд олі,  
а тэнө эг төд.

Прөста өні со  
кок улад туплясьё  
Менам озырлун, сьөлөм дой, лов  
Прөща луньяссиянь  
да прөща луньясөдз –  
Тэныд мясянь дзик нинөм оз ков...

\*\*\*

Но тэ менö бара на ылöдлан,  
И ме тэныд бара на верита.  
Енэж синъясад тöдлытöг кылала,  
Ог во некыдзи пальöдчан берегас.

Йöз сёрниыд бара на зёлöдас  
Голя гөгөр нэм орлытөм петлясö...  
Коркö юрöй нö овнысö велавлас?  
Коркö сьёлöмöй лолыштныс сетлас-ö?..

Пöдлн тöдлытöг —

и он сур.

Турлди синъясэн

\*\*\*

Ме тэнö вунöдi. Вунöдi...  
Но мыйла нö сьёлöмöй тiпкö,  
Кор öшинь пыр көсийöны суödны  
Синъясöй тэнсьыд мичтö.

Ме тэнö вунöдi. Вунöдi...  
Но мыйла нö мөдкөд мем гажтөм.  
И мыйла нö быд асыв курөдö  
Синвайöй вунөм важсö?..

Катшашыд сьöбн аниссөванун шибөп

Битчö барэ-тöдлөмөнүн шибөп бд

Тэндэ мөснр биньр динет

\*\*\*

Миян синъяс костын  
    абу туй, а вояс.  
Миян сьёлөм костын  
    абу би, а дойяс.

Миян лов шы костын  
абу содз, а Ен...  
Аддзысьёмпысь полём  
он нин сэсса вен...

\*\*\*

Сы мында во тэнад олёмён олі.  
Сы мында во.  
Сы мында во тэнад синваён сола  
Инасьтём лов.  
Уджйөзөй сё пөв нин тэ водзын мыні.  
Он гөгөрво.  
Эбөсөй быртөдз ме тэ дінө сыні.  
Сөмын эг во...

\*\*\*

Синъяс шымыртіс помтём еджыд.  
Мудзи личөдны налысь шог.  
Мыйла шулін, мый төлыс дженьыд.  
Со тай тулысыд эз и лок.

Быри пескөй и сиськөй быри.  
Кынмём морөсын – шы ни ру.  
Ог кув сыысь, мый лымйөн тыри.  
Кула сыысь, мый тэ он вун...



# ЮРИНДАЛЫСЬ

---

Иван Куратов	
Сандра, сьёлөмшөрөй . . . . .	3
Тима Вень	
Сьёлөмын видза пыр гусьөн . . . . .	8
Нёбдинса Виттор	
Муса нылөй, петав, петав . . . . .	11
Илля Вась	
Көні муслун – шуд оз куслы . . . . .	15
Сандрик Микол	
Эг кут вермыны сійөс вунөдны . . . . .	30
Василий Елькин	
Вой муё зарни тулыс воё . . . . .	32
Ананий Размыслов	
Муслун сьёлөм динө инмис . . . . .	34
Иван Вавилин	
Вөвлі коркө менам кодзув . . . . .	39
Выль Паш	
Радейтчөм сылөн эз кус . . . . .	42
Георгий Торлопов	
Мудзөм сьёлөм мелі нюмөн шонты . . . . .	45
Фёдор Щербаков	
Колип сьылөм шы улын . . . . .	48
Николай Фролов	
Воча серөктіс эзысьөн шор . . . . .	53
Василий Власов	
Кывъяс пыдди – сьёлөм висьөм . . . . .	57
Александр Мальцев	
Му вылас – мойд . . . . .	62
Серафим Попов	
Кыз нө тэнө он радейт . . . . .	68
Иван Торопов	
Ме помтөг шуда тэкөд орччөн . . . . .	75
Геннадий Юшков	
Югыз вөлі сійө войыс . . . . .	78
Альберт Ванеев	
Ме тэ ради му вылас ола . . . . .	88
Владимир Тимин	
Эм сөмын тэ . . . . .	109

Юрий Васютов	
Тэ кытысь нывбабаыс сэтшöмыс . . . . .	126
Владимир Попов	
Тайö ыджыд му вылас . . . . .	134
Василий Лодыгин	
Шонді бана тулысьяс чужан муö волöны . . . . .	139
Михаил Елькин	
Лыа ді вылын . . . . .	152
Николай Шукин	
Ме радейтны чужи . . . . .	164
Виктор Напалков	
Вай жö окасям, мича ныланöй . . . . .	173
Александр Некрасов	
Ме тэныд öкті катшасинъяс . . . . .	180
Николай Тюрнин	
Ассьыд шогтö пальöд . . . . .	189
Александра Мишарина	
Сувтны эськö пелысьөн . . . . .	191
Евгений Козлов	
Кор йöз пöвстсьыс тэнö аддза... . . . .	203
Пётр Бушенёв	
И мыйкö виччысям на бурöс . . . . .	211
Александр Лужиков	
Сöмын кыкөн, сöмын ми . . . . .	218
Вячеслав Бабин	
Шуа тэнö Еджыд юсьөн . . . . .	219
Галина Бутырева	
И тайö шусьö радейтчöм? . . . . .	226
Нина Обрезкова	
Косöдöй важ шудсö . . . . .	234
Зинаида Прошева	
Кыдзи тэтöг та дырасö ола . . . . .	243
Эдуард Тимушев	
Ачымöс ме пыр на томөн кыла . . . . .	246
Скөр Кöсьта	
Шуда сьöлöм шуда киньяс койö . . . . .	255
Александр Шебырев	
Сьöлöмшөрöй менам . . . . .	258
Алёна Ельцова	
Тэныд . . . . .	261
Анжелика Елфимова	
Ме тэнö вунöді . . . . .	264

*Литературно-художественное издание*

**О НЕЖНОСТЬ, ТЫ БЕСКОНЕЧНА...**

**Стихи о любви**

*На коми языке*

**Составитель**

**Козлова Елена Васильевна**

**Художник**

**Шарипков Геннадий Николаевич**

**Редактор *В.И.Трошева***

**Художественный редактор *Г.Н.Шарипков***

**Технический редактор *З.А.Поздеева***

**Компьютерная верстка – *А.В.Кетова***

**Корректор *В.К.Тюрнина***

**КР № 0034 от 03.03.97**

Подписано к печати 7.05.2001. Формат 70×90<sup>1/32</sup>. Печать офсетная. Бумага офсетная. Гарнитура «Карелия». Усл. печ. л. 9,95. Уч.-изд. л. 9,2. Тираж 2000. Заказ № 4751

**Коми книжное издательство**

**167982, г. Сыктывкар, ул. Карла Маркса, 229**

**Лицензия на полиграфическую деятельность**

**Серия ПД № 00107 от 09.11.1999 г.**

**Отпечатано в ОАО «Коми республиканская типография»  
167982, г. Сыктывкар, ул. Первомайская, 70**





КОМИ НЕБӖГ ЛЭДЗАНІН  
2001